


# Luka



The Gospel According to Luke in the Chergash dialect of the  
Vlax Romani language

# **Luka**

## **The Gospel According to Luke in the Chergash dialect of the Vlach Romani language**

copyright © 2018 Pioneers

Language: Chergash (Romani, Vlach)

Dialect: Chergash

Translation by: Pioneers

DRAFT VERSION

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-11-11

---

PDF generated using Haiola and XeLaTeX on 11 Nov 2022 from source files dated 11 Nov 2022  
1e2d0214-3d12-5bbc-b29b-eea1aae09a1b

## Contents

Luka . . . . .	1
----------------	---

## E Lukašči Bahtali Nevimata

Akaja Bahtali nevimata ramosarda o manuš savesko alav sas Luka, vo sas doktori, misionari savo putuilas e apostole Pavlesa (dik Kol 4,14; Flm 24; 2. Tim 4,11) thaj nas Židovo. Akaja knjiga opisujil e Isusesko bijandipe, trajo, sikaŕpe, čudurja, lesko smrto po trušul, vaskrsenje andar e mule thaj vi o vaznesenje po nebo. Jek katar e glavne tema akale Bahtale nevimako si kaj o Isus pherel e obećanja savo dijas o Del e Izraelešće ando Purano zaveto ali isto kaj e Bahtali nevimata naj samo pale Židovurja već vi pale okola save naj Židovurja. Ande akaja Bahtali nevimata o Isus sikavelas e but e teme, uključujući vi e molitva, e Sveto Duho, bah, zahvalnost thaj e love. Akaja knjiga isto gajda sikavel sar o Isus sastarelas thaj jartolas e bezeha e bute manušenđe, uključujući vi okolen save sas zurale nasvale ili opsednime e bendenca, čoren, bezehalen, odbacime manušen thaj e bute manušnjen. O Luka akava ramosarda, verovatno varekaj katar 65. brš posle o Hristo.

### *O Luka ramol lil e Teofilešće pale e Isusesko trajo*

<sup>1</sup> Poštuime Teofile, ramov tuće zbog godova kaj but džene line te ramon okola događajurja save o Del obećisarda majsigo prekal e prorokurja, a save dogodisajle maškar amende. <sup>2</sup> Von godova ramosardine prema okova so maj anglal phendine e očevicurja\* thaj sluge e Alavešće. <sup>3</sup> Zato vi me odlučisardem Teofile, te ramov tuće sa po redo, pošto pomno sa katar o početko istražisardem, <sup>4</sup> gajda aveja sigurno kaj si okova sikavipe savo primisardan pouzdano.

### *O anđeo navestisarel kaj bijandola o Jovano savo bolelas*

<sup>5</sup> Ande vrjama kana vladilas o Judejsko caro o Irod, sas varesavo rašaj savo akhardolas Zaharije andar e Avijasko† rašajesko redo. A e lešći romnji sas isto andar e Aronosko pleme.‡ Lako alav sas Jelisaveta. <sup>6</sup> A liduj sas pravedne anglo Del, thaj trainas sa po zakono thaj pe okova so sas odredime anglo Gospod, bi manako. <sup>7</sup> A naslen čavra, kaj e Jelisaveta našti ačhelas khamni, a liduj već phurile.

<sup>8</sup> Jek đes kana o Zaharija služilas e Devlešće ando Hramo kaj po dužnost avilo o redo kana lešći grupa rašaja trubunas te služin, <sup>9</sup> prema e rašajengo običaj odabirisardine les gajda kaj čudine e kocka te del ando Svetište e Gospodesko te kadil. § <sup>10</sup> Pale vrjama kana kadilaspe ando Hramo, sa o them sas avri thaj molinaspe.

<sup>11</sup> A e Zaharijašće sikadilo o anđeo e Gospodesko savo ačhelas pe desno rig e žrtvenikosko katar savo kadilaspe. <sup>12</sup> Kana dikhla les o Zaharije, zurale darajlo.

\* **1,2** Očevicurja sas okola save sas e Isuseja katar o početko lešće službako thaj dičenas sa e događajurja. † **1,5** “savo si o potomko e Avijesko.” O Avija sas pra papo akale grupaće rašajende thaj savora von sas e Aronešće potomkurja, savos sas prvo e Izraelconengo rašaj.

‡ **1,5** Akava značil kaj sas voj andar e isto linija e rašajendi sago vi o Zaharije: “Lešći romnji sas isto andar e Aronosko plemeno.” “O Zaharije thaj lešći romnji e Jelisaveta sas liduj potomkurja e Aronešće.” § **1,9** E rašaja trubeine te den jag mirišljavo tamnjano sago prinos e Devlešće svako detharin thaj svako talerjat po posebno oltari andre ando Hramo.

<sup>13</sup> A o anđeo phendas lešće: “Na dara, Zaharija! Kaj si ašundi ćiri molitva: e romnji ćiri e Jelisaveta bijanela tuće čhave, thaj tu dele alav Jovan. <sup>14</sup> Zbog leste aveja bahtalo thaj radosno, thaj e buten raduila lesko bijandipe. <sup>15</sup> Kaj avela baro anglo Gospod. Či pijela mol niti pimo savo matarel. Pherdola e Sveto Duhosa još ando đi pire dejako. <sup>16</sup> Vo boldela e but Izraelconen e Gospodešće lenđe Devlešće. <sup>17</sup> Džala anglo Gospod sago glasniko pherdo duho thaj sila, sago o proroko Ilija. Pomirila e dades lešće čhavenca a e nepokorne umurja boldela gajda te prihvatin o razumnost okolengo save si pravedne. Pripremila e theme pale e vrjama kana o Gospod avela.”

<sup>18</sup> A o Zaharija phendas e anđelošće: “Sar me džanava kaj godova avela čaće? Kaj sem me purano thaj e romnji mungri dija ande pire purane brš.”

<sup>19</sup> A o anđeo phendas lešće: “Me sem o anđeo Gavriilo, savo ačhav anglo Del\* te služiv, thaj bičhaldo sem te ćerav svato tuva thaj te javiv tuće akaja bahtali nevimata. <sup>20</sup> Zato kaj či paćajan akana zanemija thaj naštik ćereja svato džiko đes dok či avel e vrjama pale godova thaj mungre alava či pherdonpe.”

<sup>21</sup> A o them ažućarelas avri e Zaharija, thaj začudisajle so gaći zadržisajlo ando svetište e Hramosko. <sup>22</sup> A kana napokon inljisto, naštik ćerelas svato, nego e znakonenca probisardas te phenel lenđe so sas ando Hramo, thaj von haćardine kaj sas les viđenje ando svetište e Hramosko.

<sup>23</sup> Thaj kana završisajle e đesa lešće službaće ando Hramo o Zaharije đelotar čhere. <sup>24</sup> A posle godola đesa lešći romnji e Jelisaveta aćili khamni, thaj pandž čhon či inkljelas avri andar piro ćer† thaj motholas: <sup>25</sup> “O Gospod milostivo dikhlas pe mande kaj fuljardas mandar o ladžavo anglo them.”†

### *O anđeo navestisarel kaj bijandola o Isus Hristo*

<sup>26</sup> Kana e Jelisaveta sas khamni šov čhon, o Del bičhaldas e anđele Gavriilo ando cikno Galilejsko gav savo akhardolas Nazaret <sup>27</sup> ke Marija savi sas još čhej thaj sas mangli palo manuš, savo akhardolas Josif. Vo sas potomko e carosko Davidosko. <sup>28</sup> Kana o anđeo dijas late andre phendas laće: “Raduitu,§ kaj o Del si pherdo milosti prema tute! O Gospod si tusa.”

<sup>29</sup> Pe godola alava e Marija uznemirisajli thaj počnisarda te gndil so znaćisarel godova pozdrav. <sup>30</sup> A o anđeo phendas laće: “Na dara Marija! Kaj o Del iskažisardas tuće piri ljubav.”\* <sup>31</sup> Ake ačheja khamni, thaj bijaneja čhave saves deja alav Isus. <sup>32</sup> Vo avela baro, thaj akhardola Čhavo e Majbaresko, thaj o Gospod Del delales autoriteto

\* **1,19** savo ačhav anglo Del Ando original ramol: “savo ačhel anglo Del.” Akava si phendo sago ukor e Zaharijašće. Prisutnost e Gavrijelešći, savo avel direktno katar o Del, trubujasas te avel dovoljno dokazo e Zaharijašće. † **1,24** Kana nakhlo pandž čhon sar sas khamni avela očigledno savorenđe kaj si khamni. Askal o them či mardinesas muj katar e Jelisaveta sago kaj si voj još nerotkinja. † **1,25** Akava phenelas pe palo ladžavo savo inđarelas kaj nas lat čhavra. § **1,28** Raduitu Akava šaj prevodilpe sago “Zdravo” ili “Raduitu!” \* **1,30** Ando original ramol: “arakhlan milost ko Del”. Idijomo “arakhlas milost” značil pozitivno prihvatiše varekatar: “O Del odlučisardas te del tut piri milost”, ili “O Del sikavel piri ljubav”

te vladil sago o caro David savo sas lesko prapapo. <sup>33</sup> Vo vladila e Jakovešće plemenova dži ko veko, thaj lešće carstvošće či avela krajo.

<sup>34</sup> A e Marija phendas e anđelošće: “Sar godova avela kana sem me još čhej?”

<sup>35</sup> A o anđeo phendas laće: “O Sveto Duho fuljela pe tute, thaj e Sila e Majbare Devlešći avela pe tute thaj zasenila tut. Zato vi okova savo bijandola avela sveto, thaj akhardola o Čhavo e Devlesko. <sup>36</sup> Ake vi čiri bibi e Jelisaveta, ačhili khamni ande piri purani vrjama, avela lat čhavo. Okoja isto manušnji pale savi phenenas kaj naštik avela čhavra već si šov čhon khamni! <sup>37</sup> Kaj e Devlešće khamči naj nemoguće!”

<sup>38</sup> A e Marija phendas lešće: “Ake, sluškinja sem e Gospodešći. Neka avel mande pe čire alava.” Thaj o anđeo delotar latar.

*E Jelisaveta pindžardas kaj o čhavro ande Marijako di si o Mesija*

<sup>39</sup> Varesave đesa maj posle e Marija siđardas ande gorsko krajo e Judejako. <sup>40</sup> Kana aresli okote dija ande Zaharijasko čher, thaj pozdravisajli e Jelisavetava. <sup>41</sup> Kana e Jelisaveta ašunda e Marijako pozdrav, o čhavro huklo ando lako di, a e Jelisaveta pherdili e Sveto Duhosa. <sup>42</sup> Pale godova e bahtatar čhutas muj e bare glasosa: “Maj blagoslovime san tu, Marijo, katar sa e manušnja, thaj blagoslovime o čhavro ande čiro di. <sup>43</sup> Savi čast siman, te tu e dej mungre Gospodešći aves mande! <sup>44</sup> Kaj ake čim o pozdrav čiro avilo džike mungre kan, e bahtatar o čhavro huklas ande mungro di. <sup>45</sup> Blago tuće kaj paćajan kaj pherdola okova so phendas tuće o Gospod!”

*E Marija slavil e Devle*

- <sup>46</sup> E Marija askal phenda:  
 “Barjarel e duša mungri e Gospode!  
<sup>47</sup> Thaj raduilpe o duho mungro e Devlešće mungre Spasitelješće.  
<sup>48</sup> Kaj milostivo dikhla pe mande pe piri ponizno sluškinja,  
 katar akana sa e manuša akharena man blagoslovime.  
<sup>49</sup> Kaj o silno Del, savesko si alav sveto,  
 čerdas mande baro lačhipe.  
<sup>50</sup> Kaj o Del si milostivo;  
 e milost lešći si katar e čang dži ke čang okolende save daran lestar.  
<sup>51</sup> Pire močno vastesa čerel silne dela  
 thaj odbacisardas pestar okolen save si barikane ande pire ile.  
<sup>52</sup> Čhudas tele katar o prestolje e vladaren,  
 a vazdas e poniznonen.  
<sup>53</sup> E bokhalen čaljarda e lačhipeja,  
 a e barvalen mukla čuče vastenca.  
<sup>54</sup> Huklo ando pomoć pire slugende e Izraelconende  
 thaj či bistardas te avel milostivo†  
<sup>55</sup> sago kaj obečisardas amare pra paponende,  
 e Avraamešće thaj lešće potomkonende dži ko veko.”  
<sup>56</sup> A e Marija ačhili ke Jelisaveta varekaj katar trin čhon, thaj askal boldapes čhere.

† 1,54 O Del naštik te bistrel. Kana ramol kaj o Del “delpes gođi ili či bistrel”, godova si idijomo savo značil kaj o Del deluil po temelji okolesko so majsigo obečisardas. Akava phenel pale Devlesko obečanje e Avramešće: “kaj obečisardas amare prapaponende kaj avela milosrdno.”

### *Bijandilo o Jovano savo bolelas*

<sup>57</sup> A e Jelisavetaće avili e vrjama te bijanel thaj bijanda čhaves.  
<sup>58</sup> Kana ašundine laće komšije thaj laći familija kaj o Gospod sas gajda lačo thaj milostivo prema late, raduisajle zajedno lasa. <sup>59</sup> A kana e čhavres sas ohto đes o them čidape po obred te obrezin e čhavre. Thaj line te denle alav Zaharija, sago kaj bučhol lesko dad. <sup>60</sup> Ali e Jelisaveta phendas: “Na! Lesko alava avela Jovano!”

<sup>61</sup> A von phendine laće: “Pa khonik ande čiri familija či bučhol gajda.” <sup>62</sup> Zato e znakonenca phučline e čhavrešće dades sar vo kamel te del alav e čhavres. <sup>63</sup> O Zaharija manglas e pločica pe savi šaj te ramol thaj ramosardas: “Jovano si lesko alav.” Thaj savora začudisajle. <sup>64</sup> Thaj odma o Del putardas lesko muj thaj oslobodisardas lešći čhib thaj o Zaharija počnisardas te čerel svato thaj te slavil e Devle.

<sup>65</sup> A e Devlešći dar lija sa lenđe komšijen po gorsko krajo e Judejako, thaj čerelas pes svato pale akala dogadžaja. <sup>66</sup> Thaj savora save ašundine pale akala dogadžaja, gndinas thaj phučenar pes ande peste: “So avela katar akava čhavro? Čačes si o vas e Gospodesko pe leste.”†

### *E Zaharijasko proročanstvo*

<sup>67</sup> O Zaharije, o dad e čhavresko, pherdilo e Sveto Duhosa, thaj prorokuisardas alavenca:

<sup>68</sup> “Blagoslovime o Gospod Del e Izraelosko kaj avilo thaj izbavisarda pire theme!

<sup>69</sup> Vazdas amende silno spasiteljeŠ

andar o potomstvo pire slugasko e Davidesko,\*

<sup>70</sup> sago kaj dumut obećisardas

po muj pire svete prorokonengo

<sup>71</sup> kaj izbavila men katar amare dušmaja

thaj andar e vas† savorende save mrzanmen.

<sup>72</sup> Sas milostivo amare pra dadende

thaj održil piro sveto savezo,

<sup>73</sup> e solah savi dija e Avraamešće amare pra dadešće.

<sup>74</sup> Izbavisarda amen andar amare dušmajende vas,

te šaj služis lešće bi darako,

<sup>75</sup> ando svetost thaj ande pravda angle leste dokle god sam džude.

<sup>76</sup> Aj tu, Jovane čhaveja mungreja, akhardoja proroko e Majbare Devlesko

kaj džaja anglo Gospod te lačhares lesko drom.

<sup>77</sup> Sikaveja e Devlešće theme sar te pindžaren o spasenje

kroz o jartipe lenđe bezehendar.

<sup>78</sup> Zbog e bari milost amere Devlešći,

† **1,66** o vas e Gospodesko pe leste Izraz “o vas e Gospodesko” odnosilpes pe Gospodesko moć. “E Gospodesko moć sas lesa” ili “o Gospod čerelas moćno ande leste”. **Š 1,69** silno spasitelje Ando original ramol: “šng spasenja pale amende”. E šng e životinjači sas simboli pale lako moć te branilpes. Palo Mesija phenelpes sago kaj si vo šng saves si moć te spasilamen. \* **1,69** andar o potomstvo pire slugasko e Davidesko si doslovno “ando čher lešće slugasko e Davidesko”. E Davidesko “čher” Akate prestavisarel lešće familija, majtačno, lešće potomkonen: “ande familija lešće slugošći e Davidešći” ili “savo si potomko savo si potomko lešće slugasko e Davidesko”. † **1,71** e vas prestavil pale e moć savi e bilače manuša koristin protiv e Devlesko them.

osvanila† amende andar e visine e nevi detharin a  
 79 te anel svetloŠ okolende save train ando tunjariko thaj ande dar  
 katar o smрто  
 thaj te upravisares amare pungre po drom e miroško.”\*  
 80 A o čhavro Jovano barjolas thaj zuravolas ando duho. Kana barjilo,  
 trailas ande pustinja sa dok či započnisardas e javno služba angle  
 Izraelcurja.

## 2

### *E Isusesko bijandipe*

(Mt 1,18–25)

1 Ande godoja vrjama kana bijandilo o Jovano, inkljisti e zapoved  
 katar o rimsko caro Avgusto te sa o them savo trailas ando Rimsko  
 carstvo avel ramome ando popis stanovništva. 2 Akava sas o prvo  
 popis kana o Kvirinije vladilas e Sirijava. 3 Savora teljardine te  
 prijavinpes palo popis ande gava kaj sas bijande lenđe pra papurja.

4 Gajda vi o Josif teljardas andar o gav Nazaret andar e Galilejsko  
 regija, ando Vitlejem e Judejsko regija kaj sas o David bijando,\* kaj  
 o Josif sas potomko e carosko Davidesko 5 te prijavilpes palo popis  
 zajedno pire verenicasa e Marijasa savi sas khamni. 6 Dok sas ando  
 Vitlejem avili lači vrjama te bijanel. 7 Bijandas pire prvo čhaves,  
 pačardale, thaj čhutale ande jasle† kaj nas than ande gostijonica.†

### *E anđelurja navestisaren e pastirende e Isusesko bijandipe*

8 Ande godoja isto regija savi sas paše pašo Vitlejem sas e pastirja  
 save inčarenas e raćaci straža pe pašnjakurja ke pire bakhre.  
 9 Andar jekhvar o anđeo e Gospodesko ačhilo maškar lende, thaj  
 obasjaisardalen e slava e Gospodešći, a von zurale darajle. 10 A o anđeo  
 phendas lenđe: “Na daran! Kaj ake, anav tumende e bahtali nevimata  
 pe bari bah sa e themešće. 11 Kaj ađes bijandilo tumende o Spasitelj,  
 savo si o Gospod Hristo ando gav kaj bijandilo o caro David! 12 Ake o  
 znako pe savo pindžarena les: aračhena e čhavre pačarde sar pašljol  
 ande jasle.”

13 Ande data e anđelošće pridružisajli e bari vojska anđelurja thaj  
 slavinas e Devle alavenca:Š

14 “Slava e Devlešće ande nebeske visine,  
 thaj pe phuv miro e themešće save si pe lešći volja!”

† **1,78** osvanila Svetlo si često metafora palo čačipe. Akate phenelpes palo duhovno čačipe  
 savi o Spasitelj dela sago kaj si o izlasko e (khamesko) savo rasvetlisarel e phuv. Dik Mal 4,2.

Š **1,79** anel svetlo Svetlo si često sikado sago metafora palo čačipe. Akate phenelpes pale  
 duhovno čačipe savo o Spasitelj dela sago kaj inkljel o kham savo rasvetlil e phuv. Dik Mal  
 4,2. \* **1,79** drom e miroško si metafora palo način e trajosko savo anel dži ke godova te  
 e manušes avel miro e Devlesa: “trais mirno trajo” ili “te phires e dromesa savo inđarel dži  
 ko miro”.

\* **2,4** Vitlejem Vi ako sas o Vitlejem cikno gav, okote sas o caro David bijando  
 thaj sas jek proročanstvo kaj vi o Mesija avela okote bijando (Mih 5,2). † **2,7** jasle Ande  
 jasle najverovatno sas čisto thaj sas andre vareso meko thaj šuko sago e šući čar thaj gajda  
 sas meko pale beba. E životinje često inčarenas pes paše pašo čer te aven po sigurno thaj  
 te šaj loće te pravaren len. E Marija thaj o Josif sas smestime ande prostorije save koristas  
 pes pale životinje. † **2,7** nas than ande gostijonica Uzrok pale akava sas verovatno kaj but  
 o them avelas ando Vitlejem te ramonpes ande popis stanovništva. Š **2,13** Ando original  
 ramol: “e anđelošće pridružisajli e nebesko vojska”

15 Čim e anđelurja boldinepe ando nebo, e pastirja phenenas jek avrešće: “Hajde džas dži ko Vitlejem, te dikhas so godova okote dogodisajlo, so phendas amende o Gospod.”

16 Sigo aviline ando than o Vitlejem thaj arakhline e Marija, thaj e Josife thaj e čavres savo pašljol ande jasle. 17 A kana dikhline e čavres, e pastirja phendine sa so o anđeo phendas lenđe palo čhavro. 18 A savora save ašunenas e pastiren divisajle okolešće so phenenas. 19 A e Marija pamtilas sa so phendine laće e anđelurja thaj gndilas pale godova.\* 20 Pale godova e pastirja boldinepe palpale, hvalinas thaj slavinas e Devle pale sa so dogodisajlo sago kaj vi phendas lenđe o anđeo.

21 A kana avilo o ohtoto đes sar o čhavro bijandilo, trubuine te obrezin e čavres,† thaj dine les alav Isus, sago kaj phendas o anđeo dok još e Marija či ačhili khamni.

### *O Isus thaj e Marija ando Hramo te pheren o zakono*

22 Kana navršisajle e đesa katar lengo šilaipe prema e Mojsijsko zakon inđardine e čavres ando Jerusalem te sikaven les e Gospodešće 23 (sago kaj si ramome ando zakono e Gospodesko: “Svako prvo bijando, a muško čhavo neka posvetilpe e Gospodešće”) 24 thaj den e žrtva (sago kaj phenel e Gospodesko zakon: “duj grlice ili duj terne goluburja”).

### *O Simeon dičhel e Mesija thaj prorokuil*

25 Ande godoja vrjama trailas ando Jerusalem varesavo manuš alavesa Simeon. Vo sas zurale pravedno thaj pobožno manuš. O Sveto Duho sas pe leste thaj ažučarelas te avel o Mesija te izbavil o Izrael.‡ 26 A o Sveto Duho već objavisardas lešće kaj či merela dok či dičhel e Gospodešće Mesija. 27 Potaknime katar o Sveto Duho avilo ando Hramo baš kana o dad thaj e dej anenas e čhavre e Isuse te izvršin okova so rodelas e Mojsijsko zakon. 28 O Simeon lija e čavres ande pire vas thaj hvalisarda e Devle alavenca:

29 “Akana, Gospode, šaj me čiro sluga te merav ando miro sago kaj phendan.

30 Kaj e jakha mungre dikhline o spasenje čiro,§

31 savo pripremisardan angle sa o them,

32 o svetlo\* te prosvetlil aver themen

thaj e slava čire themešći e Izraelošće.”

33 E Isusesko dad thaj lešći dej divisajle okolešće so o Simeon phenelas pale leste. 34 O Simeon askal blagoslovisardalen, thaj phendas e Isusešće dejaće e Marijaće: “O Del odredisardas pale akava čhavro te e but e manušende ando Izrael avel palo propast thaj butende palo

\* **2,19** E Marija smatrilas okova so sas phendo pale lako čhavo but dragoceno: “brižljivo thaj rado delas pes lende gođi”. † **2,21** obrezin E zakonurja save o Del dijias e Židovske vernikonende roden te obrezilpes o muško čhavro, godova sas odredime žrtva savi o dad thaj e dej e čhavrešći trubun te den (3. Mojs 12,1–4). ‡ **2,25** ažučarelas te avel o Mesija te izbavil o Izrael Ando original ramol: “ažučarelas e Izraelošći uteha”. § **2,30** spasenje čiro “Spasenje” phenel pale osoba savi anela o spasenje–o Isus–saves inčarel o Simeon: “Saves tu bičhaldan te spasilamen”. \* **2,32** o svetlo Akaja metafora značil kaj o čhavro pomožila e themešće te dičhen thaj hačaren po isto način sar o svetlo pomožisarel e themešće te dičhen.

vaskrsenje.† Vo si odredime te avel e Devlesko znako, ali o but o them odbacila les. <sup>35</sup> Akava avela sar te sikadon e gndimata save si garade ande but e ile. A vi tuće korkoraće o mačo† hvarela čiro ilo.”

*E Ana hvalil e Devles palo Mesija*

<sup>36</sup> A okote sas vi e Devlešči proročica savi akhardolas Ana, e Fanuilovešči čhej, voj sas andar e AsireskoŠ pleme thaj sas zurale purani. Trailas pire romesa samo efta brš, <sup>37</sup> a pale godova trailas korkoro sar udovica dži ke ohtovardeš thaj štar brš.\* Voj sas stalno ando Hramo, služilas e Devlešće đeseja thaj e račava, postilas thaj molilas pes. <sup>38</sup> Thaj samo so o Simeon završisardas vi voj avili, thaj hvalilas e Devles thaj phenelas palo Isus savorende save ažučarenas te o Del otkupisarel o Jerusalem.†

<sup>39</sup> Kana e Isusešči dej thaj lesko dad dine gata so sas po zakono e Gospodesko, boldinepe ande Galileja ando piro gav Nazaret. <sup>40</sup> A o čhavro barjolas thaj zuravolas, thaj pherdolas mudrosti, thaj e milost e Devlešči sas pe leste.

*E Marija thaj o Josif roden e Isuse ando Hramo*

<sup>41</sup> E Isusesko dad thaj lešči dej svako brš džanas ando Jerusalem ande đesa kana sas o prazniko Pasha. <sup>42</sup> A kana sas e Isuse dešuduj brš, von aviline Lesa ando Jerusalem te slavin o prazniko. <sup>43</sup> Kana sas gata godola đesa, thaj kana boldenas pes čhere, o čhavro Isus ačhilo ando Jerusalem, a o Josif thaj lešči dej e Marija či džangline kaj si. <sup>44</sup> Nego gndisardine kaj si e društvo angal. Kana nakhlo već jek đes phiripe počnisardine te rodenle maškar e familija thaj maškar okola kas džanenas. <sup>45</sup> Sar či arakhlinele boldinepe ando Jerusalem te roden les. <sup>46</sup> Thaj o trito đes arakhlinele ando Hramo sar bešel maškar e sikavne, thaj čholas kan lende, thaj phučlas len. <sup>47</sup> A savora save ašunenenas les divisajle lešće godaće thaj lešće odgovorende.

<sup>48</sup> Kana dikhlinele začudisajle, a lešči dej phendas lešće: “Čhaveja! Sostar čerdan amende gadava? Ake me thaj čiro dad e darasa rodam tut.”

<sup>49</sup> A o Isus phendas lenđe: “Sostar rodineman zar či džangline kaj me trubul te avav ando čer mungre Dadesko?”† <sup>50</sup> Ali von či hačardine so o Isus kamlas te phenel lenđe.

<sup>51</sup> Askal boldapes lenca ando Nazaret thaj čholas kan lende. A e dej lešči lelas sama pe sa akala dogadžurja ande piro ilo.Š <sup>52</sup> A o Isus

† **2,34** E alava “perena” thaj “vazdena pes” izrazin kana vareko boldelpes katar o Del ili te aven maj paše maj paše ko Del: “akava čhavro prouzročila te but e Izraelcurja peren katar o Del ili te aven maj paše ko Del”. † **2,35** o mačo Akaja metafora opisil e bari tuga savi e Marija hačarela: “Čiri tuga avela gajda dukhani sago kaj o mačo probisardas čiro ilo.” § **2,36** Asirsko preme sas jek katar e Jakovešće dešuduj čhave \* **2,37** ohtovardeš thaj štar brš moguće značenje si 1 voj sas udovica 84 brš ili 2 voj si udovica savi si akana purani 84 brš. † **2,38** Jerusalem Akava značil “okova savo čidela o Jerusalem” ili “vo savo anela e Devlešće blagoslovurja thaj o naklonost palpale ando Jerusalem” (dik Is 52,9). † **2,49** Zar či džangline kaj me trubul te avav ando čer mungre Dadesko? Lesko dad thaj lešči dej trubuline te džanen e svrha savjava bičhaldales lesko Dad. Kana sas les 12 brš o Isus već džanelas, kaj si o Čhavo e Devlesko, (a na e Josifesko e Marijaće romesko). § **2,51** lelas sama pe sa akala dogadžurja ande piro ilo Pale sa so e Marija ašundas, sago kaj si o blago savo voj brižljivo lelas sama thaj vrednujilas: “brižljivo delas pes godi ke sa akala dogadžaja”.

napreduilas ando mudrost thaj barjolas\* ande milost anglo Del thaj anglo them.†

### 3

*O Jovano savo bolelas lačharelas o drom palo Isus*

*(Mt 3,1–12; Mk 1,2–8; Jn 1,19–28)*

<sup>1</sup> Sas dešupandžto brš sar vladilas o caro Tiberija e rimske carstvosa,\* o Pontije Pilato vladilas e Judejava, o Irod vladilas e Galilejava, a lesko phral o Filip vladilas ande Itureja thaj ande Trahonitada, o Lisanije vladilas ande Avilina,† <sup>2</sup> o Ana thaj o Kajafa sas e šorvale rašaja,‡ a o Del askal objavisardas piro alav e Jovanošće e Zaharijašće čhavešće ande pustinja. <sup>3</sup> Thaj o Jovano askal nakhlas e sasti okolina oko e Reka e Jordanošći thaj propovedilas e themešće kaj e manuša trubun te obratinpes e Devlešće te jartol lenđe bezeha thaj te bolen pes. <sup>4</sup> Sago kaj ramosardas o proroko Isaija, o Jovano sas: “O glaso savo čholas muj ande pustinja:

‘Lačharen o drom palo Gospod,

Poravnisaren e staze pale leste!§

<sup>5</sup> Neka svako dolina pherdol

a svako gora neka slegnilpes!

Sa e bande droma neka ispravin pes

thaj e grbave droma postanina ravne.\*

<sup>6</sup> Thaj svako manuš dičhela o spasenje savo avel katar o Del.’”

<sup>7</sup> O Jovano phenelas okolendě save avenas te bolelen: “Tumen e sapengo leglo!† Ko phendas tumendě kaj šaj te našen angle bari holji e Devlešći savi avel?‡ <sup>8</sup> Sikaven tumare trajosa thaj tumare delenca kaj odvoisajle katar o bezah thaj kaj obratisajle e Devlešće.§ Na hohaven

\* **2,52** napreduilas ando mudrost thaj barjolas ande milost “Postoilas maj mudro thaj maj snažno.” Akava phenelpes kaj mentalno thaj fizički barjolas. † **2,52** ande milost anglo Del thaj anglo them Akava phenel palo duhovno thaj društveno baripe. Akava šaj izrazisajlosas: “O Del blagoslovilas les sa majbut thaj majbut, a o them volilas les sa majbut thaj majbut.”

\* **3,1** pe amaro kalendari godova avilosas ande 27 ili 28 brš † **3,1** o Irod, Filip thaj o Lizanije sas “tetrarsi”. Izraz “tetrarh” odnosilpe pe e vladako dužnosniko savo vladilas ječe delosa ando Rimsko carstvo. Svako tetrarh sas talo autoriteto e rimske carosko. O carstvo e Herodesko e “Baresko”, savo sas caro pale vrjama kana o Isus bijandilo, sas podelime pe štar delurja nakon lesko smрто, a godole delenca vladinas lešće čhave sago “tetrarsi” ili “vladarja štare opašinaće”. Svako deo sas len jek ili majbut cikne delurja save akhardonas provincije, sago kaj sas e Galileja thaj e samarija. ‡ **3,2** o Ana thaj o Kajafa sas e šorvale rašaja Ili “dok o Ana thaj o Kajafa zajedno služinas sago e bare rašaja.” O Ana sas o baro rašaj, a e židovurja nastavisardine les kasave te pindžaren čak vi nakon so e Rimnjanurja postanisardine lešće džamutre, e Kajafa, te zameniles sago o baro rašaj.

§ **3,4** E manuša kava ćeren gajda te pokainpes pale pire bezeha: “Pripremin tumen te čhon kan e Gospodešći poruka kana avela” ili “Pokaintumen thaj aven spremne te avel o Gospod.” \* **3,5** Kane e manuša lačharen o drom palo caro savo avel, askal snizin e grbave thana thaj pheren e hvja ando drom te avel ravno. Akava sas deo metafora savi započnisardas ande prethodno stiho. † **3,7** sapengo leglo! Phenel kaj si bilače manuša ‡ **3,7** O Jovano prekorilas e theme zato kaj rodenas te vo bolel len sar o Del či kaznisardasas len, ali či kamline te či majbut grešisaren: “Naštik gajda našen katar e Devlesko gnjevo samo gajda kaj avena bolde”. § **3,8** Ando original ramol: “bijanena plodurja save si dostojne palo jartipe.” Ande akaja metafora o ponašanje e manušesko usporedilpes e plodosa. Sago kaj katar e biljka ažućarelpes kaj dela plodo savo si primereno pale akaja vrsta e biljkaći, katar o manuš savo phenel kaj pokaisajlo očekuilpes te trail sago kaj o Del naredisarel.

tumen kaj si tumenđe dosta te phenen: ‘Amen sam e Avraamešće potomkurja,\* kaj phenav tumenđe kaj o Del šaj vi katar akala bara te vazdel čhavra e Avraamešće.’† 9 Kaj o tover e Devlešće sudosko več si čhutino po koreno‡ e kaštesko. Svako kaš savo či bijanel lače plodurja činelapes thaj čhudela pes ando bov.

10 Askal o them phučlales: “So askal te ćeras?”

11 A o Jovano phendas lenđe: “Kas si duj gada neka del jek okole kas naj. Thaj kas si habe neka del okoles kas naj.”

12 Aviline vi e carinikurja te o Jovane bolelen, thaj phendine lešće: “Sikamneja, so amen te ćeras?”

13 A o Jovane phendas lenđe: “Na roden majbut porezo nego so odredil tumenđe e vlast.”

14 E vojnukurja isto phučline: “A amen so te ćeras?”

A vo phendas lenđe: “Khonikastar na len e love pe sila, na optužisaren khonikas hohamneš thaj aven zadovoljno tumare počinava.”

15 Ande godoja vrjama o them ažučarelas e Mesija thaj savora ande pire ile phučenias pes te naj možda o Jovano Mesija. 16 Zato o Jovano phendas savorende: “Me bolava tumen e pajesa, ali avel vareko pale mande ko si majzuralo mandar, kašće me najsem dostojno ni e haravlja pe sandale te putrav.\* Vo bolela tumen e Sveto Duhosa thaj e jagasa.† 17 Šilavela piro gumno‡ thaj odvoila o điv katar e pleva; o điv čidela ande piro skladište, a e pleva dela jag e bare jagasa savi phabola večno.”§ 18 Thaj but kasave opomene o Jovano phendas e themešće thaj navestilas lenđe e bahtali nevimata.

19 A o Irod o vladari kas o Jovano ukorisarda zato kaj o Irod lijas e Irodijada, e romnja pire phralešće,\* thaj pale sa aver bilačhimata save ćerda o Irod, 20 pale sa godova još vi e Jovane čhuda ande tamnica.

### *O Jovano bolel e Isuse*

*(Mt 3,13–17; Mk 1,9–11)*

21 Kana o Jovano bolelas sa e themes, bolaspe vi o Isus. Dok o Isus molisajlo, putajlo o nebo, 22 thaj fuljisto pe leste o Duho Sveto ande

\* **3,8** “Amen sam e Avraamešće potomkurja thaj o Del či kaznila amen.” † **3,8** O Jovano akate kamel te phenel kaj godova kaj si e Avramešće čhave či spasilalen, kaj o Del šaj vi katar khanči vazdel e Avramešće potomkurja. ‡ **3,9** O tover si metafora pale kazna savi uskoro započnila: “O Del si sago o manuš savo čhol o tover po koreno e kaštesko” § **3,14** na optužisaren khonikas hohamne ili “na optužin khonikas hohamne te dobisardinesas love lendar.” \* **3,16** e haravlja pe sandale te putrav Te putren e haravlja ili e sandale pe varekašće pungre sa e dužnost e robošće. O Jovano phendas kaj si o kova savo avel si gači uzvisime kaj o Jovano naj dostojno ni lesko robo te avel. † **3,16** e jagasa si metafora savi prestavil sago šilaipe katar e bezeha ‡ **3,17** gumno si than kaj čidelas pes o điv te odvoilpes katar e pleva. E vilenca o điv čhudelas pes ando vazduh, e pleva indarelas e bavlal a e kućin e đivešći perelas pe phuv kaj sas majpharo. § **3,17** O Jovano phenel palo Hristo savo avel te sudil sago kaj si vo zemljoradniko savo odvoil e kućina e đivešće katar e pleva: “Vo inćarel e vile ande vas kaj si o điv spremno” ili “Vo si spremno te sudil sago kaj si o zemljoradniko spremno te ćinel o điv”. \* **3,19** kaj o Irod lijas e Irodijada, e romnja pire phralešće Irod Antipas rastavisajlo katar piri prvo romnji thaj lija romnjaće pire familija e Irodijada, savi sas vi romnji lešće phralešći e Filipešći (dik Mt 14,3; Mk 6,17). E Mojsijsesko zakono ando 3. Mojs 18,16; 20,21 zabranisardas e manušesće te lel pešće pale romnji pire phralešće romnja dok si godova phral još džudo.

telesno obliko sago golubo, thaj andar o nebo ašundilo o glaso savo phendas: “Tu san mungro voljeno Čhavo. Tu san mungri bah!”

*E Isusesko poreklo*

*(Mt 1,1–17)*

<sup>23</sup> Kana o Isus započnisardas e javno služba katar o Del sas les varekaj katar trjanda brš. Incarelaspe kaj si o Isus čhavo e Josifesko.

O Josif sas e Ilijesko čhavo,

<sup>24</sup> o Ilija sas e Matatesko čhavo,

a o Matat e Levijesko čhavo,

o Levije sas e Melhijesko čhavo,

o Melhi sas e Janajesko čhavo,

o Janaj e Josifesko čhavo,

<sup>25</sup> o Josif sas e Matatesko čhavo,

o Matatija sas e Amosesko čhavo,

o Amos sas e Naumasko čhavo,

o Naum sas e Esljiesko čhavo,

o Eslija sas e Nangejesko čhavo,

<sup>26</sup> o Nangej sas e Maatesko čhavo,

o Maat sas e Matatijesko čhavo,

o Matatija sas e Semeinasko čhavo,

o Semein sas e Josihesko čhavo,

o Josih sas e Jodasko čhavo,

<sup>27</sup> o Joda sas e Joananesko čhavo,

o Joanan sas e Risasko čhavo,

o Risa sas e Zorovavelesko čhavo,

o Zorovavel sas e Salatiilesko čhavo,

o Salatiil sas e Nirijasko čhavo,

<sup>28</sup> o Niri sas e Melhijasko čhavo,

o Melhi sas e Adijasko čhavo,

o Adi sas e Kosamesko čhavo,

o Kosam sas e Elmadamesko čhavo,

o Elmadam sas e Iresko čhavo,

<sup>29</sup> o Ir sas e Isusesko čhavo,

o Isus sas e Eliezeresko čhavo,

o Eliezer sas e Jorimesko čhavo,

Jorim sas e Matatesko čhavo,

o Matat sas e Levijesko čhavo,

<sup>30</sup> o Levije sas e Simeonesko čhavo,

o Simeon sas e Judasko čhavo,

o Juda sas e Josifesko čhavo,

o Josif sas e Jonamesko čhavo,

o Jonam sas e Eliakimesko čhavo,

<sup>31</sup> o Eliakim sas e Melejasko čhavo,

o Meleja sas e Menasko čhavo,

o Mena sas e Matatesko čhavo,

o Matata sas e Natanesko čhavo,

o Natan sas e Davidesko čhavo,

<sup>32</sup> o David sas e Jesejesko čhavo,

o Jesej sas e Jovidesko čhavo,

o Jovid sas e Voozesko čhavo,

o Vooz sas e Salmonesko čhavo,  
 o Salmon sas e Naasonesko čhavo,  
<sup>33</sup> o Naason sas e Aminadavesko čhavo,  
 o Aminadav sas e Adminesko čhavo,  
 o Admin sas e Arnijesko čhavo,  
 o Arni† sas e Esromesko čhavo,  
 o Esrom sas e Faresesko čhavo,  
 o Fares e Judasko čhavo,  
<sup>34</sup> o Juda sas e Jakovesko čhavo,  
 o Jakov sas e Isakosko čhavo,  
 o Isak sas e Avraamesko čhavo,  
 o Avraam sas e Tarasko čhavo,  
 o Tara sas e Nahoresko čhavo,  
<sup>35</sup> o Nahor sas e Seruhesko čhavo,  
 o Seruh sas e Ragavasko čhavo,  
 o Ragav sas e Falekesko čhavo,  
 o Falek sas e Everesko čhavo,  
 o Ever sas e Salasko čhavo,  
<sup>36</sup> o Sala sas e Kainamesko čhavo,  
 o Kainam sas e Arfaksadesko čhavo,  
 o Arfaksad sas e Simesko čhavo,  
 o Sim sas e Nojesko čhavo,  
 o Noje sas e Lamehesko čhavo,  
<sup>37</sup> o Lameh sas e Matusalasko čhavo,  
 o Matasala sas e Enohesko čhavo,  
 o Enoh sas e Jaretosko čhavo,  
 o Jaret sas e Malaleilesko čhavo,  
 o Malaleil sas e Kainamesko čhavo,  
<sup>38</sup> o Kainam sas e Enosesko čhavo,  
 o Enos sas e Sitesko čhavo,  
 o Sit sas e Adamesko čhavo,  
 o Adam sas e Devlesko čhavo.

## 4

*O beng probilas e Isuse*

*(Mt 4,1–11; Mk 1,12–13)*

<sup>1</sup> O Isus, pherdo e Sveto Duhosa, boldape katar e reka Jordan, thaj indardale o Sveto Duho e pustinjava, <sup>2</sup> thaj štarvardeš đes probilasle o beng, thaj khanči či hala pale godola đesa a kana pherdile godola đesa vo bokhajlo.

<sup>3</sup> A o beng phendas lešće: “Ako san Čhavo e Devlesko, phen akale barešće te postanisarel mangro.”

<sup>4</sup> A o Isus phendas lešće: “Ando Sveto lil ačhel ramome: ‘Či trail o manuš samo katar o mangro.’” \*

<sup>5</sup> Indardale o beng pe vuči gora thaj sikadas lešće sa e carstvirja akale themešće ando treno e jakhako. <sup>6</sup> Thaj phendas lešće o beng: “Tuće dava sa akaja vlast thaj e slava lendi, kaj si mande predaime,

† **3,33** Umesto “e Adminesko čhavo, o Admin sas e Arnijesko čhavo, o Arni sas e Esromesko čhavo”, varesave grčke rukopisurja ramol same “e Avraamesko čhavo, o Aram sas e Esromesko čhavo”. \* **4,4** Ando Matej 4,4 ačhel: “Ramome kaj: ‘Či trail o manuš samo katar o mangro, nego katar svako alav savo inkljel andar e Devlesko muj.’”

thaj me šaj te davala kašće me kamav. <sup>7</sup> Ako peres pe koča angle mande thaj slavisman, avela sa ćiro.”

<sup>8</sup> A o Isus phendas lešće: “Ando Sveto lil ačhel ramome: ‘De koča thaj slavisar samo e Gospode ćire Devles, thaj jedino lešće služisar.’”

<sup>9</sup> Thaj o beng inđardale ando Jerusalem, thaj čhutale po vrho e Hramosko, thaj phendas lešće: “Ako san Čhavo e Devlesko, huti katar tele, <sup>10</sup> kaj ando Sveto lil ačhel ramome: ‘Pale tute kaj pire anđelende zapovedila te len sama pe tute.’

<sup>11</sup> thaj: ‘pe vas inđarena tut te či pećes varekaj će pungresa ando bar.’”

<sup>12</sup> A o Isus phendas lešće: “Ramome si: ‘Na probisar e Gospode e ćire Devle.’”

<sup>13</sup> Thaj kana o beng završisarda te probilasle, đelotar lestar pale varesošći vrjama.

*O Isus boldape ande galilejako krajo*

(Mt 4,12–17; Mk 1,14–15)

<sup>14</sup> O Isus boldape ande e galilejako krajo pherdo e Sveto Duhošće silava thaj o glaso pale leste buljardape pe sasto godova krajo. <sup>15</sup> Sikavelas pe lenđe sinagoge, thaj savora šukar mothonas pale leste.

*O Isus sas tradino andar o Nazaret*

(Mt 13,53–58; Mk 6,1–6)

<sup>16</sup> Thaj avilo ando gav savo akhardolas Nazaret kaj barjilo, thaj pe piro običajo ando savato dija ande sinagoga, thaj uštilo te čitilo. <sup>17</sup> Dinele e knjiga† katar o proroko Isaija, putardas e knjiga thaj arakhla o than kaj si ramome:

<sup>18</sup> “O Duho e Gospodesko si pe mande  
zato makhlas mungro šoro e uljeja‡ thaj bičhaldama,  
te anav e bahtali nevimata e čorende,  
bičhaldama te propovedisarav e phanglende kaj avena mukle,  
thaj e korende kaj dičhena,  
e zarobimende kaj avena oslobodime

<sup>19</sup> thaj te proglasisarav o brš milosti e Gospodesko”.

<sup>20</sup> Phandada e knjiga, dijala ko sluga thaj bešlo te sikavel, a savora save sas ande sinagoga dičhenas pe leste. <sup>21</sup> Thaj počnisarda te phenel lenđe: “Ađes akava Lil savo ašundine tumare kanenca pherdilo.”§

<sup>22</sup> Savora phenenas sa maj šukar pale leste, thaj divinaspe e šukar alavende kaj inkljenas andar lesko muj, thaj phenenas: “Naj li a kava o čhavo e Josifesko?”

<sup>23</sup> Askal phendas lenđe: “Tumen mande bi sumnjako mothona akaja poslovica: ‘Doktorina! Sastar korkoro tut!’ Ćer vi akate ande ćiro gav kaj barjilan so ašundam kaj ćerdan ando Kafarnaum.” <sup>24</sup> Askal ačhilo majdur te mothol: “Čačes phenav tumende: ‘Nijek proroko či lače avilo ande piro gav kaj bajrilo.’

<sup>25</sup> A čačes phenav tumende: E but udovice sas ando Izrael ande vrjama kana sas o Ilija proroko, askal o nebo phandadilo pe trin

† 4,17 knjiga Ando original ramol: “svitko”. ‡ 4,18 Akava pojmo “makhlas lesko šoro e uljeja” značil kaj o Del varekas odabirisarda pale varesoste. Pe gadžikani čhib phendasas pe “pomazanje”. § 4,21 O Isus akate objavisajlo kaj avilo sago o Mesija.

brš thaj šov čhon thaj sas bari bok pe sasti phuv e Izraelošći. <sup>26</sup> Ali niječače lendar nas bičhaldo o Ilija osim varesošče udovicače ando gav Sarepta, savo sas ande Sidonsko krajo. <sup>27</sup> Thaj but gubavcurja sas ando Izrael pale vrjama kano sas o Jelisej proroko ali ni jek lendar či sastilo nego samo o Nemanu Sirijco.”

<sup>28</sup> Thaj savora ande sinagoga zurale holjajle kana ašundine akava. <sup>29</sup> Uštile thaj tradinele avri andar o gav, thaj inđardinele po vrho e gorako kaj sas sazidome lengo gav te čhudeles opral. <sup>30</sup> Ali vo nakhlo maškar lende thaj đelotar.

*O Isus tradel e nečiste duhos*  
(Mk 1,21–28)

<sup>31</sup> Thaj avilo ando galilejsko gav savo akhardolas Kafarnaum, thaj sikavelas len savatone. <sup>32</sup> A von čudinaspe lešče naukače kaj lesko svato sas pherdo sile.

<sup>33</sup> Ande sinagoga sas varesosko manuš ande savo sas bilačo duho e bendesko, vo čhutas muj zurale glasosa: <sup>34</sup> “So kames amendar, Isuse andar o gav Nazaret? Avilan te uništis amen? Džanav tut, ko san. Tu san o Sveco e Devlesko.”

<sup>35</sup> A o Isus zapovedisardas lešče: “Phandav čiro muj thaj inklji andar leste!” O bilačo duho haradales angle savorende, inkljisto andar leste, thaj ni cara či nauidisardas lešče.

<sup>36</sup> Savora sas začudime thaj phenenas jek avrešče: “Sosko si godova svato, te e vlastosa thaj e silava zapovedisarel e bilače duhonende, thaj von inkljen avri?” <sup>37</sup> Thaj o glaso pale leste buljilo pe sa e okolne thana.

*O Isus sastarel e Simonešče sokra*  
(Mt 8,14–15; Mk 1,29–31)

<sup>38</sup> Kana inkljisto andar e sinagoga, dija ande Simonesko čher. E Simonešče sokra astardas e bari groznica, pa zamolisardine les te sastarel lat. <sup>39</sup> Vo bandilo paše late thaj zapovedisardas e groznicače te mučela thaj e groznica nestanisardas. Voj odma uštili thaj ačhili te služilen.

*O Isus sastarel e buten nasvalen*  
(Mt 8,16–17; Mk 1,32–39)

<sup>40</sup> Kana nakhlas o savatosko đes,\* sa e nasvalen katar razne nasvalimata, anenas len ko Isus, a vo pe savorende čholas pire vas, thaj von sastonas. <sup>41</sup> A vi e bilače duhurja inkljenas andar e but e manuša thaj čhonas muj thaj phenenas: “Tu san Čhavo e Devlesko!” A vo pretilas lende thaj zabranisardas lende te na čeren svato, kaj von džanenas kaj si vo o Hristo.

<sup>42</sup> A kana avilo o đes, inkljisto thaj đelotar po pusto than. A o them rodelas les, avile leste thaj kamline te ačhaven les te na džaltar lendar. <sup>43</sup> A vo phendas lende: “Vi e manušenđe andar e aver gava trubul te anav e bahtali nevimata pale Devlesko carstvo, kaj zato o Del bičhaldaman.” <sup>44</sup> Thaj nastavisarda te propovedil pe sinagoge e judejske.

\* **4,40** Ando original ramol: “A kana pelo o kham”

## 5

*O Isus akharel e sikavnen te sledinle*  
(Mt 4,18–22; Mk 1,16–20)

<sup>1</sup> Jekhvar kana o Isus ačhelas pe obala ko galilejako jezero,\* o them spidelaspe pe leste te ašunen o alav e Devlesko. <sup>2</sup> O Isus lija sama e duj čamcurija kaj ačhenas pe obala, andar save inkljistine e ribarja thaj halavenas pire mreže. <sup>3</sup> Thaj dija ande jek katar o čamco savo sas e Simoneško, thaj zamolisardas les te spiden les cara majdur katar e obala. Bešlo andre thaj počnisardas te sikavel e theme andar o čamco.

<sup>4</sup> A kana o Isus ačhilo te ćerel svato e themešće, phendas e Simonešće: “Otplovisar okote kaj si handuk o paj, thaj čhude e mreže ćire thaj astar e mačhen.” <sup>5</sup> A o Simon phendas lešće: “Sikavneja! Sasti rjat trudisajlam, thaj khanči či astardam, ali ako tu gajda phenes, čhudava e mreže.” <sup>6</sup> Kana ćerdine godova, astardine but mačhe, gaći kaj pharjonas e mreže lenđe. <sup>7</sup> Dine znako pire drugarenđe ando aver čamco te aven te pomožin len. Kana von aviline, pherdine e liduj čamcurija gajda kaj gata potonisardine.

<sup>8</sup> A kana dikhlas o Simon Petar, pelo pe pire koča angle Isusešće pungre thaj phendas: “Džatar mandar, Gospode! Me sem bezehalo manuš.” <sup>9</sup> Thaj sas ando čudo o Petar thaj savora save sas lesa zbog e bute e mačhe kaj astardine. <sup>10</sup> A gajda vi o Jakov thaj o Jovano sas ando čudo. Von sas e čhave e Zevedeješće thaj e drugarja e Simonešće. A o Isus phendas e Simonešće: “Na dara. Katar akana e manušen astarena.”†

<sup>11</sup> Thaj crdine e čamcurja pe phuv, mukline sa, thaj teljardine pale leste.

*O Isus sastarel e manuše katar e guba*  
(Mt 8,1–4; Mk 1,40–45)

<sup>12</sup> Kana sas o Isus ande jek gav, dijas pe jek manuš savo sas sa ande guba. Dikhla e Isuse thaj pelo angle leste e mujesa pe phuv, thaj zamolisardale: “Gospode! Te kames šaj te sastaresman katar e guba.”

<sup>13</sup> Vo čhuta po vas pe leste, thaj phendas: “Kamav, av sastol!” Thaj e guba odma peli lestar. <sup>14</sup> A o Isus zapovedisardas lešće na phen khonikašće, nego dža thaj sikav tu e rašaješće, thaj prinesisar ćiri žrtva palo ćiro sastipe, sar zapovedisardas o Mojsije. Godova avela sago dokazo e manušenđe.

<sup>15</sup> O glaso pale leste još majbut buljolas, thaj o but o them ćidelaspe te ašunen les thaj te sastarel len katar lenđe nasvalimata. <sup>16</sup> A vo đelotar ande pustinja te molilpe e Devlešće.

*E Isuse si vlast te jartosarel e bezeha*  
(Mt 9,1–8; Mk 2,1–12)

<sup>17</sup> Jek đes dok o Isus sikavelas, bešenas lesa e fariseja thaj e sikavne e Mojsiješće zakonestar save aviline andar sa e gava galilejske thaj e judejske thaj andar o Jerusalem, a e sila e Gospodešći sas lesa te sastarel e nasvalen. <sup>18</sup> Askal aviline varešošće manuša save inđarenas pe nosilje e manušes savo sas lino.‡ Kamline te anenle andre thaj te

\* 5,1 Genisaretsko jezero si aver alav palo Galilejako jezero. † 5,10 Katar akana e manušen lovisareja. O Isus akate phendas e Petrešće kaj katar akana inđareja o alav e Devlesko e manušenđe. ‡ 5,18 O manuš savo naštik phirelas.

čhonle anglo Isus. <sup>19</sup> Kana zbog o but o them naštik dine lesa andre, linepe po krovo e čheresko thaj kroz o krovo muklinele tele zajedno e nosiljasa maškare anglo Isus.

<sup>20</sup> A vo kana dikhla o pačipe lengo, phendas lešće: “Manušėja, jartime si tuće čire bezeha.”

<sup>21</sup> E fariseja thaj e sikavne e Mojsiješće zakonestar počnisardine te gndisaren thaj ande peste te phenen: “Ko si akava kaj hulil po Del? Ko šaj te jartosarel e bezeha osim o Del?”

<sup>22</sup> A o Isus džangla lenđe gndimata, thaj phendas lenđe: “Sostar gajda gndin ande tumare ile? <sup>23</sup> So si maj loće te phenelpe: ‘Jartime si tuće će bezeha’ ili te phenelpe: ‘Ušti thaj phir’?Š <sup>24</sup> Nego te džanen kaj e Čhave e Manušesće si vlast pe phuv te jartosarel e bezeha...” Askal phendas e linešće: “Tuće phenav: ‘Ušti, le čire nosilje thaj džatar tuće čhere!’”

<sup>25</sup> Vo odma uštilo angle lenđe, thaj lija pe soste pašljolas, thaj đelotar pire čherešće thaj hvalilas e Devle. <sup>26</sup> Savora sas ando čudo, slavinas e Devle, thaj pherde dar phenenas: “Čudurja ađes dikhlam!”

*O Isus akharel e Levije (Mateje)*

*(Mt 9,9–13; Mk 2,13–17)*

<sup>27</sup> Pale godova o Isus inkljisto, thaj dikhla e cariniko\* savo bučholas Levije kaj bešel pe carina, thaj phendas lešće: “Av pale mande.” <sup>28</sup> O Levije mukla sa, uštilo thaj teljarda pale leste.

<sup>29</sup> Pale godova o Levije čerdas lešće ande piro čer bari gozba. Leja pale sinija bešenas but carinikurja thaj vi aver manuša. <sup>30</sup> Askal e fariseja thaj lenđe sikavne e Mojsiješće zakonestar počnisardine te mrmljan pe leste thaj phendine lešće učenikonende: “Sostar han thaj pijen e carinikonenca thaj e bezehalenca?”†

<sup>31</sup> A o Isus phendas lenđe akaja izreka: “ ‘Či trubun e saste manuša e doktore nego e nasvale’. <sup>32</sup> Gajda vi me či avilem te akharav e pravednikonen, nego e bezehalen te bolden pes katar lenđe bezeha ko Del.”

*E Isuse phučen palo posto*

*(Mt 9,14–17; Mk 2,18–22)*

<sup>33</sup> Von askal phendine lešće: “Sostar e Jovanošće učenikurja često postin thaj molinpe, isto gajda vi e farisejende učenikurija, a čire či postin nego han thaj pijen?”

<sup>34</sup> A o Isus phendas lenđe: “Dali šaj traden e svaturja te postin kana si o džamutro lenca? <sup>35</sup> Nego avela o đes kana lena lendar e džamutre, thaj askal postina ande godola đesa.”

<sup>36</sup> O Isus phendas lenđe još jek paramiči ande slike: “Khonik či čhinel e kotor katar o nevo gad te suveles pe purano gad. Ako godova čerel, o nevo gad čhindola, a e purane gadešće či ačhela o kotor katar o nevo gad. <sup>37</sup> Khonik či čhol e nevi mol ande purani morčači trasta, kaj e

Š 5,23 Maj loće si te phenelpe “Jartime si tuće čire bezeha” zato kaj godova jartime e bezeha naštik te dičhenpe. \* 5,27 E židovurja mrzanas e poreznikonen kaj sas e poreznikurja židovurja save postanisardine izdaice gajda kaj sas len suradnja e Rimnjanenca save okupirisardine o Izrael. Godola poreznikurja sas neposlušne thaj čordine e love e Izraelconende. † 5,30 E fariseja phenenas pale sa okola save či incarenas e Mojsijesko zakono kaj si bezehale.

nevi mol pharavela e trasta, thaj e mol čhordola, a e morčhaći trasta propadnila.† 38 Nego e nevi mol ande nevi morčhaći trasta trubul te čholpe. 39 Thaj khonik ko pijel e purani mol, čikamel e nevi, kaj phenel e purani mol si majlačhi.”§

## 6

*O Čhavo o Manušesko si majbaro katar o savato*

*(Mt 12,1–8; Mk 2,23–28)*

1 Jek savato, kana o Isus načhelas maškar e njive, lešće učenikurija trgonas o điv e vastenca thaj hanas.\* 2 A varesave katar e fariseja phendine lenđe: “Sostar ćeren okova so naj muklino te ćerelpe ande e Mojsijesko zakono savatone?”†

3 A o Isus phendas lenđe: “Zar či ćitosardine ando Sveto Lil okova so ćerda o David kana bokhajlo, vo thaj okola kaj sas lesa? 4 Kana dija ando ćher e Devlesko, thaj lijas e mangre save sas posvetime, hala thaj dija vi okolende save džanas pale leste. A khonik prema e Mojsijesko zakono či tromalas te hal e mangredar osim e rašaja.” 5 Thaj phendas lenđe: “Isto gajda, o Čhavo e Manušesko majbaro si vi katar o savato.”

*O Isus sastarel savatone*

*(Mt 12,9–14; Mk 3,1–6)*

6 A jek aver savato o Isus dija ande sinagoga thaj sikavelas, a okote sas o manuš savesko desno vas sas šuko. 7 E fariseja thaj e sikavne e Mojsiješće zakonestar incarenas pe jakha pe leste te dićhen dali sastarela ando savato te došaren les. 8 A vo džanglas e gndimata lenđe, thaj phendas e manušesće e šuće vastesa: “Ušti thaj ač maškaral.” A vo uštilo thaj ačhilo maškaral.

9 A o Isus phendas lenđe: Te phučav tumen: “So si muklino savatosa te ćerelpe, lačhipe ili bilačhipe? Te spasilpes o trajo ili te hasarelpe?” A von samo ačhenas. 10 A o Isus dikhlas pe lende savorende thaj phendas e manušesće e šuće vastesa: “Inzar ćo vas.” A vo ćerda gajda thaj o vas lesko sastilo thaj sasto sago vi aver. 11 Akala e fariseja thaj e sikavne e Mojsiješće zakonestar holjajle thaj ćerdine svato maškar pende so te ćeren e Isuseja.

*O Isus akharel e apostolen*

*(Mt 10,1–4; Mk 3,13–19)*

12 Ande godoja vrjama o Isus đelo pe gora te molilpe. Okote ačhilo sasti rjat thaj molilas pe e Devlešće. 13 Thaj kana avilo o đes, akhardas pire e učenikonen, thaj losarda maškarlende e dešudujen, thaj akhardalen apostolurja a lenđe alava sas:

14 O Simon (saves o Isus dija alav Petar), thaj o Andrija (e Petresko phral),

† 5,37 Kana e drak delas vras te ćerdol e nevi mol askal buljolas e trasta, thaj pharadas e purane morčhani trasta kaj von majbut našti buljonas. § 5,39 Akaja metafora (paramiči) značil ili sikavel razlika katar o purano sikavipe e vjerske vođengo e neve Isusešće sikavipeja. Poenta si e manuša save sićile po purano sikavipe, von čikamen e Isusesko nevo sikavipe.

\* 6,1 Ande godoja vrjama ande Mojsijesko zakono, ako dromesa trgosardanas vareso samo gaći te has godova či značilas kaj čhores (dik 5. Mojs 23,25). † 6,2 E Fariseja smatrinas vi e majčikni bući savi ćerelas pe savatone kaj si nezakonito gajda vi akava so ćerenas e učenikurija–morenas o điv palmenca thaj hanas.

o Jakov thaj  
 o Jovan,  
 o Filip thaj  
 o Vartolomej,  
<sup>15</sup> o Matej thaj  
 o Toma,  
 o Jakov (savo sas čhavo e Alfejevesko) thaj  
 o Simon (savo sas pobunjeniko),  
<sup>16</sup> o Juda (čhavo e Jakovesko), thaj  
 o Juda (andar o gav Iskariot, savo izdaisardale).

*Blago okolenđe save pouzdinpe ando Del*  
 (Mt 4,23–5,12)

<sup>17</sup> Pale godova o Isus fuljisto lenca tele thaj ačhile po ravno than. Okote sas baro brojo lešće učenikurija thaj o silno them andar o krajo e judejako, andar o Jerusalimo, andar o Tiro thaj andar o Sidon e gava po more. <sup>18</sup> Von aviline te ašunenles thaj te sastarelen katar lenđe nasvalimata, a avenas vi okola saven mučinas e bilačhe duhurja, thaj o Isus oslobodilas len. <sup>19</sup> Thaj sa o them rodela te čhon pe vas pe leste, kaj andar leste inkljelas e sila thaj von sa sastonas.

<sup>20</sup> Vo dikhla pe pire učenikurija thaj phendas:

- “Blago tumenđe save sen čore,  
 kaj si tumaro o carstvo e Devlesko.  
<sup>21</sup> Blago tumenđe save sen akana bokhale,  
 kaj čaljona.  
 Blago tumenđe save akana roven,  
 kaj asana.  
<sup>22</sup> Blago tumenđe kana e manuša mrzana tumen,  
 kana odbacina tumen, kana ladžarena tumen,  
 thaj kana phenena pale tumende kaj sen bilačhe,  
 zbog godova kaj sledin e Čhaves e Manušesće!  
<sup>23</sup> Aven bahtale ande godola đesa thaj čhelen, kaj dik, bari si tumari počin ando nebo. Kaj sa godova bilačhipe isto gajda amaro them čerelas amare prorokonende ande lenđe vrjama.  
<sup>24</sup> Ali teško tumenđe save sen akana barvale,  
 kaj već primisardine e uteha tumari.  
<sup>25</sup> Teško tumenđe kaj sen akana čaljarde,  
 kaj bokhavona.  
 Teško tumenđe kaj asan akana,  
 kaj rovena thaj tuguina.  
<sup>26</sup> Teško tumenđe kana savora lačhe mothona pale tumende,  
 kaj isto gajda amaro them čerelas amare hohamne prorokonende  
 ande lenđe vrjama.”

*Aven bare ileja okolenđe save mrzan tumen*  
 (Mt 5,38–48; 7,12)

<sup>27</sup> “Ali tumenđe save ašunen phenav: Volin tumare dušmajen! Čeran lačhipe okolenđe save mrzan tumen! <sup>28</sup> Blagoslovin okolen kaj dentumen romaja! Molin tumen e Devlešće pale okola save vreden tumen. <sup>29</sup> Ako vareko pečel tut pe jek rig e muješči, bolde lešće vi aver rig. Ako vareko lijas čiro ogrtači, deles vi čiro gad. <sup>30</sup> Ko mandel tutar,

deles. A okolestar kaj otmil čiro na rode palpale. <sup>31</sup> Thaj askal, sar kaman te čeren e manuša tumenđe, gajda čeren vi tumen lenđe.

<sup>32</sup> Thaj ako volin samo okolen kaj tumen volin, sošči avela tumari počin? Kaj vi e bezehale† volin samo okolen save len volin. <sup>33</sup> Thaj ako čeren lačhipe samo okolende kaj tumenđe čeren lače, sošči avela tumari počin? Kaj vi e bezehale čeren gajda. <sup>34</sup> Thaj te den udžile samo okolen katar save ažučaren te bolden tumenđe, sošči avela tumari počin? Kaj vi e bezehale den e bezehalen udžile te šaj palem dobin palpale. §

<sup>35</sup> Volin tumare dušmajen, čeren lenđe lačhipe, den len udžile thaj na ažučaren khanči te bolden tumenđe. Ako čeren gajda, avela bari tumari počin, thaj avena čhave\* e Majbarešče, † kaj si vo lačo čak vi okolende kaj si nezahvalne thaj vi e bilačhende. <sup>36</sup> Aven dakle bare ileja sago kaj si vi tumaro nebesko Dad bare ileja.”

*O Isus sikavel te na avas licemerne*  
(Mt 7,1–5)

<sup>37</sup> Na sudisaren, thaj či sudilape tumenđe. Na osudisaren thaj či avena osudime. Jartosaren thaj jartolape tumenđe. <sup>38</sup> Den, thaj dela pe tumenđe. Čhordola pe tumenđe ande angalja† lači mera, nabime, čhinosardi thaj preobilno kaj sošče merava merisaren kasavijava vi tumenđe merilape. §

<sup>39</sup> Thaj phendas lenđe akaja paramiči ande slike: “Dali šaj o koro e kore te vodil? Či li perena liduj ande hv? <sup>40</sup> Naj o učeniko majbaro katar piro sikavno. Svako savo si sikado dži ko krajo, avela sago vi o sikavno lesko.\*

<sup>41</sup> Sostar dičhes e kaštešči prušuk ande jak čire phralešči, kana či hačares o baro kaš ande čiri jak? <sup>42</sup> Sar šaj phenes čire phralešče: ‘Phrala, ažučar te inkalav e kaštešči prušuk savo si ande čiri jak’, kana ni korkoro či hačares o baro kaš ande čiri jak? Licemernona! Maj sigo inkal o baro kaš andar čiri jak, thaj majlače dičeja e kaštešči prušuk te inkales andar čire phralešči jak.”

*Sova si pherdo ilo godova inkljel po muj*  
(Mt 7,17–20; 12,34–35)

† **6,32** Varekana o alav bezehale koristinas e verske vođe (e manuša sago e fariseja thaj e rašaja) pale manuša save či incarenas o zakon gajda sago kaj e fariseja gndisardine kaj trubun. Također koristilaspe pale manuša save smatrinaspale maj bare bezehale katar aver manuša.

Naprimen, bezehalen smatrinaspale e fariseja e poreznikonen thaj e bludnikonen. § **6,34** E bezehale čeren usluga samo o kole manušen pale save džanenas kaj šaj boldena lenđe kana lenđe trubula.

\* **6,35** avena čhave e Majbarešče značil te aveltumen e Devlešče osobine (sago kaj si: ljubav, blagost, lačhipe, vernost, krotkost, suzdržljivost; dik Gal 5,22–23) thaj o ponašanje slično sago e Devlesko. † **6,35** Majbarešče si o naziv palo Del thaj phenelpe pale e Devlešči veličina thaj lesko autoriteto. Značenje akale alavesko si slično sago o značenje “Svevišnjo” ili “Maj baro biće savo si po vrho” ili “O Del savo si majbaro katar sa”. čhave e Majbarešče značil “čhave e Devlešče savo si Majbaro”. Postoil samo jek Del.

† **6,38** Okova savo čidel o zrno čerdasas trjastica ili čholas ande piro keceljko thaj indarelas les ande angalja čhere. § **6,38** Sago o trgovco e bare ileja savo trguil e đivesa nabijil o điv ando gono thaj

čhinol les thaj čhol andre gači te prelivilpes, gajda o Del velikodušno dela tumen. \* **6,40** O manuš moraš te avel oprezno kana odabirisarel pire sikavne, kaj postanila sago lesko sikavno. Ako o sikavno pogrešno sikavel (kaj si duhovno koro), avela zavedime vi o učeniko.

<sup>43</sup> Lačo kaš či bijanel bilače plodurja, thaj bilačo kaš či bijanel lače plodurja. <sup>44</sup> Kaj svako kaš pe piro plodo pindžarelpe. E smokva thaj e drak či kušenpe katar e kangre. <sup>45</sup> Lačo manuš, andar e lači riznica pire ilešči inkalel lačhipe, a o bilačo manuš andar o sefo bilače ilešči inkalel o bilačhipe, kaj andar o muj inkljel sova si pherdo o ilo.

*O gođaver si paćivalo e Isusešće alavende*  
(Mt 7,24–27)

<sup>46</sup> “Sostar akharen man: ‘Gospode! Gospode!’ A naj sen paćivale okolešće so phenav tumende? <sup>47</sup> Sikavava tumende pe kaste anel svako savo avel mande, ašunel mungre alava thaj si paćavilo mungre alavende: <sup>48</sup> Slično si sago o manuš savo gajda čerel o čher: hanadas handuk thaj postavisarda o temelji pe stena. Kana avili e poplava, o paj navalisarda po čher, ali naštik haradales kaj sas lače sagradime. <sup>49</sup> A kova savo ašundas mungre alava a naj paćavilo mungre alavende, vo si sago o manuš savo vazdas piro čher pe phuv bi temeljesko, pe savo navalisarda o paj, odma harada o čher, thaj katar godova čher nastanisarda bari ruševina.”

## 7

*E kapetanesko paćipe*  
(Mt 8,5–13; Jn 4,43–54)

<sup>1</sup> Kana o Isus dija gata sa godola alava anglo them, dija ando o gav Kafarnaum. <sup>2</sup> Varesavo rimsko kapetano\* sasle robo savo sas nasvalo po smrto, a vo sas lešće but drago. <sup>3</sup> A kana o kapetano ašundas palo Isus,† bičhaldas lešće e židovske starešinen,‡ thaj molisardale te avel te sastarel lešće robo. <sup>4</sup> A von aviline ko Isus thaj počnisardine ilestar te molin les avalenca: “Zaslužisarda te čeres lešće godova <sup>5</sup> kaj volil amare them, thaj vo vazdas amende e sinagoga.”

<sup>6</sup> A o Isus teljarda lenca. Thaj kana sas već paše ko čher, bičhalda o kapetano pire drugaren leste te phenen lešće: “Gospode! Na truditu, kaj najsem dostojno te des tale mungro krovo. <sup>7</sup> Zato vi či incaraman dostojno te avav angla tute, nego samo phen alav thaj sastola o sluga mungro. <sup>8</sup> Vi me sem manuš tele vlast thaj siman tale mande vojnukurja. Thaj kana phenav ječešće: ‘Dža!’, vo džaltar. Thaj kana phenav averešće: ‘Av!’, vo avel. Thaj kana phenav mungre robošće: ‘Čer godova!’, vo čerel.”\*

<sup>9</sup> A kana godova ašundas o Isus, začudisajlo e kapetanošće thaj boldape ko them savo džalas pale leste thaj phendas: “Phenav tumende: Ke nijek Izraelco či arakhlem gaći paćipe sago ke akava

\* **7,2** O kapetano si manuš savo zapovedil pe šel vojnukurja. † **7,3** O kapetano ašundas kaj o Isus sastardas e bute theme, thaj kaj si vo paše odnosno kaj boldapes ando Kafarnaum.

‡ **7,3** O Isus sas židovo a o kapetano nas, pa o kapetano gndisardas kaj o Isus maj rado uslišila e molba ako o židovo zamolisardas les. Uglavno, e židovurja thaj e rimske vojnukurja sas dušmaja. § **7,6** E židovurja či dinesas andre ando čher savo nas židovsko te na aven nećiste anglo Del.

\* **7,8** Baš sago kaj si e kapetano autoriteto te naredil e vojskaće, gajda si e Isuses autoriteto te naredisarel e nasvalimašće te nestanil.

kapetano!”† 10 A kana okola kaj sas bičhalde katar o kapetano boldinepe čhere, arakhline e robo kaj si sasto.

*O Isus vazdel andar e mule e udovicaće čhaves*

11 Pale godova o Isus teljarda ando gav savo akhardolas Nain.† Džanas pale leste e učenikuriya thaj o but o them. 12 Kana avilo paše ke gavesko vudar, dik, upravo inkalenas e mule te prahon les, e čhave jedincio pe dejaće, savi sas udovica. Lava sas o but o them andar o gav. 13 Kana dikhlala o Gospod, sažalisajlo pe late thaj phendas laće: “Na rov!” 14 Pale godova avilo ko mohto, § čhuta pire vas pe leste, thaj o kola kaj indarenas o mohto ačhiline. A vo phendas: “Čhaveja, tuće phenav: Ušti!” 15 O mulo vazdape, bešlo thaj počnisarda te čerel svato. A o Isus dijales lešće dejaće.

16 A savora zadivisajle thaj počnisardine te hvalin e Devle alavenca: “Baro proroko avilo maškar amende!”, thaj: “O Del avilo ando pomoć pire themešće!”\* 17 Thaj godova glaso pale leste buljilo pe saste Judejske krajurja thaj pe sasti okolina.

*O Isus čerel svato palo Jovano savo bolel*

*(Mt 11,2–11)*

18 E Jovanošće učenikuriya javisardine Jovanošće† sa so o Isus čerdas. A vo akhardas pe dujen učenikonen 19 thaj bičhaldalen ko Gospod te phučenle: “Da li san tu okova saves obećisardas o Del kaj trubul te avel, ili te ažućaras averes?”†

20 Kana akala duj manuša arešline leste, phendine: “O Jovano savo bolel bičhalda amen tute te phučas tut: ‘Da li san tu okova saves obećisardas o Del kaj trubul te avel, ili te ažućaras avres?’”

21 O Isus baš ande godova časo sastarelas e buten katar lenđe muke, razne nasvalimata thaj katar e bilačhe duhurja, thaj e bute korende boldas o vido. 22 A o Isus phendas lenđe: “Džan thaj phenen e Jovanošće so upravo dikhline thaj so ašundine: e kore dičhen, e bande phiren, e gubave saston, e kašuče ašunen, e mule ušten, a e čorende § propovedilpe e bahtali nevimata.\* 23 Blago okolešće savo či uvredilpe zbog mande.”

---

† 7,9 O Isus očekuisardasas te e židoven avel kasavo paćipe, ali nas len. Vo či očekuisardasas katar okola save nas židovurja te avelen kasavo paćipe, a palem akale rome sas. † 7,11 A kava si paše pašo than kaj o proroko Jelisej vazdas andar e mule e dejaće jedincio čhave, šelencu brša majsigo (dik 2. Car 4,8–37). § 7,14 mohto Ando godova vrjama, e mohte či izgledinas sago kaj si ađes, nego sas nosilja savensa indarenas e mule samo džiko limori. \* 7,16 E manuša verovatno gndisardine kaj sas o Isus baro proroko sago o Ilija ili o Jelisej, jedine duj manuša ando Purano Savezo save vazdine varekas andar e mule (1. Car 17,17–24; 2. Car 4,18–37). † 7,18 O Jovano savo bolelas sas ando phanglipe. † 7,19 E židovurja očekuinas kaj o Mesija avela caro savo avela thaj spasila len katar e rimsko vlada. Či očekuisardine te avel samo duhovno spasitelj. O Jovano pindžarelas o proročanstvo palo Mesija sago kaj phendas o Is 42,7; 61,1–2 (dik isto gajda ando Lk 4,18–19). Gajda očekuisardas te o Isus postanisarel caro, thaj te e Jovane thaj e aver pravedne manušen oslobodisarel andar o phanglipe, thaj te sudil thaj kaznil e manušen save odbacisardine e Mesija (dik okova so phendas o Jovano ando Lk 3,9, 16–17), ali khanči katar godova još či dogodisajlo. § 7,22 e čorende O Isus anelas e bahtali nevimata na samo e čorende, nego vi okolende save sas duhovno čorende (dik Mt 5,3). \* 7,22 Akala čudurja save o Isus čerelas dokazišardine kaj si vo o Mesija, sago kaj o proroko Isaija predvidisarda ando Is 29,18–19; 35,5–6; 61,1–2.

24 A kana đeletar e učenikurija e Jovanošće, o Isus počnisarda te phenel e but e themešće palo Jovano: “So inkljistine ande pustinja te dičhen? E trska, savja ljuljil e bavlal?† Na! 25 So dakle inkljistine te dičhen? Manuše savo lija pe peste barvale drže? Na! E manuša save indaren pe peste šukar drže thaj trail ando raskoš si ande carošće dvorurja. 26 So dakle inkljistine te dičhen? E proroko? Ej, me phenav tumende, vo si vi majbut katar o proroko. 27 Kaj vo si okova pale savo o Del phendas ando Sveto lil:

‘Ake me bičhalav mungre glasniko angle ćiro muj  
savo lačharela ćiro drom angle tute.’

28 Kaj phenav tumende: Nijek bijando katar e manušnji naj majbaro katar o Jovano, a o majcikno ando carstvo e Devlesko si majbaro lestar.”‡

*E mudre prihvatisaren e Isusesko thaj e Jovanosko sikavipe  
(Mt 11,12–19)*

29 Kana sa o them, thaj vi e carinikurja, save sas bolde e Jovanošće boldimasa, ašundine e Isuse sar ćerel svato, priznaisardine kaj si e Devlesko sikavipe ispravno. 30 Naprotiv e fariseja thaj e sikavne e Mojsiješće zakonestar či kamenas te bolelen o Jovano. Von odbisardine so o Del planirisarda pale lende.

31 O Isus phendas: “Kasa te usporedisarav e manušen akale naraštaješće? Kašće si slične? 32 Lenca si sago čhavrenca save či džanen sokamen bešen po sokako thaj jek avrešće čhon muj:

‘Svirosardam tumende  
a tumen či čheldine!  
Đilabadam tumende tužaljke  
a tumen či rujine!’

33 Gajda avilo o Jovano savo bolelas. Niti halas mangro niti pijelas mol, aj tumen phenen: ‘O bilačo duho si ande leste!’ 34 Avilem me, o Čhavo e Manušesko. Vi hav vi pijav, a tumen phenen: ‘Dik, o manuš halapljivo thaj matarno, drugari e carinikonengo thaj e bezehalengo.’

35 Savora save prihvatin e Develešći mudrost sikaven kaj si voj čači.”§

*O Isus šaj te jartosarel e bezeha  
(Mt 26,6–13; Mk 14,3–9; Jn 12,1–8)*

36 Varesavo farisejo zamolisarda e Isuse te hal leste. O Isus dija ande farisejsko čer thaj lijas than pale sinija.\* 37 Kana ake avili varesošći manušnji savi sas bezehali ando gav. Ašunda kaj si o Isus pale sinija ande farisejsko čer, avili thaj andas† e alabasterosko čaroro ande savo sas kuć mirisno ulje. 38 Ačhili pale lešće pungre. Počnisarda te

† 7,24 O Jovan savo bolel naj manuš savo lako predomisilipes, sago e trska savijilpe lako pomeril e bavlal. ‡ 7,28 O Jovano savo bolelas avilo te pripremil o drom palo Isus thaj pale Isusesko carstvo. Ali nakon so o Isus uspostavil piro carstvo, godova si, nakon so o Isus mulo, vaskrnisarda thaj sas vazdino ando nebo. Savora save paćan ando Isus silen blagoslovurja majbut katar o Jovano savo pripremisardas samo o drom majsigo nego so avilo o carstvo. § 7,35 Akava si e izreka savi o Isus primenisarda pe akaja situacija, verovatno te sikavelen te e mudre manuša razumin kaj či trubuine te odbacin e Isuse thaj e Jovane. \* 7,36 O običaj sas pe gozbe save sas sago akaja večera te e muškarcurja udobno pašljon pe rig dok han. † 7,37 Ande godoja vrjama sas o običaj te ćidelpes o them vi okola save naj akharde thaj te prisustvuin e gozbaće thaj te ašunen o alav, a te na han.

rovel thaj e jasvenca te thovel lešće pungre, a pire balenca te khoselen. Čumidelas len thaj mačhelas e mirisne uljeja.

<sup>39</sup> Kana godova dikhlas o farisej savo akharda les ande piro čher, gndisardas ande peste: “Kana akava avilosas proroko, džanglasas ko si thaj sošči si akaja manušnji, savi dirile, kaj si bezehali.”

<sup>40</sup> O Isus phendas lešće: “Simone, siman vareso te phenav tuće.”

A vo phendas: “Phen, sikavneja.”

<sup>41</sup> O Isus nastavisardas: “Sas varesavo manuš savo delas averenđe udžile love. Gajda sas duj džene save sas lešće udžile. Jek sas lešće udžile pandž šela rupune lovora,<sup>†</sup> a aver pandžvardeš. <sup>42</sup> Sar naštik te boldine e love save sas lešće udžile, vo jartosardas liduj dženenđe. Savo lendar majbut volilale?”

<sup>43</sup> O Simon phendas: “Gndiv kaj okova savešće si majbut jartome.” A o Isus phendas lešće: “Lače phenes.”

<sup>44</sup> Gajda boldape ke manušnji thaj phendas e Simonešće: “Dičhes akala manušnja? Dijem ande čiro čher, a tu ni paj či dijanman te thovav mungre pungre, a voj pire jasvenca thoda mungre pungre thaj pire balenca khoslalen. <sup>45</sup> Tu či ni čumidan man, a voj, sar dija andre, či ačhili te čumidel mungre pungre. <sup>46</sup> Uljeja mungro šoro či makhlan, a voj e mirisne kuč uljeja mungre pungre makhlas. <sup>47</sup> Zato, phenav tuće: ‘Voj sikadas but ljubav kaj si laće jartome e but e bezeha, a maj cara ljubav sikadas okova savo si maj cara svesno kaj si lešće jartome lešće bezeha.’”<sup>‡</sup> <sup>48</sup> A o Isus phendas e manušnjaće: “Jartome si tuće čire bezeha.”

<sup>49</sup> A kola save sas pale sinija počnisardine te mothon maškar pende: “Ko akava gndil kaj si kaj vi e bezeha jartosarel?”

<sup>50</sup> A vo phendas e manušnjaće: “Zbog čiro pačipe tu san spasime. Dža ando miro e Devlesa!”

## 8

### *E manušnja sledin e Isuse*

<sup>1</sup> Pale godova o Isus džalal andar o gav dži ko gav, thaj propovedilas thaj navestilas e bahtali nevimata katar o carstvo e Devlesko. Pale leste džanas e dešuduj apostolurja <sup>2</sup> thaj varesošće romnja saven o Isus oslobodisardas katar e bilače duhurja thaj sastarda len katar e nasvalimata: e Marija andar e Magdala, andar savi tradas eфта benga, <sup>3</sup> e Jovana e Huzašči romnji savo sas e Irodosko upravitelj, e Suzana, thaj but aver save pomožisardine e Isuse thaj e dešudujen apostolen pire lovenca thaj okoleja so saslena.

### *O Isus mothol e paramiči palo sijači*

(Mt 13,1–17; Mk 4,1–12)

<sup>†</sup> **7,41** rupune lovora Ande godova vrjama, jek rimsko denari sas sago ađes jek dnevnica.

**§ 7,44** Akava sas e osnovno odgovornost e domačinešči te pripravil o lavori e pajesa thaj o peškiri te šaj thoven pire pungre. <sup>\*</sup> **7,45** E manušnji čumidelas e Isusešće pungre mesto

lesko muj sago znako kaj but pokaisajle thaj ponizisajli. <sup>†</sup> **7,46** Akava sas o običaj kana dočekinas pe e posebne gosturja. E manušnji veoma počastisardas e Isuse godolesa kaj čerdas godova. Voj sikadas e poniznost godolesa kaj pomazisardas lešće pungre umesto lesko šoro. O Isus čhtas sago primer e Simonešće bilačo gostoljubivost sago primer nasprav okova so čerdas e manušnji pale leste. <sup>†</sup> **7,47** Ando originalno teksto ramol: “Kaj cara volil okova kašće si cara jartome.”

4 A kana cidape o but them thaj avenas andar sa e gava ko Isus, vo phendas lenđe ande paramiči: 5 “Inkljisto o sijači te sijol o seme. Dok sijolas, varesavo seme pelo po drom, thaj o them uštadale a e čiriknja aviline thaj halineles. 6 Aver pelo po bar, thaj tek so inkljisto, šučilo kaj nasle vlaga. 7 Aver palem pelo maškar e kangre, thaj e kangre tasadineles sar barjonas zajedno lesa. 8 Aver palem napokon pelo pe lači phuv, niknosarda thaj bijanda šeldrom majbut.” Phendas godova thaj čhuta muj: “Ašunen kana već situmen kan!”

*O Isus objasnisarel e paramiči palo sijači  
(Mt 13,10–23; Mk 4,10–20)*

9 E učenikurja phučlineles e Isuse so phenel godoja paramiči. 10 A vo phendas lenđe: “Tumen o Del dijas gođi te džanen e tajne e Devlešće carstvošće, a averenđe si dino samo ande paramiča, kaj ando Sveto lil ačhel ramome:

‘te vi ako dičhen  
    či primetin,  
te vi ako čhon kan  
    a či hačaren.’

11 A akaja paramiči phenel: O seme si sago o alav e Devlesko. 12 Okova seme savo pelo po drom si sago e manuša save ašunen o alav ali avel o beng thaj indarel o alav e Devlesko andar lenđe ile te na paćan thaj te či spasiņpe. 13 A okova seme savo pelo po bar godola si sago okola manuša save kana ašunen, bahtasa primin o alav, ali si sago e biljke koreno najlen. Godola varesošći vrjama paćan, a kana aven e kušnje von peren. 14 A okova seme savo pelo ande kangre si sago e manuša save ašunen o alav ali još pe lengo drom e trajošće brige tasavenlen, e barvalipeja thaj akale trajošće nasladenca thaj či anen lačo plodo. 15 Okova seme savo pelo pe lači phuv si sago e manuša save ašunen o alav thaj inčarenle ando lačo thaj plemenito ilo thaj ustraisaren dok či anen plodo.”

*Ko ašunel e Isusesko sikaibe barjola lesko duhovno haćaripe  
(Mk 4,21–25)*

16 “Khonikal kana del jag o stenka či čholes talo čaro niti talo kreveto, nego čhonles po čirako, te dičhen o svetlo okola save den andre. 17 Gajda vi sa so si garado thaj ćerdo tajno avela sikado javno thaj inkljela po videlo. 18 Len sama sar ašunen, kaj kas si haćaripe delape lešće, a kas naj haćaripe, lelape lešće vi kova so gndil kaj siles.”\*

*Ko si e Isusešći dej thaj lešće phral  
(Mt 12,46–50; Mk 3,31–35)*

19 Ko Isus aviline lešći dej thaj lešće phral,† ali katar o but o them naštik ćerdine lesa svato. 20 Vareko avilo thaj javisardas lešće: “Ćiri dej thaj ćire phral ačhen avri. Kamen te dičentu.”

\* **8,18** Jasno si andar o konteksto kaj o Isus kate phenel palo razumevanje thaj palo paćipe. Akava značil: “Kas god si razumevanje avela les dino majbut razumevanje. Kas god naj razumevanje hasarela vi okova razumevanje kaj vo gndil kaj siles”, ili: “O Del omogućila okolende save paćan čače te hačaren još majbut. O Del prouzročila te okola save či paćan ando čaćipe či hačaren ni okova cara so von gndin kaj hačaren.” † **8,19** Akava sas e Isusešće majterne phral–aver čhave e Marijaće thaj e Josifešće save sas bijande posle o Isus. Pošto e Isusesko dad si o Del, a lengo dad sas o Josif, von sas lešće opaš phral samo prekal e dej.

21 O Isus phendas lenđe: “O kolen save ašunen thaj izvršisaren o alav e Devlesko smatriv kaj si mungri dej thaj mungre phral.”

*O Isus smiril e oluja*

*(Mt 8,23–27; Mk 4,35–41)*

22 Jek đes o Isus phendas pire dešuduj učenikonenđe: “Hajde te nakhas pe koja rig e jezerošći.” O Isus thaj lešće učenikurja dine ando čamco thaj isplovisardine. 23 Dok plovinas, e Isuse lija e lindri. Ande godova muktape e oluja po jezero. E lađica počnisarda te pherelpe e pajes a von arakhlonepe ande bari briga pale piro trajo.

24 Aviline ko Isus, džungadine les thaj čutine muj: “Sikavneja, sikavneja, tasados!”

Vo džungadilo, thaj zapovedisarda e bavljaće thaj e valovenđe. Thaj e valurja smirisajle thaj nastanisarda tišina. 25 A o Isus phendas lenđe: “Kaj tumaro paćipe?”

A von ande dar thaj ando čudo phućenaspe: “Savo si akava te zapovedisarel e paješće thaj e bavljaće, a von te pokorisarenpe lešće?”

*O Isus tradel andar o manuš e bilače duhonen*

*(Mt 8,28–34; Mk 5,1–20)*

26 Askal o Isus thaj lešće učenikurja otplovisardine pe obala ke Gerase, savo si pe koja rig katar o Galilejako jezero. 27 Dok o Isus inkljelas pe obala, avilo angle leste o manuš saves sas bilače duhurja, thaj već đugo či inđarelas e drze pe peste, niti trailas ando čer nego trailas ande limorja. 28 Kana o manuš ande savo sas e bilače duhurja dikhla e Isuse, čudape angle leste thaj ande sasto glaso čuta muj: “So kames mandar, Isuse, majbare Devlešće čhaveja? Molivtut na mućisarman!” 29 (Kaj o Isus cara majsigo zapovedisardas e bilače duhošće te inkljel andar godova manuš. Kaj već but vrjama o bilačo duho inćarelas les. Vi ako majsigo e stražarja inćarenas les phangle ande lancurja trgolas e lancurja thaj o beng inđarelas les ando pusto than.)

30 O Isus pe godova phućla les: “Sar si ćiro alav?” Vo phendas: “Majbut džene sam katar jek,”<sup>†</sup> kaj ande leste dine e but bilače duhurja. 31 Thaj zamolisardine e Isuse te na naredil lenđe te džantar ando bezdan.Š

32 A okote ande gora sas bari gomila bale save čarjonas. Askal e duhurja zamolisardine e Isuse te mućelen te den ande bale. Thaj vo muklalen. 33 Askal e bilače duhurja inkljistine andar o manuš thaj dine ande bale. Thaj e bale pojurisardine niz o brego ando jezero, thaj utopisajle.

34 A kana dikhline okola kaj araćenas e balen so sas, našline thaj razglasisardine pe gava thaj okoline thana so dikhline. 35 A o them inkljisto te dićhel so sas. Avile dži ko Isus thaj dikhline e manuše andar savo inkljistine e bilače duhurja sar bešel dži ke Isusešće pungre, savo lijas pe peste e drze thaj sas gođaver, thaj darajle. 36 A okola save godova dikhline phendine averenđe, sar o Isus oslobodisardas e manuše ande savo sas e bilače duhurja. 37 Askal e Isuse zamolisarda

<sup>†</sup> **8,30** Legija Doslovno značil “zurale but.” Legija si rimsko vojno postrojba savi đinolas varekaj katar šov milje vojnikurja. Gaći sas bilače duhurja ande leste. **Š 8,31** bezdan savo si e tamnica pale beng a.

sa o them andar e gerasesko krajo te džaltar lendar kaj lijalen e bari dar. O Isus dija ando čamco thaj teljarda palpale ande Galileja.

<sup>38</sup> A o manuš andar savo o Isus tradas e bilače duhonen zamolisarda e Isuse te šaj ačhel lesa, ali o Isus muklales te džaltar alavenca: <sup>39</sup> “Boldetu čhere thaj phen sa so čerda tuće o Del.” Vo delotar thaj razglasisarda pe sasto gav so čerda lešće o Isus.

*O Isus sastarel e manušnja thaj vazdel e mule čhora*  
(Mt 9,18–26; Mk 5,22–43)

<sup>40</sup> A kana o Isus boldape palpale pe koja rig e jezerošći, maladale o them kaj željno ažučarenasle. <sup>41</sup> Thaj dik, avilo o manuš kasko alav sas Jair, savo sas jek katar e vođe ande sinagoga. Thaj pelo pe pire koča angle Isusešće pungre thaj molisardale te del ando čher lesko <sup>42</sup> kaj sas po meripe lešći jedino čhej savja sas varekaj katar dešuduj brš.

Dok o Isus džalas ande Jairesko čher oko leste ćicidelaspe sa o them katar sa e riga. <sup>43</sup> A maškar o them sas jek manušnji savi sas nasvali katar o godova kaj dešuduj brš thavdelas o rat latar. Sa so sasla dija pe doktorja thaj khonik naštik te sastarelas lat. <sup>44</sup> Nakhli palal leste thaj astardape e čoškostar katar e Isusešći haljina, thaj o rat odma ačhilo latar.

<sup>45</sup> A o Isus phendas: “Ko astardape mungre haljinatar?”

Savora počnisardine te braninpe, a o Petar phendas: “Sikavneja, o but o them ćicideltut thaj spidelpa, aj tu phučes ko astardape pale mande.”

<sup>46</sup> A o Isus phendas: “Vareko astardape pale mande namerasa. Hačardem sar e sila inkljisti andar mande thaj vareko sastilo.” <sup>47</sup> A e manušnji dikhla kaj naštik garadol, sa ande dar avili thaj čhudape pe koča angle leste thaj anglo sa o them phendas sostar astardape pale leste thaj sar odma sastili. <sup>48</sup> A vo phendas laće: “Čhejo, ćiro paćipe sastardatu. Dža ando miro!”

<sup>49</sup> Dok o Isus još ćerelas svato e romnjasa, avilo vareko andar e Jairesko čher ko Jair savo sas vođa ande sinagoga e porukasa: “Muli ćiri čhej. Na majbut mućisar e sikavne.”

<sup>50</sup> Ašunda godova o Isus thaj phendas: “Na dara! Samo paća thaj voj traila!”

<sup>51</sup> O Isus dija ando čher, a avren khonikas či mukla te den lesa andre osim e Petre, e Jovane, e Jakove thaj e čhoraće dade thaj laće deja. <sup>52</sup> A savora save sas ando čher rovenas thaj žalinas pale čhori. A o Isus phendas lenđe: “Naroven! Či muli, nego samo sovel!”\*

<sup>53</sup> A von asanas lestar kaj džangline kaj muli. <sup>54</sup> O Isus astardala palo vas thaj čhuta muj: “Čhoriye, ušti!” <sup>55</sup> Thaj lako duho boldape ande late thaj voj odma uštili, a vo naredisardas te denla te hal. <sup>56</sup> A lako dad thaj laći dej čudisajle, a vo zapovedisarda lenđe te na phenen khonikašće so sas.

## 9

*O Isus bičhalel e dešuduj apostolen*  
(Mt 10,9–14; Mk 6,7–13)

\* **8,52** O Isus džanglas kaj si e čhori muli. Phendas kaj sovel kaj džanglas kaj uskoro uskrsnila lat katar e mule. O Isus isto upotrebisardas o alav “sovel” sar ćerdasas svato pale Lazaresko smrto (Jov 11,11–14), aver osobaće savja uskrnisardas katar e mule.

<sup>1</sup> O Isus akhardas e dešuduj apostolen thaj dijalen moć thaj vlast pe sa e bilače duhurja thaj te sastaren e nasvalimata. <sup>2</sup> Bičhaldal len te navestin o carstvo e Devlesko thaj te sastaren e nasvalen. <sup>3</sup> Thaj phendas lenđe: “Na te aveltumen tumenca po drom ni rovli, ni trasta ni so hana, ni love thaj na te aveltumen tumenca po duj haljine!” <sup>4</sup> Kana boravin ande varesko gav, ačhen ande jek čher thaj na načhen andar o čher ando čher dok či džan ande aver gav.\* <sup>5</sup> Ande savo gav či primintumen, inkljen andar godova gav, thaj činon o praho katar tumare pungre.† Godova avela znako kaj mukline les lešče sudošče.”

<sup>6</sup> Thaj e učenikurja teljardine majdur: obilarzinas e gava, navestinas e bahtali nevimata thaj sastarenas e nasvalen.

*O Irod si zbunime*

(Mt 14,1–2; Mk 6,14–16)

<sup>7</sup> Kana ašunda o vladiri Irod so dogodisajlo, sas zbunime, kaj varesave phenenas kaj o Jovano savo bolelas uštalo andar e mule.

<sup>8</sup> Aver phenenas pojavisajlo pe phuv o Ilija, a aver palem phendine: “Uštalo andar e mule varesavo proroko andar e purani vrjama.”

<sup>9</sup> A o Irod phendas: “Me čhindem e Jovanosko šoro. Ko si askal akava pale kaste gaći ašunav?” Thaj rodelas prilika te dičhel e Isuse.

*O Isus pravarel e but theme*

(Mt 14,13–21; Mk 6,32–44; Jn 6,1–13)

<sup>10</sup> Kana e apostolurja boldinepe katar e okolne krajurja, phendine e Isusešče sa so čerdine. Askal o Isus inđarda len pesa te avel lenca korkoro, paše pašo gav akhardo Vitsaida. <sup>11</sup> Ali kana godova ašunda o them, teljarda pale leste. Vo primisarda len thaj phenelas lenđe andar o carstvo e Devlesko thaj sastardas savoren ko trubuja sastipe. <sup>12</sup> Kana avilo maj paše o krajo e đeseko kasno mismere avile ko Isus maj paše e dešuduj učenikurja thaj phendine e Isusešče: “Te mukas e theme te džal pe okolne gava te aračhen kaj račarena thaj so hana kaj sam akate ando samotno krajo?”

<sup>13</sup> A o Isus phendas lenđe: “Tumen den len te han!”

A von phendine, “Najamen majbut katar pandž mangre thaj duj mače, osim te džas te činas hamasko pale sa o them.” <sup>14</sup> A sas verekaj katar pandž milje manuša (či đinavenas pe e manušnja thaj e čavra).

O Isus phendas pe učenikonende: “Phenen lenđe te bešen ande skupine po pandžvardeš džene.” <sup>15</sup> Thaj savora bešline. <sup>16</sup> A o Isus lija e pandž mangre thaj e duj mače, dikhla ando nebo, blagoslovisardalen thaj phagla o mangro pa dija pire učenikonende te podelisaren e themešče. <sup>17</sup> Savora haline dok či čaljile. Thaj katar okova so ačhilo e themešče čidine dešuduj pherde korpe kotora mangre thaj mače.

*O Petar spoznaisarda kaj si o Isus o Hristo*

(Mt 16,13–16; Mk 8,27–29)

\* **9,4** Trubul te aven zadovoljne e habeja thaj e čhereja ande savo o domačino nudil lenđe; Či troman te roden majlačho smeštaj. Ali naravno šaj posetisaren aver čera te kote propovedisaren e Bahtali Nevimata. † **9,5** činon o praho katar tumare pungre sas o izraz savo zurale odbinas ande godoja kultura. Godolesa sikavenas kaj čikamen te ni o praho andar godova gav ačhel lenca.

18 Jekhvar dok o Isus crdape po korkoro than te molilpe, lesa sas samo lešće dešuduj učenikurija. Pale godova phučlalen: “So phenel o them, ko sem me?”

19 Von phendine: “Varesave phenen kaj san o Jovano savo bolelas, aver kaj san o proroko Ilija, a trite palem kaj uštulo andar e mule varesavo katar aver purane prorokurja.”

20 A vo phučla len: “A tumen, so tumen phenen, ko sem me?”

A o Petar phendas: “Hristo Pomazaniko e Devlesko!”

*O Isus phenel pale piro smrto*

*(Mt 16,1–23; Mk 8,31–33)*

21 A o Isus zapovedisardas lenđe te na phenen khonikašće kaj si vo o Mesija. 22 Taj phendas: “Kaj me, o Čhavo e Manušesko, trubul but te trpisarav. E starešine, e šorvale rašaja taj e sikavne e Mojsiješće zakonestar odbacinaman. Mudarena man aj me o trito đes uštava andar e mule.”

*So o manuš trubul te ćerel te avel e Isusesko učeniko*

*(Mt 16,24–28; Mk 8,34–9,1)*

23 Pale godova o Isus phendas savorende: “Ako vareko kamel te avel mungro sledbeniko, neka odreknilpes korkoro pestar, nek svako đes lel piro trušul† taj nek džal pale mande. 24 Kaj svako ko kamel te spasisarel piro trajo, hasarelales; a ko hasarel piro trajo zbog mande, godova spasilales. 25 Kaj savi korist si e manušešće ako zadobisarel sa o them, a korkoro pes hasarel ili pešće naudil?” 26 Ko ladžal mandar taj mungre alavendar, lestar vi me, o Čhavo e Manušesko, ladžava kana avava ande slava mungri taj e slava mungre Dadešći taj e svete anđelendi. 27 “Čačes phenav tumende: ‘Varesave save si akate tumendar či merena dok či dičhena e Devlesko carstvo.’”

*O Del phenel e trin učenikonende kaj si o Isus pomazaniko*

*(Mt 17,1–13; Mk 9,2–13)*

28 A kana nakhla verekaj katar ohto đes katar godola alava o Isus lijas pesa e Petre, e Jovano taj e Jakove ande gora te pomolilpe. 29 Dok molilaspe, lesko muj promenisajlo, a e drze pe leste postanisardine parne taj sjajne. 30 Ande godova pojavisajle duj manuša taj ćerenas svato e Isuseja. Sas godova o Mojsija taj o Ilija. 31 Pojavisajle ande slava taj ćerenas lesa svato pale lesko smrto savo trubuja te podnesil ando Jerusalem te pherdol o Lil.

32 E Petre taj lešće drugaren lija e lindri. Kana džungadile, dikhline lešći slava taj duj manušen save ačhenas lesa. 33 Taj dok godola duj džene džanastar lestar, o Petar phendas e Isusešće: “Sikavneja, lačhe kaj sam kate. Te ćeras trin senice: jek tuće, jek e Mojsijašće, taj jek e Ilijašće.” Či džangla so phenel. 34 Dok vo godova još motholas, pojavisajlo o oblako taj zasinisarda len. Kana o oblako učhardalen lija len e bari dar.

† 9,23 O zločinco savo već sas osudime te merel gajda te razapnles, indjarelas e oprano deo e gredako katar o trušul džiko than kaj avela mudardo: 1. Akale govoresa, o Isus kamlas te phenel te ako kamas te avas lešće učenikurja, moraš korkoro amen te smatris mulen prema amare vlastite želje taj amare voljaće, taj moraš te avas spremne potpuno poslušne e Isusešće. 2. Trubul te svako đes avas spremne te trpisaras taj vi te meras ako trubul zbog o Isus kaj sam lešće učenikurja. 3. Moguće si liđuj opcije.

<sup>35</sup> A o glaso ašundilo andar godova oblako: “Akava si mungro Čhavo saves odabirisardem! Leste čhon kan.” <sup>36</sup> Baš kana ašundilo o glaso, o Isus ačhilo korkoro. E učenikurja ačhenas thaj askal još khonikašče kханči či phendine pale okova so dikhline.

*O Isus sastarel e čhave jedinco ande savo sas o bilačo duho*  
(Mt 17,14–19; Mk 9,14–29)

<sup>37</sup> A kana thejara o đes o Isus thaj lešče učenikurja fuljistine katar e gora, avilo angle leste o but o them. <sup>38</sup> Askal varesosko manuš savo sas maškar o them čhuta muj: “Sikavneja, moliv tut dik mungre čhave, kaj si mande jedinco. <sup>39</sup> Inčarel les o bilačo duho. Andar jekhvar počnil te čhol muj; čhudel pes thaj e spuma del lešče po muj. Gata nikada či mučel les thaj uništil les. <sup>40</sup> Molisardem čire učenikonen te traden e bilače duho andar leste avri ali von naštik tradine les.”

<sup>41</sup> A o Isus phendas lenđe: “O bilače thaj bi pačako manušalen! Š Kozom semasa tumenca a tuman či pačan. Phučaman kozom još trpiva tumen! An akaring čire čhave!” <sup>42</sup> Dok o čhavro avelas paše, o bilačo duho harada les pe phuv thaj čhinosarda les. A o Isus zapovedisardas e bilače duhošče thaj odma sastarda e čhave thaj dijale lešče dadešče. <sup>43</sup> Savora divisajle e Devlešče veličinače.

Thaj dok savora čudinaspe okolešče so čerelas o Isus, o Isus phendas pire učenikonenđe: <sup>44</sup> “Lače zapamtisaren so phenav tumende: Me, o Čhavo e Manušesko, avava dino ande vas e manušenđe.” <sup>45</sup> A von či hačardine so phenel lenđe kaj nas lenđe dino te hačaren; o značenje sas lendar garado a daranas te phučen les te objasnil lenđe.

*Ko si majbaro ando carstvo e Devlesko?*  
(Mt 18,1–5; Mk 9,33–37)

<sup>46</sup> E učenikurja počnisardine te raspravinpes ko maškar lende šaj avilosas majbaro. <sup>47</sup> O Isus džangla so si ande lende ile, thaj lija e cikne čhavre, čhutale paše peste <sup>48</sup> thaj phendas lenđe: “Ko god primil akale cikne čhavre zbog mande, man primil. A ko man primil, primil e Devles savo man bičhalda. O Del smatril kaj si majvažno okova savo si maj ponizno maškar tumende!”

*Ko naj protiv tumende tumenca si*  
(Mk 9,38–40)

<sup>49</sup> Askal o Jovano phendas: “Sikavneja, dikhlam ječe kaj ande čiro alav tradel e bilače duhonen. Amen phendam lešče te na čerel godova, kaj či džal pale tute.”

<sup>50</sup> A o Isus phendas lešče: “Na branin lešče! Kaj ko naj protiv tumende, pale tumende si!”

*O Isus po drom palo Jerusalim kroz e Samarija*

<sup>51</sup> Kana avili maj paše e vrjama te o Isus boldelpes ando nebo, vo zurale odlučisarda te džan ando Jerusalimo. <sup>52</sup> Thaj bičhalda e glasnikonen angle peste. Von đele thaj dine ande varesosko Samarijsko gav te pripravim lešče than kaj račarela. <sup>53</sup> No okote o them či kamlas te primin les kaj sas po drom palo Jerusalim.\* <sup>54</sup> Kana godova dikhline

§ 9,41 manušalen Ando original ramol: “naraštajona” \* 9,53 E Samarijancurja thaj e Židovurja mrzanas pes maškar pende. Zato e Samarijancurja čikamline te pomožisaren e Isuse pe lesko drom ando Jerusalim, e židovengo glavno gav.

lešće učenikurja o Jakov thaj o Jovano, phučline les: “Gospode! Kames te amen phenas te delen jag o oganj andar o nebo thaj te uništil len?”†<sup>55</sup> A o Isus boldape lende thaj phendas lende kaj či gndin lače.†<sup>56</sup> Thaj deletar ande aver gav.

*O Isus kamel te mukas sa thaj te teljaras pale leste*

*(Mt 8,19–22)*

<sup>57</sup> Dok džanas dromesa, varesosko manuš phendas e Isusešće: “Džava pale tute kaj god tu te džas.”

<sup>58</sup> A o Isus phendas lešće: “E lisicen si lende hvja, thaj e čirikljen lende gnezdurja, a man e Čhave e Manušesće naj kaj mungro šoro te čhav.”§

<sup>59</sup> Varesave avrešće phenda o Isus: “Sledi man!”

A vo phendas lešće: “Gospode, muk man prvo te džav te prahov mungre dade.”\*

<sup>60</sup> O Isus phendas lešće: “Muk e mulen te prahon pire mulen,† aj tu dža thaj navestisar o carstvo e Devlesko.”

<sup>61</sup> Još vareko phendas: “Me džava pale tute Gospode, ali muk man te džav prvo te jartoman katar mungri familija.”

<sup>62</sup> A o Isus phendas lešće: “Ni jek savo lel o plugo ande pire vas te oril thaj askal dičhel palpale,† naj dostojno palo carstvo e Devlesko.”§

## 10

*E učenikurja buljaren o carstvo e Devlesko*

*(Mt 11,21–27; 13,16–17)*

<sup>1</sup> Pale godova o Gospod odredisardas aver eftavardeš thaj duj učenikonen thaj bičaldalen po dujen angle peste ande svako gav thaj ande svako than kaj kamlas te džal. <sup>2</sup> Majsigo so bičaldalen phendas lende: “E žetva si bari, a radnikurja si cara. Molisaren e Gospodare e žetvaće te bičhalel e radnikonen ande piri žetva.\* <sup>3</sup> Džan! Ake, bičhalav tumen sago e bakhroren maškar e ruva. <sup>4</sup> Na inđaren tumenca ni love, ni trasta, ni so pođina. Dromesa na te hasaren tumari vrjama gajda kaj pozdravina e theme thaj čerena svato lenca.

† **9,54** O Jakovo thaj o Jovano preložisardine akaja metoda osude kaj džangline kaj e prorokurja save sas sago o Ilija osudinas e theme save odbacisardine e Devles (2. Car 1,10–12).

† **9,55** phendas lende kaj či gndin lače Ando original ramol: “kaj ukorisardalen” § **9,58** O Isus odgovoril e izlikava te poučil e manuše sar te avel lesko učeniko. O Isus podrazumil te ako godova manuš sledisardasas e Isuse, ni godole manuše či avilosas čher. \* **9,59** Naj jasno dali o dad godole manušesko mulo thaj vo odma prahola les, ili o manuš kamlas te ačhel jek lungu vrjama dok lesko dad či merel pa te šaj askal te praholes. Poanta si godova

kaj godova manuš kamel prvo te čerel vareso majsigo nego so teljarel te sledil e Isus. † **9,60** O Isus či gndil doslovno kaj e mule prahona aver mulen. Moguće značenje pale “mule”: 1.

godova si metafora pale okola save uskoro merena. ili 2. godova si metafora pale okola save či sledin e Isuse thaj si duhovno mule. Poanta si pale godova kaj o učeniko či tromal te dopustil khačhešće te zadržil les katar godova te sledil e Isuse. † **9,62** Khonikal ko dičhel palpale dok oril naštik vodil o plugo kaj trubul te džal anglal. Godoja osoba trubul te usrodočilpes te

dičhel angle peste te šaj lače te oril. § **9,62** Svako manuš savo postanisardas e Isusesko učeniko thaj askal kamel te boldelpes palpale ande piro purano tražo, naj korisno sago sluga ande Devlesko carstvo. \* **10,2** O Isus podrazumil kaj si but them save si spremne te den ando carstvo e Devlesko, ali kaj naj dosta učenikurja te sikaven thaj te pomožisaren e themešće.

<sup>5</sup> Ande savo god čer den, prvo phenen: ‘Miro akale čherešče!’ <sup>6</sup> Te avilo okote vareko dostojno palo miro tumaro miro fuljela pe leste. A ako naj khonik dostojno tumaro miro boldelape tumende. <sup>7</sup> Kana aven ande varesosko čer, na načhen andar o čer ande aver čer, ačhen pe jek than han thaj pijen sa so inkalen angle tumende.† Kaj o radniko zaslužisarel piri počin.”

<sup>8</sup> Kana den ande savo gav thaj primin tumen, han so ponudin tumen. <sup>9</sup> Sastaren e nasvalen save si ande godova gav thaj phenen lende: Akaleja pašilo tumende o carstvo e Devlesko! <sup>10</sup> A kana den ande varesavo gav thaj či primintumen, inkljen pe lešče sokača thaj phenen: <sup>11</sup> Čak vi o praho andar tumaro gav, savo astardape pale amare pungre, khosas amendar sago o znako kaj o Del sudila tumende.‡ Ali kava džanen: Pašilo tumende o carstvo e Devlesko! <sup>12</sup> Phenav tumende: Ando đes e sudosko maj loće avela e themešče andar e Sodoma§ nego e themešče andar akava gav.

*O Isus upozoril e manušen andar e neposlušne gava  
(Mt 11,20–24)*

<sup>13</sup> Teško tumende manušalen andar o gav Horazin! Teško tumende manušalen andar o gav Vitsaida! Kaj te e čudurja save dogodisajle tumende dogodisajle sas ando rumome gava o Tiro thaj o Sidon, e manuša andar godola gava već dumut obratisajlesas thaj bešlinesas ande hrapavo thaj neudobne drze ando praho sago znako palo pokajanje.\* <sup>14</sup> Ali e manušende andar o gav Tiros thaj andar o Sidon po sudo avela maj loće nego tumende. <sup>15</sup> Vi tumen manušalen andar o Kafarnaum! Zar dži ko nebo avena vazdine? Dži ko than kaj si e mule† haradona kaj si o tunjariko thaj e jag.

<sup>16</sup> Pale godova phendas e učenikonende: “Ko tumende čhol kan, mande čhol kan. Ko tumen odbacil man odbacil, a ko man odbacil, odbacil okoles savo bičhaldaman.”

*O Isus sikavel e učenikonon so si majvažno*

<sup>17</sup> Kana e eftavardeš thaj duj učenikurja boldine pes bahtale phendine: “Gospode, čak vi e bilačhe duhurja pokorinpes angle amende ande čiro alav!”‡

<sup>18</sup> A o Isus phendas lende: “Dikhlem e bendende poglavica sar perel sar e munja andar o nebo.§ <sup>19</sup> Ake dijemtumen vlast te uštaven pe sapa thaj pe škorpijonurja\* thaj pe sa e sila e dušmaješči† thaj khanči

† **10,7** O Isus či phenelas kaj von trubul te ačhen ande godova čer sasto đes, nego kaj trubun te račaren ando isto čer svako rjat dok si okote; aver alavenca, “Na te soven svako rjat ande aver čer”. ‡ **10,11** Akava si simbolično radnja savjava sikaven kaj odbacin e manušen godole gavešče; aver alavenca: “Baš sago kaj tumen odbacisardine amen, o Del ande potpuno odbacil tumen.” § **10,12** O Del uništisarda e ognjeno sumporosa e manušen

andar o gav e Sodoma kaj sas zurale bilačhe (dik 1. Mojs 19,24–28). \* **10,13** Ande godoja kultura o them lelas pe peste e drze save čerdinesas katar o kostret, savo si hrapavo thaj nas udobno, thaj bešlinesas ando praho, gajda sikadinesas kaj si lende žao kaj grešisardine protiv o Del. † **10,15** than kaj si e mule Ando original ramol: “Had” (dik ando rečniko). ‡ **10,17** Akate o “alav” odnosilpe pe Isusešči moć thaj lesko autoriteto. § **10,18** O Isus koristisarel e usporedba te usporedil sar o Del pobedila e bende dok lešče 72 učenikurja propovedinas ande gava. Odnosno, o beng pelo sar kana andar o nebo e munja pećel tele pe phuv. \* **10,19** Verovatno e sapa thaj e škorpijonurja sas metafora pale bilačhe duhurja. † **10,19** Dušmano si o beng.

či naškodila tumenđe. <sup>20</sup> Ali na raduintumen kaj e bilače duhurja pokorinpe tumenđe, Ali raduintumen zbog godova kaj si tumare alava ramome ande Devlešči knjiga ando nebo.”†

*O Isus objavisarel kaj o Dad sa predaisardas lešće ande vas  
(Mt 11,25–27; 13,16–17)*

<sup>21</sup> Ande godova čas o Isus pherdo bah ando Sveto Duho phendas: “Slaviv tut, Dade, tut savo san Gospodari e nebosko thaj e phuvjako, kaj garadan čiro čači pe katar okola save smatrin pes mudre thaj umne, a objavisardan e ciknenđe. § Ej Dade! Gajda tuće sviđosajlo.

<sup>22</sup> Mungro Dad sa dijas man\* thaj khonik či džanel ko si o Čhavo, nego samo o Dad; niti ko si o Dad osim o Čhavo osim okova kašće o Čhavo godova kamel te objavisarel.”

<sup>23</sup> Askal boldape ke učenikurja kana sas korkoro lenca thaj phendas lende: “Blago e manušenđe save dičen okova so tumare jakha dičen! <sup>24</sup> Phenav tumenđe: But prorokurja thaj e carurja kamline te dičen man thaj te ašunen man, ali či dikhline man thaj či ašundine man!”

*O Isus sikavel sar te zadobis večno trajo  
(Mt 22,34–40; Mk 12,28–31)*

<sup>25</sup> Jekhvar uštilo jek sikavno e Mojsiješće zakonestar te probil e Isuse thaj phučlas: “Sikavneja, so trubul te čerav te dobiv večno trajo?”

<sup>26</sup> A vo phendas lešće: “So ramol ando Mojsijesko zakono? So okote čitosardan?”

<sup>27</sup> Askal o manuš phendas “Čumide e Gospode Devle čire saste ileja, čire saste dušava, čire saste snagasa čire saste gođasa, thaj volisar čire pašutne sago kaj volis korkoro tut!”

<sup>28</sup> Pe godova phendas lešće o Isus: “Lače phendan. Godova čer thaj avelatu večno trajo.”

<sup>29</sup> Ali vo lija te sikavelpe pravedno, thaj phučla e Isuse: “A ko si mungro pašutno?”†

<sup>30</sup> A o Isus phendas: “Varesosko manuš fuljelas andar o Jerusolim ando gav savo akhardolas Jerihon. Thaj astardine les e razbojnikurja. Von čhudine lestar e drze, mardineles thaj đeletar. O manuš ačhilo te pašljol opaš mulo.

<sup>31</sup> Slučajno godole dromesa načhelas varesosko židovsko rašaj, dikhlale thaj nakhlo gajda kaj zaobiđisarda les. <sup>32</sup> A gajda vi o levito e rašajesko pomoćniko: nakhlo kotar, dikhlale thaj nakhlo paše leste.

<sup>33</sup> Varesosko putniko Samarijanco† areslo dži leste, dikhla les, thaj sažalisajlo pe leste. <sup>34</sup> Avilo dži leste thaj thoda e rane lešće e uljesa thaj e molasa§ thaj pačardalen. Thaj čhutale pe piro magarco,

† **10,20** O Del ramosardas lende alava po popiso e građanengo ando nebo, thaj godova značil kaj silen večno trajo. § **10,21** Akava odnosilpes pale okola saven možda naj but škole, ali si spremne te prihvatšaren e Isusesko sikaip e pe isto načino sago e cikne čhavra spremno čhon kan ke okola save pačan. \* **10,22** Akava stiho kana phenel kaj o dad dijales “sa značil vlast, sila, autoriteto ...” † **10,29** Akava manuš kamlas te džanel kas vo trubul te volil, aver alavenca: “Kas trubujasas te smatril kaj si lesko pašutno thaj te volil les sago korkoro pes?”

† **10,33** E samaritanurja sa strancurja saven mrzanas e židovurja. § **10,34** Ande godoja vrjama e mol koristilas pes te šilavl pe e rane sago ades e račija, a o ulje verovatno koristilas pes te sprečil e dezifakcija.

Indardale ande gostijonica thaj pobrinisajlo pale leste. <sup>35</sup> Dethara o đes inkalda duj rupune lovora,\* dijalen e gostijoničarešće thaj phendas: ‘Le sama pe leste. Ako so majbut potrošisarel, počinava tuće kana boldavaman.’”

<sup>36</sup> Askal o Isus phučla les: “So phenes, savo katar akala ponašisajlo sago pašutno prema okova saves astardine e razbojnikurja?”

<sup>37</sup> A vo phendas: “Okova savo pomognisarda lešće.”

Pe godova o Isus phendalešće: “Dža thaj vi tu čer gajda!”

### *Maj važno si te ašunas e Isusesko alav*

<sup>38</sup> Dok o Isus thaj lešće učenikurja gajda putuinas majdur prema o Jerusalim, dine ande varesosko gav. Okote sas varesavi manušnji savi akhardolas Marta, primisarda len ande piro čher. <sup>39</sup> A sas lat phen savi akhardolas Marija. Voj bešelas dži ke Gospodešće pungre thaj ašunelas o alav lesko. <sup>40</sup> A e Marta sas but zauzmime godolesa kaj poslužilas. Voj avili leste thaj phendas: “Gospode! Zar či maris kaj mungri phen muklaman korkoro te posluživ? Phen laće te pomožil man.”

<sup>41</sup> A o Gospod phendas laće: “Marta, Marta! Na ha holji thaj uznemiritu pale but godova, <sup>42</sup> a samo jek si važno te ašunel mungro o alav. A e Marija godova svatisardas thaj godova či lava latar.”

## 11

### *O učeniko phučel e Isuse te sikavel len sar te molin pes (Mt 6,9–13; 7,7–11)*

<sup>1</sup> Kana o Isus jekhvar završisardas e molitvava, nakhlo leste jek katar e učenikurja thaj phendas lešće: “Gospode, sikavamen te molimen sago kaj o Jovano savo bolelas sikada pire učenikonen.”

<sup>2</sup> O Isus phendas lenđe: “Kana molintumen, phenen:

‘Dade amareja ando nebo! Neka svetilpe čiro alav\*!’

Te avel o carstvo čiro†!

<sup>3</sup> Mangro amaro deamen svako đes!

<sup>4</sup> Thaj jartosar amende e bezeha amare,

sago kaj amen jartosaras svakonešće ko sagrašisarel protiv amende‡

thaj na de te peras ande kušnja!’”

<sup>5</sup> Thaj o Isus phendas lenđe: “Zamislin te džan ke tumaro drugari ande opaš e rjat thaj phenen lešće: ‘Drugarina, deman udžile trin mangre. <sup>6</sup> Kaj avilo mungro drugari dromestar, a naj man so te čhav angleleste te hal!’ <sup>7</sup> A okova andral phenel lešće: ‘Na dosadisar mande! O vudar si već phandado, a e čhavrora si manca ando kreveto thaj soven. Naštik uštav te davtut.’ <sup>8</sup> Phenav tumenđe: Ako či ni uštel te

\* **10,35** Ande godoja vrjama duj rupune lovora sas duj dnevnicke. \* **11,2** Akava teksto phenel te e Devlesko alav uzvisilpes. Kaj e Devlesko alav si uzvisime † **11,2** Akava značil te buljol thaj te barjol e Devlešči vladavina pe phuv ‡ **11,4** Akava teksto phenel te jartil sago kaj o Del jartosarel amende e bezeha amare ili te jartosaras sago vo kaj jartosarel

deles kaj si lesko drugari, uštela te deles zbog godova kaj lešče drugare naj ladžavo te avel uporno.Š

<sup>9</sup> Isto gajda phenav tumenđe: Manden thaj delape tumenđe! Roden thaj arachena! Maren po vudar thaj putrelape tumenđe! <sup>10</sup> Kaj kogod mandel, primisarel. Ko rodel, arachel. Ko marel po vudar, putrelapes lešče.

<sup>11</sup> Savo si maškar tumende dad: Kana o čavro lesko mandel lestar mačo, te deles umesto mačo sap? <sup>12</sup> Ili kana mandel angro, zar delales škorpijono? <sup>13</sup> Ako tumen, vi ako sen bilače, džanen te den lače darurja tumare čavrenđe, kozom majbut tumaro nebesko Dad dela Sveto Duho okolen save manden lestar!”

*E Isusešči sila avel katar o Del*  
(Mt 12,22–30; Mk 3,22–27)

<sup>14</sup> Jekhvar o Isus trada e bilače duho andar o manuš savo sas nemo. Kana inkljisto o bilačo duho, o nemo manuš počnisardas te čerel svato. Thaj o but o them divisajlo. <sup>15</sup> A varesave lendar phendine: “Vo tradel e bilače duhonen e Veelzevulešče silava,\* savo si e bendengo knezo.” <sup>16</sup> A aver iskušisardine e Isuses gajda kaj rodenas lestar varesosko znako andar o nebo kaj o Del bičhaldales.†

<sup>17</sup> Ali o Isus džangla lenđe gndimata thaj phendas lenđe: “Ako e manuša andar isto carstvo borin pes maškar peste von uniština piro carstvo. Vi ako e familijače članurja borinpes maškar pende, uniština piri familija. <sup>18</sup> Ako si o beng ‡ ande peste podelime, sar ačhela o carstvo lesko? A tumen phenen kaj me e Veelzevulešče silava tradav e bilače duhonen andar e manuša. <sup>19</sup> Ako me e Veelzevulešče silava tradav e bilače duhonen andar e manuša, kašče silava askal tumare učenikurja traden lenŠ? Gajda von korkoro dokažina kaj najsen ando pravo. <sup>20</sup> Ali ako me e Devlešče silava\* tradav e bilače duhonen, čačes avilo tumende e Devlesko carstvo.”

*O Isus si majzuralo katar o Beng*

<sup>21</sup> O Isus još phendas: “Džikaj god o zuralo manuš, lače naoružime, arachel piro čer, lesko barvalipe si sigurno. <sup>22</sup> Ali te avel o majzuralo lestar, svladilale thaj otmil lešče sa lesko oružije ande savo uzdilasp, a o pleno razdelila.”†

<sup>23</sup> Zato ko naj manca protiv mande si. Thaj ko manca či čidel, rspil.‡

Š **11,8** O Isus mothol akaja paramiči sar sikadasas kroz e slike sar o drugari či odbisardasas te pomožil tumenđe ako situmen bari potreba thaj zamolin les majbut drom palo pomoć. Pe isto način o Del či dobila te del tumen okova so si tumenđe potrebno ako uporno phučen les. Ako čak vi o drugari savo či volil tut, dela tut okova so trubul tut kana ustrajno molis les, kozom majbut o Del, savo si lačo dad thaj savo volil tut, delatut okova so trubul tut kana ustrajno molis les.

\* **11,15** e Veelzevulešče Veelzevul si aver alav palo Sotona ili beng. Varekana ramolpes vi “Vaal-Zevuv”. Akava alav doslovno značil “gospodari e mačhengo”, so značil “vladari pe demonurja”. Akava si alav povezime e hohamne devlesa “Vaal-Zevuva” andar o Ekron (dik 2. Car 1,2, 3, 6).

† **11,16** Gajda kamline te o Isus dokažil kaj si lesko autoriteto katar o Del. ‡ **11,18** o beng Ando original ramol: “Sotona”. Ako o Sotona thaj e članurja lešče carstvošče borin pes maškar pende lengo carstvo propadnila. Š **11,19** Čak vi e farisejende učeniko isto tradenas e bilače duhonen.

\* **11,20** Ando original ramol: “e Devlešče najesa”. Dik 2. Mojs 8,19. † **11,22** Akava phenel palo Isus savo pobedil e bendes (Satanes) thaj lešče demone sago kaj si o Isus maj zuralo manuš savo lel savo len so pripadil e zurale manušešče. ‡ **11,23** či čidel, rspil o Isus phenel kana čiden pes e učenikurja save sledin les: “Kogot či navodil e themes te aven thaj sledin man, navodil len te džan majdur mandar.”

*Ako o manuŝ či ačhel e Devlesa o bilačo duho boldel pes ande leste  
(Mt 12,43–45)*

<sup>24</sup> Askal o Isus phendas: “Kana o bilačo duho inkljel andar o manuŝ, lutil pe puste thana<sup>Š</sup> thaj rodel pešće than kaj šaj te odmorilpes. A kana či aracheles, phenel: ‘Boldavaman ande mungro čher, ando manuŝ andar savo inkljistem.’ <sup>25</sup> Thaj kana areslo o bilačo duho arakhlas e manuše savo si sago o čučo čher, šlado thaj lačhardo. <sup>26</sup> Askal džal thaj lel pesa efa aver duhurja, majgore lestar, thaj del andre thaj okote nastaniŕpe. Po krajo godole manuŝesće avela majgore nego kaj sas lešće po početko.”

*Blagoslovime si okova savo si pačivalo e Devlešće*

<sup>27</sup> Dok o Isus godova phenelas, varesošči manuŝnji kaj sas maškar o but o them čhtas muj: “Blagoslovime o di čire dejako savo inđardatu thaj e čuča save pilan!”

<sup>28</sup> O Isus phendas: “Još maj blagoslovime si okova savo ašunel o alav e Devlesko thaj ačhel pačivalo!”

*O Isus si majbaro katar o Solomon thaj katar o Jona a o them či ašuneles*

*(Mt 12,38–42; Mk 8,12)*

<sup>29</sup> Sar o them sa majbut čidelaspe o Isus počnisarda te mothol lenđe: “Tumen manuŝalen save train ande akaja vrjama sen bilače manuša. Tumen roden znako.\* Ali aver znako či delape tumenđe osim e čudurja save o Del čerdas palo Jona.† <sup>30</sup> Kaj okova so sas e Jonasa sas znako e manuŝenđe save trainas ando gav savo akhardolas Niniva‡ kaj o Del bičhaldales. Gajda okova so manca dogodilape avela znako kaj man, e Čhave e Manuŝesće, o Del bičhaldas akale themešće.Š

<sup>31</sup> Po đes kana avela e Devlesko sudo, e carica savi dumut vladilas e južno phujava, savi akhardolas Saba,\* uštela thaj osudila e manuŝen save si ađes džude. Kaj dadural avili te ašunel e care Solomone savo sas zurale mudro, a akate si vareko maj baro vi katar o Solomon, a tu men čikamen te čhon kan leste! <sup>32</sup> E manuša save majsigo trainas ando gav savo akhardolas Niniva, uštena po đes kana avela e Devlesko sudo thaj osudina e manuŝen save akana train. Kaj von pokaisajle kana o Jona propovedilas, a ake, akate si vareko majbaro katar o Jona a tumen još či pokaisajle!”

*E Isusesko sikavipe si svetlost e manuŝenđe*

*(Mt 6,22–23)*

Š **11,24** puste thana Ando original ramol: “bi paješće than” savo phenel pale “opustošime thana” kaj lutin e bilače duhurja. \* **11,29** Aver alavenca: “Kamen mandar te čerav čudo sago dokazo kaj avilem katar o Del.” † **11,29** O Jona sas proroko ando Purano savezo (dik Jona 1,7; 2,10; Mt 12,40). Pale trin đes inkljisto džudo andar o di e bare mačesko, sago kaj o Isus nakon trin đes inkljela andar o limori. ‡ **11,30** E manuša savenđe o Jona propovedilas sas zurale bilače. Trainas ando gav savo bučholas Niniva, savo sas glavno gav ande Asirija, thaj sas bare dušmaja e Izraelconenđe (dik Jona 3). Š **11,30** Ando original ramol: “Kaj sago kaj sas o Jona znako e Ninivljanenđe, gajda o Čhavo e Manuŝesko avava znako akale naraštajošč.” \* **11,31** E carica katar e Saba (ande ađes akhardo Jemen) putuilas prekal 1500 kilometrja te ašunel e Solomonešči mudrost. Trailas 1.000 brš majsigo katar o Hristo (dik 1. Car 10,1–13; 2. Dnev 9,1–12).

33 O Isus majdur sikavelas: “Khonik či del jag o stenko te čholes po garado than, niti tale korpa, nego po čirako te okola kaj den andre dičen o svetlo.† 34 Čiri jak si stenko čire teloščé. Kana si čiri jak sasti, sasto čiro telo si ando svetlost. Ali, ako si čiri jak nasvali, čiro telo si ande tama.‡ 35 Zato lesama te okova so gndis kaj si ande tute svetlost naj li tama. 36 Ako si sasto čiro telo osvetlime, thaj ni cara tama naj ande tute, askal sasto aveja prosvetlime, sago kana o stenko pire svetlosa osvetlil tut.” §

*O Isus opomenil e vođen save si pobožne samo avrjal  
(Mt 23,1–36)*

37 Kana o Isus dija gata o svato, avilo leste varesavo farisejo thaj akharda les ande piro čher te hal. Vo dija andre thaj lijas than pale sinija. 38 Kana godova dikhlas o farisejo, začudisajlo kaj o Isus bešlo pale sinija majsigo nego so thodas pire vas sago kaj trubujas prema e židovengo običajo.\* 39 A o Gospod phendas lešće: “Tumen e fariseja gadići trudintumen te thoven tumare tahtaja thaj e čare avrjal, a pherdine len e pohlepava thaj e bilačipeja. 40 Bi godavalen! Naj li o Del okova kaj stvorisardas e manušes thaj pindžarel les andral sago vi avrjal?† 41 Zato den okova so si andral, andar e tahtaja thaj andar e čare so handžvale incären samo pale tumende, okolende savende si maj potrebno sago milostinja thaj saste avena čiste andral thaj vi avrjal.

42 Ali jao tumende, farisejalen! Kaj den deš posto e Devlešće katar sa e začinurja thaj katar o povrće‡ a či marin pale pravda e manušendi thaj pale ljubav e Devlešći so si maj važno. Trubun te den deš posto ali či troman te zanemarin akava so si maj važno.

43 Jao tumende farisejalen! Kaj volin te bešen pe počasne thana ande sinagoge, thaj te e manuša pozdravin tumen pherde poštupe prema tumende pe javne thana. 44 Jao tumende farisejalen kaj sen sago e limorja, save naj obeležime, pe save e manuša phirena a či džanen kaj si okote o limori thaj postain duhovno melale!”§

45 Askal varesosko katar e sikavne e Mojsiješće zakonestar phendas e Isusešće: “Sikavneja, dok gajda phenes, vi amen vredos.”

† **11,33** Retkurja 33-36 si metafora savjava o Isus phenel pale piro sikaipe sago palo “svetlo” pale savo kamel te lešće učenikurja čhon kan thaj delin averenca. Vo phenel pale manuša save či džanen ili či prihvatisaren lesko sikaipe sago kaj si ando “tunjariko”. ‡ **11,34** Ando original ramol: “Stoga, ako si čiri jak sasti, sasto čiro telo avela osvetlime e svetlosa. No ako čiri jak naj sasti, sasto aveja ande tama.” O grčki pridjev akate si prevedime palo “sasto” ujedno značil potpuno odanost e Devlešće thaj naj operetime e brigenca palo matrijalno. Aver alavenca: “E jak si sago e svetiljka e teloščé. Te či previše vodín briga pale matrijalno, jasno dičena ando trajo, ali ako previše vodín briga pale lende tumaro vido avela zasenime thaj e tama pherela tumaro trajo.” § **11,36** O Isus phenel isto čačipe sago usporedba. Vo phenel pale manuša save si pherde čačipe sago kaj si von svetiljka savi zurale sijal. \* **11,38** E Jevreja sas pravilo te e manuša thoven pire vas di ke khuvja te aven obredno čiste anglo Del. † **11,40** O Isus koristil te phučel akava te ukoril e farisejen kaj či hačaren kaj si okova so si ande lende ile zurale važno. ‡ **11,42** e začinurja thaj katar o povrće Ando original ramol: “E nana thaj katar e ruta thaj katar svako vrstako povrće.” § **11,44** Kana e Židovurja phirenas prekal e limorja, postanisardinesas obredno nečiste ili aver alavenca či avilinesas majbut svete. Akala limorja save nas označime prouzročinas te von godova slučajno postanin.

<sup>46</sup> A o Isus phendas: “Jao vi tumenđe, sikavna len e Mojsiješće zakonestar! Kaj čhon pe manuša o pharipe gajda kaj den len pravilo save naštik te indaren a tumen korkoro ni e najesa či kamen te mrdnon te pomožin lende te indaren godova pharipe. <sup>47</sup> Jao tumenđe! Kaj vazden e prorokonende spomenikurja, a tumare pradada mudardinelen. <sup>48</sup> Godolesa kaj či train so e prorokurja sikavenas svedočin kaj odobrin okova so ćerdine tumare pradada: von mudardinelen, a tumen spomenikurja vazden lende! <sup>49</sup> Zato vi o Del mudro phendas: ‘Bičhalava lende e prorokonon thaj e apostolen. Varesaven mudarena a varesaven progonina.’

<sup>50</sup> Zato tumaro naraštaj smatrilapes došalo palo rat kaj sas čhordo e prorokonengo katar o postanko e themesko, <sup>51</sup> katar o rat e prvo dži ke paluno prorokosko, e Aveljesko dži ko rat e Zaharijasko,† savo sas mudardo maškar o žrtveniko thaj o svetište. Ej phenav tumenđe, kaj rodelape o računo katar akaja generacija tumaro naraštaj avela odgovorno pale godova rat savo sas čhordo!†

<sup>52</sup> Jao tumenđe, sikavna len e Mojsiješće zakonestar! Kaj line e ćija o džanglipe pale Devlesko carstvo thaj garadine katar e manuša. § Korkoro či den andre ando carstvo, a či mućen te den andre okola kaj kamen te den.”

<sup>53</sup> Kana o Isus inkljisto okotar, e sikavne e Mojsiješće zakonestar thaj e fariseja počnisardine zurale te holjavon pe leste thaj navalisardine pe leste te phućen les but vareso. <sup>54</sup> Von dičhenas te astaren les ande varesavo pogrešno alav sar optužisardinesas les.

## 12

### *O Isus sikavel pire učenikonon te na aven dvolične (Mt 10,26–27)*

<sup>1</sup> Askal ćida pes majbut milje manuša, gajda kaj jek avrešće uštavenas e pungre. Ali o Isus prvo phendas pire učenikonende: “Len tumen sama kaj o farisejsko licemerje buljol sago o kvasco savo šukljarel sasto humer. <sup>2</sup> Kaj avel e vrjama kana sa so si garado avela arakhado thaj sa so si tajno ašundola angle savorende.\* <sup>3</sup> Zato, sa so phendine ande tama ašundola po svetlo thaj sa so phendine varekašće po kan ande sobe katar e krovurja propovedilape.”

\* **11,48** O Isus koril e farisejen thaj e sikavnen e Mojsiješće zakonestar. Von džanen palo mudaripe e prorokonon, ali či osudin pire pradada godova kaj mudarenas len. Aver alavenca: “Gajda kaj umesto te osudin len, tumen potvrdisaren thaj slažintumen lenca”. † **11,51** O Avelj sas prvo manuš savo sas mudardo ando Purano zaveto (1. Mojs 4,1–16), a o Zaharija sas zadnjo manuš savo sas mudardo ando Purano zaveto (2. Dnev 24,20–22). † **11,51** Jedine prorokurja saven poštuin si e mule prorokurja! Baš sago lende pradada či čhonas kan ke prorokurja ando purano Zaveto, gajda vi akala fariseja thaj e sikavne e Mojsiješće zakonestar či čhon kan ko Isus thaj čikamen te čhon kan ke apostolja saven o Isus bičhalel. E Devlesko strpljenje okončila pes thaj vo konačno sudila e Izraelošće pa le sa e brša save odbacisardine lešći poruka. § **11,52** O Isus phenel pale Devlesko čačipe sago kaj si ando čher ande savo e učenikurja čikamen te den andre, ali či mućen ni averende te avelen e ćija te den andre. Akava značil kaj e sikavne či pindžaren čačes e Devles, ali sprečin vi averende te pindžaren les. \* **12,2** Aver alavenca: “Na aven sago kaj si von, kaj anglo Del avela sa putardo so akana e manuša garaven. E manuša po kraj o džanena sa so ko garadas.”

*Na daran kaj sen dragoceno e Devlešće*

(Mt 10,28–33; 12,31–32; Mk 3,28–29)

<sup>4</sup> O Isus nastavisardas: “Phenav tumenđe mungre drugarende: na daran katar okola save šaj te mudaren samo o telo, a pale godova naštik éeren tumenđe khanči. <sup>5</sup> Ali phenava tumenđe kastar trubun te daran: daran katar o Del savo, šaj lel o trajo thaj askal čudel les ando pakao. Lestar daran!

<sup>6</sup> Pa či li bićinenpe pandž čiriklja pale samo duj lovora? Pa palem ni ječe lendar o Del či bistrel. <sup>7</sup> A tumenđe si svako bal po šoro đinado. † Zato na daran! Kaj sen e Devlešće maj vredne nego but e čiriklja!”

*Trubul te priznaisaras e Isuses anglo them*

(Mt 10,32–33; 12,32; 10,19–20)

<sup>8</sup> “Ko akate pe phuv anglo them priznajil kaj pripadil mande, pale leste me o Čhavo e Manušesko phenava, angle anđelurja e Devlešće kaj pripadil mande. <sup>9</sup> Ali okova savo odreknilpe mandar angle manuša akate pe phuv, gajda vi me odreknivaman lestar angle anđelurja e Devlešće. <sup>10</sup> Ali phenav tumenđe ko god mothol alav protiv mande o Čhavo e Manušesko, jartolape lešće. Ali okolešće ko vredol‡ po Sveto Duho, či jartolape lešće.

<sup>11</sup> A kana anena tumen po sudo thaj ande sinagoge, angle poglavarja thaj angle vlast, na vodin briga so phenena te branin tumen! <sup>12</sup> Kaj o Sveto Duho ande godova časo sikavela tumen so te phenen.”

*O Isus sikavel te či avas pohlepne*

<sup>13</sup> Vareko maškar o them phendas lešće: “Sikavneja, phen mungre phralešće te podelil manca so muklas amende amaro dad.”

<sup>14</sup> Pe godova o Isus phendas lešće: “Manuša, ko čhuta man te avav tumaro sudco ili deliv maškar tumende?” <sup>15</sup> Askal phendas savorende: “Lentumen majdur katar svako pohlepa, kaj o čačo trajo či avel katar okova so situmen.”

<sup>16</sup> Askal o Isus phendas lenđe akaja usporedba: “Varesave barvale manušesće but bijanda e phuv <sup>17</sup> thaj ačhilo te gndil ande peste: ‘So te éerav? Kaj najman kaj te čhav sa akava so bijanda mande e phuv.’ <sup>18</sup> Thaj phendas: ‘Ake so éerava! Haravava mungre žitnice thaj vazdava majbare thaj okote čhava sa mungro điv thaj mungro lačhipe. <sup>19</sup> Askal phenava korkoro mande ake situ ande zalihe but lačhipe pale but e brš kaj aven. Dušo mungrije, akana odmoritu, ha, pi thaj veselitu!’

<sup>20</sup> Ali o Del phendas lešće: ‘Bigođavereja! Već arjat mereja!§ A sa so ćidan, kasko avela?’

<sup>21</sup> Gajda avela okoleja kaj ćidel pešće barvalipe, a či ćidel barvalipe savo si vredno ande Devlešće jakha.”

*O Del del okolenđe save paćan okova so si lenđe potrebno*

(Mt 6,25–34)

† **12,7** Šaj te pouzdimen ando Del. Kaj vo džanel majbut nego so amen džanas. Či džanas ni kozom bal po šoro siamen, ali o Del džanel još vi majbut katar godova. † **12,10** vredol po Sveto Duho ili “hulil po Sveto Duho”. Sago primer, dik ando Mt 12,31–32; Lk 11,15. § **12,20** Ando original ramol: “Već arjat ćiri duša mandelpe tutar” a duša odnosilpes pe manušesko trajo. Aver alavenca: “Arjat merja!”

<sup>22</sup> Askal o Isus phendas pire učenikonende: “Zato phenav tumende: na han holji palo trajo: so hana; ni palo telo so dena pe tumende. <sup>23</sup> Kaj o trajo si maj vredno katar o habe, a o telo katar e drze.\* <sup>24</sup> Dičen pe gavranurja!† Či sadin niti ciden, najlen spremište ni žitnice, a palem o Del pravarelen. Kozom sen tumen majvredne nego e čiriklja! <sup>25</sup> A ko tumendar šaj e brigenca te lundarel piro trajo samo pale jek đes? <sup>26</sup> Dakle, ako tumen naštik čeren ni okova so si maj cara, sostar askal stalno han holji pale sa aver?”

<sup>27</sup> Dičen e poljske luluša sar barjon! Niti trudinpe, niti štrikon pešće drze. A palem, phenav tumende: Kaj ni o caro Solomon ande pire kuč e drze nas maj lačardo katar ni jek lendar. <sup>28</sup> Ako o Del del pe poljsko čar gajda šukar drze, savi ađes si, a več thejara čhudelpes ando bov te phabol, kozom majbut dela pe tumen šukar drze. Tumen cara pačivalen! <sup>29</sup> Zato vi tumen: na samo gndisaren pe godova dali situmen dosta te han thaj te pijen. Na uznemirin tumen zbog godova! <sup>30</sup> Sa godova roden e manuša save či pindžaren e Devles. Tumaro nebesko Dad džanel kaj sa godova trubul tumen. <sup>31</sup> Nego roden o carstvo e Devlesko,‡ a godova sa nadodaila pe tumende!

<sup>32</sup> Na dara mungro cikno stado!§ Kaj si e volja tumare Dadešći te del tumen o carstvo.

<sup>33</sup> Bičinen okova so si tumen thaj e love den e čorende! Gajda čidena tumende trjaste save či phurjon thaj barvalipe savo či propadnila, večno blago savo si ando nebo kaj o čor či avel thaj kaj o moljco čihalales. <sup>34</sup> Kaj phenav tumende, kaj si tumaro barvalipe, okote avela vi tumaro ilo.”

*O Isus mothol pale godova kaj palem boldelapes pe phuv  
(Mt 24,45–51)*

<sup>35</sup> O Isus phendas lenđe vi akava: “Aven spremne te služin\* thaj tumare stenkurja neka phabon. <sup>36</sup> Aven sago okola kaj ažučaren pire gospodare kana boldelpes andar e svaturja te odma putren lešće čim aresel thaj marel po vudar, <sup>37</sup> Blago o kole slugonende saven o gospodari, kana avela, arachel džungade! Čačes phenav tumende, kaj korkoro o gospodari čholalen pale sinija te bešen, thaj čhola pe peste o keceljko, te poslužil len. <sup>38</sup> O gospodari šaj te boldel pes ande opaš e rjat ili ande zora a blago e slugende saven o gospodari arachela kaj si još džungade thaj ažučaren les.

\* **12,23** Budući kaj o Del dijatumen tumaro trajo thaj vi tumaro telo, sigurno šaj pačan lešće kaj dela tumen vi okova so si tumende potrebno palo trajo. † **12,24** Okola save čonas kan ko Isus smatrinas kaj si e gavranurja beskorisne pošto e židovurja naštik hanas akaja vrsta čirikljen. ‡ **12,31** roden o carstvo e Devlesko Akava značil “usredotočin tumen pe lesko carstvo” ili “zurales čeznin pale lesko carstvo”. § **12,32** cikno stado O Isus pire učenikonen akharel stado. Stado si grupa ili čopori bakhre ili buzinja pale save e čobanurja vodin e briga. Sago kaj e čobanurja vodil e briga pale pire bakhre, gajda o Del vodil briga pale e Isusešće učenikurja. Aver alavenca, “Na vodin briga. Vi ako najtumen but džene thaj sen slabe, sago o cikno stado bakhrota, tumare nebešće Dadešće sviđosajlo te mučel tumen te train ande lesko carstvo.” \* **12,35** Ando original ramol: “Neka tumare lundže drze aven zategnime pale tumari haravlji.” E manuša indarenas pe peste lundže haljine. Thaj phandenas pes len e haravljenca te e haljine či smeton lenđe dok čerenas buči. Aver alavenca: “phanden tumare haljine e haravljenca gajda te aven spremne te služin”, ili “aven lačarde thaj spremne te služin.”

<sup>39</sup> Ali akava džanen: kana džanglasas o domačino ande savi vrjama avela o čor, či muklasas te del ande lesko čher. <sup>40</sup> Vi tumen uvek aven spremne kaj me o Čhavo e Manušesko avava kana či nadina tumen.”

*Okola save pačan trubun te čeren e Devlešči volja*

<sup>41</sup> Pe godova o Petar phendas: “Gospode, phenes li godoja usporedba samo pale amende ili vi pale savorende?”

<sup>42</sup> A o Gospod Isus phendas: “Ko si okova verno thaj razumno upravniko saves o Gospod čhola te vladil pe lešće sluge thaj te delen habe ande pravo vrjama? <sup>43</sup> Blago okole slugašće saves o gospodari kana boldelape, aračhel kaj gajda čerel. <sup>44</sup> Čačes, phenav tumenđe, o gospodari čhola godole slugone te upravljil lešće saste barvalipeja. <sup>45</sup> Ali ako godova sluga phenel ande piro ilo: ‘Mungro gospodari či avela gajda sigo’ thaj ačhel te marel e slugonen thaj e sluškinjen, te hal, te pijel thaj te matol, <sup>46</sup> avela o gospodari godole slugasko ando đes savo či nadilapes thaj ando časovo savo či ni slutil; strogo kaznilales gajda kaj činela les pe kotora te delil e sudbina okolenca save či pačan.

<sup>47</sup> O sluga savo pindžarel e volja pire gospodarišči, a khañči či čerdas te pripravil pes pale vrjama kana boldela pes lesko gospodari, avela strogo kaznime. <sup>48</sup> A okova sluga kaj či džanglas e gospodarešči volja, a čerda vareso kaj zaslužisarel e kazna, cara avela mardo. A katar okola kašće but dijas lendar majbut vi rodela. Okolestar kašće si but poverime lestar but vi rodelapes.”

*Zbog o pačipe ando Isus avela razdor*  
(Mt 10,34–36)

<sup>49</sup> Askal o Isus phendas: “Me avilem te čhudav e jag e sudošči pe phuv! Sar volisardemas te već počnisardas te phabol! <sup>50</sup> Ali majsigo trubul te pretrpiv e muke thaj o smrto, zurales si mande pharo dok godova či avel gata!† <sup>51</sup> Gndisaren kaj me avilem te anav miro pe phuv maškar o them? Nisar. Avilem te anav razdor. <sup>52</sup> Kaj katar akana e familija rspilapes: trin džene avena pe mungri rig, a aver duj protiv ili duj pe mungri rig a trin protiv mande. <sup>53</sup> O čhavo avela protiv o dad thaj o dad protiv o čhavo, e dej protiv e čhej, thaj e čhej protiv e dej, e sokra protiv piri bori thaj e bori protiv e sokra.”

*O Isus sikavel kaj trubun te pindžaren lešće znakurja*  
(Mt 16,2–3; 5,25–26)

<sup>54</sup> A e bute themešće o Isus phendas: “Kana dičhen kaj o kalo oblako lelpes katar o more po zapado, odma phenen: ‘Dela o bršnd!’ Thaj gajda si. <sup>55</sup> Kana dičhen kaj phurdel e bavlal katar e pustinja po jugo, phenen: ‘Avela tati vrjama’, thaj gajda avela. <sup>56</sup> Licemerja!‡ Džanen te prosudisaren o izgled e nebosko thaj e phuvjako. Sar askal či pindžaren mungre znakurja save trubuinesas te pindžaren!§

† **12,50** Ando original ramol: “E boldimasa trubul te bolaman.” Akate o boldipe značil pe okova so o Isus trubul te trpil. Sago kaj o paj učharel e manušes kana bolel pes, gajda e patnja učharel e Isuse. ‡ **12,56** Licemerja Godola manuša sas dovoljno gođaver te pindžaren e znakurja kaj avel o bršnd ili e tati vrjama. Ali odbisardine te priznain kaj si e Isusešće čudurja znakurja save sikaven kaj si vo okova saves o Del bičhaldas te spasil e themes. § **12,56** Aver alavenca: “Dakle, sigurno trubuinesas te hačaren so značil okova so o Del čerdas kroz mande akala desa!”

<sup>57</sup> Tumen korkoro trubuinesas te pindžaren so si ispravno! <sup>58</sup> Sago vi ako vareko prl tumen zbog o dugo savo či počindine thaj kamel te inđarel tumen po sudo, još dromesa den sa tumendar te e nagodbasa rešin tumen lestar, te či inkalel tut anglo sudo. O sudco delatut ko stražari, a o stražari čhudelatut ande tamnica. <sup>59</sup> Phenav tuće: ‘Či inkleja okotar dok či počines dži ke posljedno lovoru.’” \*

## 13

### *O Isus sikavel kaj trubul te pokaimen pale amare bezeha*

<sup>1</sup> Askal aviline varesave manuša thaj phendine e Isusešće kaj o Pilato savo sas rimsko upravniko dijas naredba te mudarenpes varesave manuša andar e Galileja. Thaj sas mudarde ando jerusalimsko Hramo dok anenas e žrtve. <sup>2</sup> O Isus phendas lenđe: “Dali si godova dokaz kaj godola Galilejcurja save nastradisardine sas majbut bezehale katar aver Galilejcurja? <sup>3</sup> Nisar! Phenav tumenđe: vi tumen gajda avena duhovno hasarde ako či obratintumen ko Del! <sup>4</sup> Ili gndin kaj okola dešuohto, pe save haradili e Siloamsko kula thaj mudardalen sas majbut bezehale katar sa e manuša save trainas ando Jerusalem? <sup>5</sup> Nisar! Phenav tumenđe: vi tumen gajda avena duhovno hasarde ako či obratin tumen ko Del.”

### *O Isus kroz e usporedba sikavel kaj si amen još cara vrjama te pokaimen*

<sup>6</sup> Askal o Isus phendas lenđe akaja usporedba: “Varesošće manuše sas zasadime smokva ande lesko vinograd. Avilo o manuš te dičhel dali bijandas plodo, ali či arakhlales pe smokva plodo. <sup>7</sup> Zato phendas e vinogradarešće: ‘Ake već trin brš avav thaj rodav plodo pe akaja smokva thaj či arakhav les. Čin lat. Sostar te crpil e phuv?’

<sup>8</sup> A o vinogradari phendas lešće: ‘Gospodarina, mukla još akava brš, a me hanavava oko late thaj čhava oko late o štalsko gunoj. <sup>9</sup> Možda ipak pe okova brš bijanel. A ako či bijanel askal čhinejalat.’”

### *O Isus sastarel ando savato*

<sup>10</sup> Jek savato dok o Isus sikavelas ande jek sinagoga. <sup>11</sup> Okote sas varesavi manušnji savi dešuohto brš sas grbavo thaj naštik uspravilas pes. Ande late sas o bilačo duho savo čerelas te avel nasvali <sup>12</sup> Kana o Isus dikhlala, akhardala peste thaj phendas: “Manušnjije, oslobodime san katar čiro nasvalipe!” <sup>13</sup> Thaj čhuta pire vas pe late, a voj odma ispravisajli thaj počnisarda te slavil e Devle.

<sup>14</sup> A okova savo sas vođa ande sinagoga holjajlo kaj o Isus sastardas ando savato, thaj phendas e themešće: “Šov si đes ando kurko kana trubul te čerelpes bući! Ande godola đesa aven thaj saston, a na ande savatosko đes!”

<sup>15</sup> O Gospod askal phendas lešće: “Licemerne! Vi tumen čeren bući savatone. Zar či svako tumendar savatone odrešil pire guruve ili magarco katar e jasle, thaj inđareles po paj te napoiles? <sup>16</sup> Naj li vi voj čhej andar e Avraamesko plemeno, savja o Sotona phangla već dešuohto brš, či li trubujasas vi lat o Del te odrešil katar godova nasvalipe savo si laće okurja ande savatosko đes?” <sup>17</sup> Pe godova sa

\* **12,59** O Isus e themešće phendas akaja prispodoba te upozoril len kaj moraš te pomirinpes e Devlesa majsigo nego so avel e vrjama te osudilen.

lešče protivnikurja ladžajle, a sa aver raduisajle e šukar delenđe save o Isus ćerdas.

*E Devlesko carstvo barjol sago e gorušicako zrno thaj buljol sago o kvasco*

(Mt 13,31–33; Mk 4,30–32)

18 Pale godova o Isus phendas: “Sova si slično o carstvo e Devlesko? Sova te usporedisarav les? 19 Slično si e gorušicaće zrnosa savo si zurale cikno, kana o manuš lel les thaj čhudeles ande piri bar. Barjol thaj ćerdol ando kaš thaj e čiriklja ćiden pes thaj ćeren gnezdurja ande lešče ranja.”

20 Thaj palem phučlalen: “Sova te usporediv o Carstvo e Devlesko? 21 Vo si sago kana e manušnji lel o kvasco thaj šukljarel les ande bari količina \* aro dok sa či šukljol.”

*O Isus sikavel kaj si phare te den ando carstvo e Devlesko*

22 Gajda o Isus načhelas kroz e gava thaj e varošice, sikavelas thaj putuilas ando Jerusolim. 23 Askal vareko phendas lešče: “Gospode, dali si cara okola kaj spasinpe?”

A o Isus phendas lenđe: 24 “O vudar e nebosko si usko. Trudintumen te den andre kroz leste, kaj phenav tumenđe, but rodona te den kroz leste, ali naštik dena. 25 Kana o gospodari e čheresko zaključil o vudar avela prekasno. Askal ačhena avri marena po vudar thaj phenena: ‘Gospode, putar amenđe!’ Vo phenela tumenđe: ‘Či džanav tumen ko sen.’”

26 Askal počnina te phenen: ‘Pa amen tusa halam thaj pilam, a tu sikavejas pe amere sokača!’

27 A vo phenela tumenđe: ‘Phenav tumenđe: či džanav ko sen.† Džantar mandar savora save nepravda ćeren!’

28 Okote rovena thaj škripina e dandenca kaj avena gajda holjarike kana dičhena e Avraame, e Isako, e Jakove thaj sa e prorokonen ando carstvo e Devlesko, a tumen avena čhudine avri. 29 Askal avela o but o them katar o istok thaj katar o zapad, katar o severo thaj katar o jugo thaj bešena pale sinija ando carstvo e Devlesko.‡ 30 Thaj dik, okola save si akana prve askal avena pe poslednjo than, a okolen save akate smatrin kaj si poslednje avena majbare.”§

*E Isusešće si phare palo Jerusolim*

(Mt 23,37–39)

31 Ande godova časo aviline varesave fariseja thaj phendine e Isusešće: “Inklji thaj džatar akatar, kaj o caro Irod kamel te mudarel tut.”

32 A o Isus phendas lenđe: “Džan thaj phenen godole lisicaće:\* ‘Ake, tradav e bilačhe duhonen thaj sastarav ađes thaj thejara, thaj trito

\* **13,21** Ando original ramol “trin mere” save si varekaj katar 40 kile. † **13,27** či džanav ko sen Aver alavenca: “Najszen mungre drugarja niti mungri familija thaj najszen akharde pe mungri gozba.” ‡ **13,29** But e židovurja save pretpostavin kaj si deo e Devlešće carstvosko či avena ande leste. A but okola save naj židovurja andar sa e krajurja e themešće avena uključime ande Devlesko carstvo § **13,30** Ando original ramol: “Okola save si prve avena palune, a e palune avena prve.” Te aves “prvo” prestavil važnost ili čast. Aver alavenca: “Avela majvažno ... avela majcara važno”, ili: “O Del počastila ... o Del ladžarela”. \* **13,32** lisicaće: Sago e lisice, o Irod sas lukavo thaj štetočina, ali vi kukavica thaj beznačajno.

des avava gata.’<sup>33</sup> Ali ades, thejara thaj overthara moraš te nastaviv o drom kaj valda e prorokurja naštik aven mudarde avrjal o Jerusolim.

<sup>34</sup> Manušalen andar o Jerusolim, tumen save mudaren e prorokonen thaj barenca čuden tumen ande okola saven o Del bičhaldas! Kozom drom lijem te štitiv e čhavren tumaren sago kaj e khanji pire pujoren tale pire phaka a tumen či kamline!<sup>35</sup> Ake akana, tumaro čher avela pusto!† Thaj phenav tumende, či dičhena man dok či avel o časo kana phenena: ‘Blagoslovime o kova savo avel ando alav e Gospodesko!’”‡

## 14

### *O Isus palem sastarel ando savato*

<sup>1</sup> Jek savato avilo o Isus ando čher ke jek vođa e farisejengo te hal lesa. Okola save sas okote lače lenas sama pe leste so čerela.<sup>2</sup> Kaj pojavisajlo anglo Isus varesavo manuš savo sas nasvalo gajda kaj sas les paj thaj šuljolas lestar.<sup>3</sup> Pe godova o Isus phučla e sikavne e Mojsiješće zakonestar thaj e farisejen: “Dali si muklino prema e Mojsijesko zakono te savatone sastarelpes o manuš ili naj?”<sup>4</sup> A von khanči či phendine. Askal o Isus čhuta pire vas po nasvalo manuš, sastardale thaj phendas lešće kaj šaj džaltar.<sup>5</sup> A o Isus phendas: “Ko tumendar savatone či čerel bući? Ako varekašće tumendar o čhavro ili o guruv perel ande haing, zar či odma inkalena les?”<sup>6</sup> Pe godova naslen so te phenen.

### *O Isus sikavel te avas ponizne*

<sup>7</sup> Kana o Isus dikhlas sar okola kaj si akharde pe gozba len pešće prve thana te bešen, phendas lenđe e usporedba:<sup>8</sup> “Kana vareko akharel tut pe svaturja, na beš po prvo than kaj so ako si akhardo vareko ko si majvažno tutar?<sup>9</sup> Te či o domačino savo akhardas tut thaj vi les phenela tuće: ‘Ušti thaj de o than okole manušesće.’ Askal ladžavoja, ušteja thaj bešeja po paluno than.

<sup>10</sup> Nego kana vareko akhareltut dža thaj beš pe paluno than, thaj kana avela okova kaj akhardatut, phenel tuće: ‘Drugarina pripremisdem tuće majlačho than!’ Askal aveja počastime angle sa save si akharde.<sup>11</sup> Kaj svako ko korkoro pes uzvisisarel, avela ponizime, a ko korkoro pes ponizil, avela uzvisime.”

<sup>12</sup> A askal o Isus boldapes ko domačino thaj phendas lešće: “Kana čeres habe ili večera, na akhar čire drugaren, ni čire phralen, ni čire familija, ni čire barvale komšijen, te či vi von možda tut akhardinesas thaj pe akava način boldinesas tuće.<sup>13</sup> Nego kana čeres gozba akhar e čoren, sakaten, banđen, thaj koren.<sup>14</sup> Kaj len naj sova te bolden tuće. Gajda aveja blagoslovime kaj o Del pale godova nagradila tut kana vo vaskrsnila e pravedne manušen andar e mule.”

### *O Isus phenel pale bari gozba ande Devlesko carstvo*

(Mt 22,1–14)

<sup>15</sup> Kana godova ašunda jek katar e manuša pale sinija, phendas e Isusešće: “Blago okolešće savo hala ando carstvo e Devlesko!”

† **13,35** O Jerusolimsko them odbacisardas e Isuse sago e Mesija. O Del akana odbacil len thaj majbut či štitila len. Maj posle e rimsko vojska uništisardas o Jerusolim (70 brš palo Hristo.)

‡ **13,35** O Isus palem boldela pes pe phuv. Askal o them andar o Jerusolim pindžarena kaj si vo o Mesija.

<sup>16</sup> A o Isus phendas lešće: “Varesosko manuš ćerda bari večera thaj akhardas e but e themes. <sup>17</sup> Kana e večera sas gata, bičhald e sluga te phenel e gostonende: ‘Sa si gata. Aven!’ <sup>18</sup> A von jek pale avreste phendine kaj naštik te aven. O prvo phendas lešće: ‘Ćindem njiva thaj trubul te džav te dikhavla. Molivtu, jartosar man ke godova manuš.’ <sup>19</sup> Aver phendas: ‘Ćindem deš guruva, thaj trubul te džav te isprobi ven dali si lače. Molivtu, jartosar man ke godova manuš.’ <sup>20</sup> O trito phendas: ‘Upravo ženisajlem thaj zato naštik te avav.’\* ”

<sup>21</sup> O sluga boldape thaj javisarda godole domačinešće. Askal o domačino holjajlo, thaj phendas e slugašće: ‘Inklji brzo pe sokača e gavešće thaj an akaring e čoren, sakaten, koren thaj e banden.’ <sup>22</sup> Kana o sluga gajda ćerdas, javisardas e Gospodarešće: ‘Gospodarina, ćerdo si so phendan thaj još si than.’ <sup>23</sup> O gospodari phendas e slugašće: ‘Inklji pe droma avrajl o gav thaj trade len te aven te pherdol mungro čere themesa. <sup>24</sup> Kaj phenav tumende: Ni jek katar okola manuša save sas majsigo akharde či hana ni zalogajo katar e gozba savi ćerdem.’ ”

*E manuša trubun te aven potpuno predaime e Isusešće  
(Mt 10,37–38; 5,13; Mk 9,50)*

<sup>25</sup> E Isuseja putuilas o silno them. O Isus boldape thaj phendas lende: <sup>26</sup> “Ako vareko kamel te avel mungro učeniko, moraš te volil man majbut† nego pire dade, deja, romnja, čhavren, phralen, phejen, pa majbut vi katar piro trajo. Inače naštik avel mungro učeniko! <sup>27</sup> Ko či lel piro trušul thaj či džal pale mande thaj naj spremno te merel pale mande, naštik avel mungro učeniko!‡ ”

<sup>28</sup> Kaj khonik tumendar, kana kamel te sagrađil e kula, či prvo bešel thaj proračunil e troškurja te dičhel dali sile sova te završil. § <sup>29</sup> Inače šaj dogodisajlo sas lešće te uspil samo te čhol o temelji thaj naj les dosta love te završil, a askal savora save godova dikhlinesas mardinesas muj lestar <sup>30</sup> thaj phenena: ‘Akava manuš počnisarda te gradisarel a naštik završil!’

<sup>31</sup> Ili savo caro teljardasas ando rato aver caronenca a te majsigo či bešel thaj gndil dali šaj pire deš milje vojniconenca te svladil okoles savo avel pe leste pire biš milje vojniconenca? <sup>32</sup> Ako procenil kaj naštik te svladilen, bičhalela pire manušen te roden miro dok si lende

\* **14,20** Godola manuša save sas akharde pe gozba uvredisardine e caro. Pale gozba sas već dumut obavestime, a akana kana avili e vrjama te aven, von izmišljlin hohamne thaj smešne razlogurja. Sostar vareko ćindasas e njiva savi nikada či ni dikhlas ili ćindasas e guruven save či pregledisardas, ili trubujasas sasti vrjama te ačhel čere te avel pire romnjasa? Inčaren piro imetko thaj piri familija sago kaj si majvažno katar o gospodari. O Isus upozorisardas kaj e love, imanje, familija nikada či trubuiņasas te aven maj važne katar o Del (dik o retko 25-33 tele). † **14,26** Ando original ramol: “Ako vareko avel mande thaj či mrzal pire dades ... naštik avel mungro učeniko”. Akate si “mrzal” preuveličime pale majcikni ljubav savi e manuša trubun te sikaven e manušenje osim e Isusešće. ‡ **14,27** Akaja metafora značil kaj moraš te pokorinpe e Devlešće thaj te aven spremne te patin pe bilo savo način te avilinasas e Isusešće učenikurja. Sago kaj e manuša andar o Rimo često tradenas e manušen te inđaren pire trušula maj sigo nego so sas čače razapnime sago znako kaj pokaisajle. O Isus či gndil kaj svako hrišćanino trubul te avel razapnime. E manuša andar o Rimo često tradenas e manušen te inđaren pire vlastite trušula maj sigo nego so razapnisardine len sago o znako kaj pokorisajle ando Rimo. § **14,28** Aver alavenca: “na teljaren pale mande dok či utvrđin kozom mola tumen”.

protivnikurja još dur po drom. <sup>33</sup> Zato khonikal naštik postanil mungro učeniko savo či mućel sa so siles zbog mande.”\*

*E Isusešće učenikurja si korisne sago o lon*

(Mt 5,13; Mk 9,50)

<sup>34</sup> Askal o Isus još phendas lenđe: “O lon si lačo. Ali ako o lon naj londo, sova askal londarelape? <sup>35</sup> O bilondo lon naj lačo ni pale phuv, ni palo gnoište, nego samo te čhudelpes. Ašunen kana već situmen kan!”

## 15

*Prispodoba pale hasardi bakhre*

(Mt 18,12–14)

<sup>1</sup> Oko o Isus ćidapes o but e carinikurja thaj e bare bezehale manuša te ašunen les sar sikavel. <sup>2</sup> Zato e fariseja thaj sikavne e Mojsiješće zakonestar mrmljinas: “Družilpes e bezehalenca thaj još čak vi hal lenca!”\*

<sup>3</sup> Pe godova o Isus phendas lenđe akaja usporedba: <sup>4</sup> “Ko tumendar, ako siles šel bakhre thaj hasarel ječe či mućela okolen injavardeš thaj inja ande divljina,† thaj či đelosas te rodel godole ječe dok či aračhel les? <sup>5</sup> A kana aračhel les, pherdo bah čhol les pe dume <sup>6</sup> thaj boldel les čhere thaj čim aresel čhere akharel pire komšijen thaj pe drugaren thaj phenel lenđe: ‘Raduintumen manca! Arakhlem mungre hasarde bakhres.’ <sup>7</sup> Phenav tumenđe, gajda savora ando nebo avena maj bahtale pale jek bezehalo manuš savo obratilpe e Devlešće nego pale injavardeš thaj inja save gndin kaj si pravednikurja thaj kaj či trubun te obratines ko Del.”‡

*E usporedba pale manušnji savi hasardas e love*

<sup>8</sup> O Isus phendas lenđe: “Savi godoja manušnji ako sila deš rupa,§ thaj jek hasarel, či del jag o stenko, thaj lače šlavel o čher rodel dok či aračhel les? <sup>9</sup> A kana aračhel les, akharel pire komšinicen thaj pire drugaricen thaj phenel lenđe: ‘Raduin tumen manca! Arakhlem o rup savo hasardem.’ <sup>10</sup> Phenav tumenđe, kaj gajda e Devlešće anđelurja raduina pes pele jek bezehalo savo obratil pes.”

*Prispodoba palo hasardo čhavo*

<sup>11</sup> Thaj o Isus nastavisarda te ćerel svato: “Varesave manuše sas duj čhave. <sup>12</sup> O maj terno phenda pire dadešće: ‘Dade, deman akana

\* **14,33** Lače si kana vareko želil te avel e Isusesko učeniko, ali ako vareko pokušil te sledil e Isuse a te či indarel piro trušul thaj odreknilpes katar sa so siles, postanil beskorisno sago okova savo kamlas te gradil a nas les love te završil ili sago o caro savo đelo ande bitka savi naštik pobedisardas. \*

**15,2** thaj još čak vi hal lenca. E fariseja či hanas ande čhera e manušenđe save či poštuinas lenđe stroge zakonurja oko o thoipe e vastengo, deš posto thaj te halpes o odredime habe, kaj daranas kaj godova ćerela e farisejen te aven nečiste thaj kaj zbog godova o Del či prihvatila len. † **15,4** Godova sas verovatno o pašnjako pe savo e bakhre bezopasno čarjonas. Paše sas verovatno vi e aver čobanurja save aračhenas pire bakhre thaj šaj pomožin lenđe te len sama pe lenđe. ‡ **15,7** injavardeš thaj inja save gndin kaj si pravednikurja thaj kaj či trubun te obratines ko Del O Isus koristil o sarkazam sar phendasas kaj e fariseja naj ando pravo zato kaj gndin kaj von či trubun te pokain pes. Aver alavenca: “Injavardeš thaj inja manuša sago tumen, save gndin kaj si pravedne thaj kaj gndin kaj či trubun te pokain pes.” § **15,8** deš rupa Ando grčko originalno ramol: “deš drakmi”. Askal sas jek rup prosečno počin pale jek đes.

mungro naslestvo savo pripadil mande.' Taj o dad podelisarda o barvalipe.

<sup>13</sup> Kana nakhline varesave đesa o majterno čhavo čidas sa piro, taj otputuisarda ande dur e phuv thaj okote potrošisarda sa piro barvalipe pire bilače trajosa. <sup>14</sup> Kana potrošisarda sa, dija e bari bok ande godoja phuv, thaj nas les so te hal. <sup>15</sup> Askal đelo thaj zaposlisajlo sago sluga ke jek manuš ande godoja phuv thaj čarjarelas lešće balen.\* <sup>16</sup> O čhavo sas gajda bokhalo kaj rado halasas vi e ljuške katar e maune save† hanas e bale, ali khonikal či delas len lešće.

<sup>17</sup> Kana napokon avilo peste, phendas: Ke mungro dad e najamnikonen si habe gaći kaj uvek vi ačhel, a me akate merav bokhatar! <sup>18</sup> Uštava, teljarava ke mungro dad thaj phenava lešće: 'Dade, sagrašisardem protiv tute thaj protiv o Del ando nebo! <sup>19</sup> Najsem majbut dostojno te akharama čire čhavesa. Primima sago ječe katar čire najamnikurja.'

<sup>20</sup> Uštalo thaj teljarda ke piro dad. Dok sas još dur katar piro čer, lesko dad dikhla les dok sas još po drom thaj sažalisajlo pe leste thaj prastajas angle leste, dijales mrtiko thaj čumida les. <sup>21</sup> A o čhavo phendas lešće: 'Dade, sagrašisardem protiv tute thaj protiv o Del! Najsem majbut dostojno te akharama čire čhavesa.'

<sup>22</sup> A o dad phenda e slugende: 'Brzo inkalen e majšukar haljina thaj den pe leste! Čhon lešće e angrušći‡ po naj thaj e sandale pe lešće pungre!§ <sup>23</sup> Anen e maj thule guruve thaj denle čhurjasa, pa te pogostime thaj te veselime <sup>24</sup> Kaj akava mungro čhavo sas mulo thaj akana boldapes ando trajo, hasardo sas thaj akana arakhadilo!' Taj počnisardine te veselinpe.

<sup>25</sup> Pale godoja vrjama lesko majpurano čhavo čerelas bući ande njive. A kana boldape thaj sas već paše, andar o čer ašundolas e muzika thaj o čhelipe. <sup>26</sup> Pa akhardas ječe slugo te phučel so si godova. <sup>27</sup> A o sluga phendas: 'Boldapes čiro phral thaj čiro dad dija čhurjasa e thule guruve kaj te proslavil kaj lesko čhavo boldapes džudo thaj sasto.'

<sup>28</sup> O maj purano phral holjajlo thaj či kamla te del andre. Askal o dad inkljisto thaj počnisarda te molil les te del andre. <sup>29</sup> A vo phendas pire dadešće: 'Me ake gaći brš služiv sago robo tuće thaj nikada či obisardem te čerav so phendan mande, a tu nikada ni jarco či dijanman te proveseliman mungre drugarenca. <sup>30</sup> A kana avilo kava čiro čhavo savo e kurvenca haljarda sa čiro barvalipe, tu dijan lešće čhurjasa maj thule guruve.'

<sup>31</sup> Pe godova o dad lesko phendas lešće: 'Čhaveja, tu san uvek manca thaj sa mungro vi čiro si. <sup>32</sup> Ali trubul te radujimen thaj veselimen kaj akava čiro phral sas mulo thaj akana boldapes ando trajo, hasardo thaj arakhadilo!' "

\* **15,15** O židovsko zakono phendas kaj si e bale nečiste životinje. Prema akava zakono, e židovurja či tromaie te han balano. Dik 2. Mojs 11,7. Dakle, o židovsko them mrzalas e balen thaj e manušen save vodinas e briga pale bale. † **15,16** e ljuške katar e maune Kava sas e ljuške maunurja save barjon pe rogačengo kaš. ‡ **15,22** e angrušći E angrušći sas znako palo často thaj autoriteto. § **15,22** e sandale pe lešće pungre Kana vareko indarelas e sandale godova sikavelas kaj si godova manuš slobodno, a naj robo.

## 16

*Koristin akale themesko barvalipe te steknin tumende barvalipe ando nebo*

<sup>1</sup> O Isus askal phenda pire učenikonende e usporedba: “Sas varesavo barvalo manuš saves sas baro sluga saves e manuša prnas kaj rspil o barvalipe pire gospodaresko. <sup>2</sup> O barvalo manuš akharda pire bare sluga thaj phendas lešće: ‘So godova ašunav pale tute? Sikav mande o računo kaj ramosardan sar vodijas e briga pale mungro barvalipe zato kaj majbut naštik aves mungro baro sluga!’

<sup>3</sup> Pe godova o baro sluga phendas ande peste: ‘So te ćerav kana mungro gospodari či del više te ćerav bući pale leste? Te džav te hanavav najman snaga. Te prosiv? Ladžavo si mande. <sup>4</sup> Džanav so ćerava! Thaj kana gajda ćerava e manuša lače primina man ande pire ćera,\* kana majbut či avava e gospodaresko baro sluga.’

<sup>5</sup> Askal akhardas ječe po ječe katar o kola save sas udžile lešće gospodarešće. Thaj phučas e prvo manuše savo sas udžile: ‘Kozom san udžile mungre gospodarešće?’ <sup>6</sup> ‘Šel bačve† maslinsko zetino’, phendas o kova savo sas udžile. A o baro sluga phendas lešće: ‘Le ćiro računo beš thaj odma ramosar pandžvardeš.’

<sup>7</sup> Pale godova phendas e averešće: ‘A tu, kozom san tu udžile?’ ‘Šel mere‡ div.’ Phendas vi lešće: ‘Le ćiro računo thaj ramosar pe ohtovardeš.’

<sup>8</sup> Thaj o gospodari pohvalisarda e bilače bare slugas kaj sas snalažljivo. Kaj e manuša akale themešće§ maj snalažljivo postupin prema okola save si lenđe slične nego e manuša katar o svetlost.\* <sup>9</sup> A me phenav tumende, steknin tumende drugarja gajda kaj ispravno koristin akale themesko barvalipe thaj kana o barvalipe majbut či avela korisno o Del primila tumen ande večne stanurja ando nebo.†

<sup>10</sup> Ako šaj pačas e manušešće ande cikne buća, askal šaj pačas lešće vi ande bare buća thaj ako naštik pačas e manušešće ande cikne buća askal naštik pačas lešće ni ande bare buća. <sup>11</sup> Ako najsenas paćivale ande e themesko barvalipe, sar o Del poverila tumende duhovno barvalipe te upravin lesa? <sup>12</sup> Thaj ako ande averesko barvalipe najsenas paćivale, sar o Del delatumen tumaro?

<sup>13</sup> Ni jek sluga naštik služil duje gospodaren ande isto vrjama. Kaj ječe mrzala, a avere volila; ili ječešće avela paćivalo a avre prezirila. Naštik služin e Devlešće thaj e barvalipešće ande isto vrjama.”

<sup>14</sup> Sa gadava ašundine okola save sas pohlepne pale love e fariseja, thaj marenas muj katar o Isus. <sup>15</sup> A o Isus phendas lenđe: “Tumen

\* **16,4** e manuša lače primina man ande pire ćeraNadisajlo kaj šaj trailas godole manušenca thaj kaj von vodina e briga pale leste. † **16,6** Šel bačve Ando original ramol: “Šel bata”. Godova sas varekaj katar 3.000 litre. ‡ **16,7** Šel mere Ando original ramol: “Šel kôrova”. Sas varekaj katar 20.000 kile. § **16,8** e manuša akale themešće Akava odnosil pes pale okola save si sago o nepravedno upraviteljo savo či pindžarel e Devles ili či maril pale leste. Aver alavenca: “E manuša akale themešće”. \* **16,8** e manuša katar o svetlost “Svetlo” akate phenel palo Del ili palo pravedno ponašanje. Aver alavenca: “E Devlešće manuša”, ili “e manuša save train ando svetlo”. † **16,9** primila tumen ande večne stanurja ando nebo. Akava značil kaj o Del, savo si zadovoljno kaj koristin e love gajda te pomožin averende, ili Drugarja, savende pomožinas tumare lovenca, ažućarena tumen ando nebo.

čerén tumen kaj sen pravedne anglo them, ali džanel o Del tumare ile. Kaj so e manuša smatrisaren vredno, e Devlešće grjacolpe.”

*E Devlesko zakon važil zauvek  
(Mt 11,12–13; 5,18, 31–32)*

<sup>16</sup> Askal o Isus phenda lenđe: “E Mojsijesko zakono thaj e knjige save ramosardine e purane prorokurja sikavenas pe sa dok či avilo o Jovano savo bolelas, a katar askal navestilaspe e bahtali nevimata palo carstvo e Devlesko. Thaj katar askal nagovorisarar savoren te den ando carstvo e Devlesko. <sup>17</sup> Ali godova či značil kaj e Mojsijesko zakon majbut či vredil kaj maj loće nestanila o nebo thaj e phuv, nego te propadnil jek tačkica andar o zakono.

<sup>18</sup> Sago kaj ramol ando zakon: svako ko rastanilpe katar piri romnji thaj lel avrja, čerel preljub; thaj ko oženilpe e romnjasa savi si rastanime, preljub čerel.”

*O čoro Lazar thaj o barvalo manuš savo či incarelas o zakon*

<sup>19</sup> Askal o Isus nastavisarda: “Sas varesosko barvalo manuš, savo lelas pe peste majšukar thaj maj kuč drze, trailas svako đes raikane thaj veselilaspe. <sup>20</sup> A angle lesko vudar pašljolas varesavo čoro manuš savo sas sa ande čirurja. Lesko alav sas Lazar, <sup>21</sup> thaj čeznilas samo te čaljol e prušukenca save perenas katar e barvalesči sinija. Dok gajda pašljolas avenas e džučhela thaj čarnas e čirurja pe leste. <sup>22</sup> A kana mulo o čoro, e anđelurja inđardinele ande Avraamešće angalja.† Pale godova mulo vi o barvalo manuš, thaj prahosardine les. <sup>23</sup> A lešči duša đeli po than kaj si e mule, § thaj dok sas ande bare muke vazda pire jakha thaj dadural dikhlas e Lazare ande Avraamešće angalja.

<sup>24</sup> Thaj čhutas muj: ‘Dade Avraame, smiluitu mande thaj bičhal e Lazare te umočil piro naj ando paj thaj šudrjarel mungri čhib kaj zurales mučiman ande kava plameno.’

<sup>25</sup> Pe godova phendas o Avraam: ‘Detut gođi, čhaveja, kaj tu pale čiro trajo primisardan čiro lačhipe, a gajda vi o Lazar piro bilačhipe. Akana vo akate tešilpe, a tu mučistu. <sup>26</sup> Osim godova, maškar amende thaj tumende si bari provalija, thaj vi okola save kamlinesas naštik načhen okotar akaring, niti akatar okoring.’

<sup>27</sup> Pe godova o barvalo manuš phendas: ‘Molivtu askal, dade, bičhal e Lazare ando čher mungre dadesko. <sup>28</sup> Kaj siman pandž phral pa neka džal thaj upozoril len te na vi von aven akaring ande kava than e mukengo.’

<sup>29</sup> A o Avraam phendas lešće: ‘Opominlen o Mojsija thaj e prorokurja ande prire zapisurja. Neka čiton len thaj čhon kan lende.’

<sup>30</sup> A vo phendas: ‘O na, dade Avraame! Nego te avilo lende vareko andar e mule, obratinape.’

<sup>31</sup> A vo phendas lešće: ‘Ako či ašunen e Mojsija thaj e prorokonon, či pačana sa vi te uštel thaj avel lende vareko andar e mule.’ ”

† **16,22** ande Avraamešće angalja Ando original ramol: “Po kolin e Avraamesko” ili “ande angalja e Avraamešće”. Akava podrazumilpe o Avraam thaj o Lazar pašljonas jek paše avreste sago kaj halaspe pe grčke gozbe. E bah ando nebo si često sikadi ando alav e Devlesko ande slike e gozbaće. § **16,23** Ando original ramol: “Had”. Nazivi “Had” thaj “šeol” koristilpe ande Bibliji ando odnos po smrto thaj po than kaj džan e manušenđe duše kana o manuš merel

## 17

*O Isus sikavel e učenikon te aven poslušne e Devlešće*

*(Mt 18,6–7; 15; 21–22; Mk 9,42)*

<sup>1</sup> O Isus phendas pire učenikonende: “O iskušenje moraš te avel, ali teško e manušeće kroz savo avel o iskušenje. <sup>2</sup> Kasave manušeće avilosas majlače te unglaven lešće o mlinsko bar oko e kor thaj te čhuden les ando more, nego te crdel po bezah ječe katar akala manuš a saven si cara pačipe. <sup>3</sup> Upozoriv tumen! Ako čiro phral savo si verniko pogrešil, ukori les thaj jartosar lešće ako pokailpes. <sup>4</sup> Pa ako vi efta drom po đes sagrešil protiv tute thaj efta drom po đes avel thaj phenel tuće: ‘Jartosar mande. Pogrešisardem!’, jartosar lešće.”

<sup>5</sup> E apostolja phendine e Gospodešće: “Trubulamen majbut pačipe. Phen amende sar te dobis!”

<sup>6</sup> O Gospod phendas lende: “Te aveltumen pačipe gajda cara sago kaj si e gorušicako zrno, phendinesas akale dudošće: ‘Inkaltu e korenosa thaj presaditut ando more!’, thaj vo presadisajlosas.

<sup>7</sup> Ko tumendar phenela pire slugašće savo oril ili lel sama pe stoka, kana boldela pes andar o polje thaj del ando čher: ‘Av brzo thaj beš pale sinija?’ <sup>8</sup> Či umesto godova phenena lešće gajda: ‘Čer mande večera! Čhov e kecelja pe tute thaj služisar man dok hav thaj pijav, pale godova tu haja thaj pijeja?’ <sup>9</sup> E slugašće pale godova či zahvalilpe kaj vo samo čerel piri buči. <sup>10</sup> Gajda vi tumen: kana sen poslušne e Devlešće, phenen: ‘Sluge sam save či zaslužisaras pohvala! Čerdam samo so samas udžile te čeras!’”

*O Isus sastarel e deš manušen saven sas morčhako nasvalipe*

<sup>11</sup> Gajda dok putuilas majdur prema o Jerusalim, o Isus načelas maškar e Samarijači thaj e Galilejači regija. <sup>12</sup> Kana delas ande varesosko gav, angle leste avile deš gubavcurja. Ačhiline cara maj dur <sup>13</sup> thaj počnisardine te čhon muj: “Isuse, Sikavneja, smiluitu amende!”

<sup>14</sup> Kana o Isus dikhla len, phendas lende: “Džantar, thaj sikaven tumen e rašajende te dičhen tumen thaj phenen dali sen saste!”, thaj dok džanas dromesa sastile katar e guba.

<sup>15</sup> Jek lendar dikhla kaj sastilo, boldape thaj slavisarda e Devle andar sasto glaso. <sup>16</sup> Čhudape pe koča angle Isusešće pungre thaj zahvalisarda lešće. A sas godova varesavo manuš andar e Samarija.

<sup>17</sup> O Isus phučla: “Či li sastile deš džene? Kaj si okolainja? <sup>18</sup> Dali nijek lendar či boldape te del slava e Devlešće osim akava tuđinco?”

<sup>19</sup> Askal phenda e manušeće savo sastilo: “Ušti thaj dža. Čiro pačipe ande mande spasisarda tut!”

*O Isus phenel kaj avel o carstvo e Devlesko ande vrjama kana či nadimen*

*(Mt 24,23–28, 37–41)*

<sup>20</sup> E fariseja phučline e Isuse: “Kana avela o carstvo e Devlesko?”

A vo phenda lende: “O carstvo e Devlesko či avela e znakonenca save e manuša šaj promatrin gajda te šaj dičhelpes. <sup>21</sup> Naštik phenela pes: ‘Aketalo akate!’, ili: ‘Eketalo okote!’ Ake o carstvo e Devlesko si maškar tumende!”

<sup>22</sup> Pale godova phendas e učenikonende: “Avela e vrjama kana kamena te dičhen jek katar e đesa kana me, o Čhavo e Manušesko,

vladiva sago o caro, ali či dičhena godova đes. <sup>23</sup> Askal phenena tumenđe: ‘Eketalo okote, aketalo akate!’ Ali na džan thaj na prasten inča! <sup>24</sup> Kaj sago e munja kaj sevil pe jek krajo e nebosko thaj rasvetlil sa dži ke aver krajo, gajda avela vi manca, e Manušesće Čhavesa, ando mungro đes. <sup>25</sup> Ali majsigo trubuv but te pretrpisarav thaj akava naraštaj trubula te odbacilman.”

<sup>26</sup> “Thaj sago kaj sas dumut kana trailas o Noje, gajda avela vi ando đes kana avava me o Čhavo e Manušesko: <sup>27</sup> e manuša hanas, pijenas, ženinas pes thaj udainas pes dži ko đes dok o Noje či dijas ando baro brodo, thaj avilo o potop thaj uništisardas sa so nas ando baro brodo.

<sup>28</sup> Askal avela sago kaj sas dumut kana trailas o Lot: Kana e manuša ando gav savo akhardolas Sodoma, hanas thaj pijenas, činenas thaj bičinenas, sadinas thaj gradinas, <sup>29</sup> sa dži ke detharin kana o Lot inkljisto andar o gav Sodoma, a askal andar o nebo zapljuštisarda e jag thaj o sumpor thaj uništisardas sa okolen save ačhiline ando gav. <sup>30</sup> Isto gajda iznenada avela ando đes kana boldava man me o Čhavo e Manušesko. <sup>31</sup> Gajda ande okova đes, ko avela po krovo, a lešće stvarja si ando čher, neka na fuljel te lel len. Thaj ko si ande njive, neka či boldel pes palpale te lel vareso pesa.\* <sup>32</sup> Dentumen gođi sar muli e Lotošće romnji!† <sup>33</sup> Kaj ko lela sama pe piro trajo te aračheles, hasarela les; a ko hasarel piro trajo zadobila les palo večnost.” <sup>34</sup> Phenav tumenđe, ande koja rjat kana me boldava man avena duj džene ande jek kreveto. Jek lelape, aver mućelapes. <sup>35</sup> Duj džene meljina zajedno. Jek lelape, a aver mućelapes. <sup>36</sup> ‡ Duj džene avena ando polje, jek avela lino a aver ačhela.

<sup>37</sup> Pe godova e učenikurja phučlineles: “A kaj godova Gospode?”

A o Isus phenda lenđe: “Avela očito sago vi akaja poslovica: ‘Kaj si e mule telurja, kote vi e lešinarja čidenape.’”§

## 18

### *O Isus sikavel kaj ustrajno trubul te molimen*

<sup>1</sup> Askal o Isus phenda e učenikonenđe e usporedba te sikavel len sar uvek trubun te molinpe, thaj sar nikada či trubun te odustanin. <sup>2</sup> Thaj phendas: “Ande jek gav sas jek sudija savo či daralas e Devlestar a e themestar či ladžalas. <sup>3</sup> A ande godova gav sas vi jek udovica savi stalno avelas leste thaj molilas les: ‘Demam pravda angle mungro protivniko.’ <sup>4</sup> O sudija varesavi vrjama či marilas pale godova, ali napokon phenda: ‘Vi ako či darav katar o Del thaj či mariv pale manuša, <sup>5</sup> ali dava pravda akale udovica, kaj ako či dav lat pravda, dosadila mande dok či dobil piro pravo, kaj stalno dosadil man!’ ”

<sup>6</sup> Askal phendas o Gospod Isus: “Dičhen sar ispravno postupisarda o nepravedno sudija. <sup>7</sup> Kaj o Del strpljivo čhola kan ke lenđe molitve thaj pobrinila pe te dobin pravda okola save pripadin lešće thaj vapin

\* **17,31** Lenđe krovurja sas ravne thaj e manuša šaj phirenas ili bešenias pe lende. † **17,32** Voj dikhlas palapeste palpale karingal e Sodoma thaj o Del kaznisardala zajedno e manušenca andar e Sodoma. ‡ **17,36** Varesave grčke rukopisurja silen akava stiho: “Duj avena ande njiva. Jek lelape, a aver mućelapes.” § **17,37** Kana e manuša dičhen e lešinaren sar čiden pes, džanen kaj si okote o mulo telo. Po isto način, savorende avela očito kaj avel e Devlesko sudo.

lešće o đes thaj e rjat. <sup>8</sup> Phenav tumenđe kaj brzo dela len pravda. Ali kana me, o Čhavo e Manušesko, boldavaman pe phuv, dali arakhava kasavo paćipe?”

*O Del opravdil e poniznen*

<sup>9</sup> Askal o Isus phendas još akaja usporedba varesavende save sas uverime ande piri vlastito pravednost, a averen prezirisarenas: <sup>10</sup> “Duj manuša đele ando Hramo te molinpe. Jek sas farisejo a aver cariniko. <sup>11</sup> O farisejo ačhelas thaj molilas pes pale peste: ‘Devla, nais tuće kaj najsem sago aver manuša, grabežljivo, nepravedno, preljubnikurjo, ili sago akava cariniko. <sup>12</sup> Me postiv duvar ando kurko; dav deš posto katar sa so siman.’

<sup>13</sup> A o cariniko, ačhelas majdur, thaj či usudilaspe ni pe jakha te vazdel prema o nebo, nego pećelaspe ando koliin te sikavel piri tuga thaj phenelas: ‘Devla av milostivo mande bezehalešće!’ <sup>14</sup> Phenav tumenđe: vo boldape čhere pravedno anglo Del, a na o farisejo! Kaj svako ko korkoro pes uzvisisarel, avela ponizime, a ko korkoro pes ponizil, avela uzvisime.”

*E Devlesko carstvo pripadil okolenđe save si ponizne sago čhavra*

<sup>15</sup> A e Isusešće anenas vi e majcikne čhavroren te čhol pire vas pe lende thaj blagoslovilas len. Kana godova dikhline e učenikurja, počnisardine te ačhaven len alavenca te na čeren godova. <sup>16</sup> A o Isus akharda len thaj phendas: “Mućen e čhavroren te aven mande thaj na branin lenđe, kaj kasavende pripadil o carstvo e Devlesko.” <sup>17</sup> “Čaćes, phenav tumenđe, savo či primil o carstvo e Devlesko sago cikno čhavro, či dela ande leste.”\*

*Khanči či tromal te avel maj bitno katar godova te služisaras e Devlešće*

(Mt 19,1–30; Mk 10,17–31)

<sup>18</sup> Varesavo židovsko vođa phučlas e Isuse: “Lače sikavneja, so trubul te čerav te dobiv o večno trajo?”

<sup>19</sup> A o Isus phendas lešće: “Sostar man akhares lačheja?† Khonikal naj lačo, nego li samo o jedino Del. <sup>20</sup> A e zapovedi andar o Mojsijesko zakon džanes: ‘Na čer preljub’, ‘Na mudar’, ‘Na čor’, ‘Na svedočisar hohamne’, ‘Poštuisar čire dades thaj čire deja’.”

<sup>21</sup> A vo phendas: “Sa gadava čerav katar mungri ternipe.”

<sup>22</sup> Kana godova ašunda o Isus, phendas lešće: “Još jek ačhilo tut: sa so si tut bićin thaj podelisar e čorende thaj avela tu barvalipe ando nebo. A askal av thaj dža pale mande.” <sup>23</sup> Kana vo godova ašundas, ražalostisajlo kaj sas zurale barvalo thaj či kamlas te bićinel sa so sasle.

<sup>24</sup> O Isus dikhla pe leste thaj phendas: “Sar si phare e barvalešće te del ando carstvo e Devlesko! <sup>25</sup> Maj loće si e kamilaće te načhel kroz e suvjaće kan nego o barvalo te del ando carstvo e Devlesko.”

\* **18,17** O Del kamel katar e manuša te prihvatil lešći vlast pe lende ponizno thaj te potpuno pouzdinpe ande leste. Aver alavenca: “Kogod kamel te del ando carstvo e Devlesko moraš te primil les ando pouzdanje thaj ponizno sago cikno čhavro.” † **18,19** lačheja O Isus phučel akava te dičhel dali e manuše si pravo razumevanje palo e Isusesko identiteto, odnosno, kaj si o Isus Del. Ako o manuš prihvatil les sago e Devles, vo askal prihvatila e Isusesko poziv te bićinel sa so siles thaj te teljarel pale leste.

26 Okola save godova ašundine, phendine: “Pa ko askal šaj spasilpes?”†

27 A o Isus phendas: “So si nemoguće e manušenđe, moguće si e Devlešće.”

28 Askal o Petar phendas: “Ake, amen muklam sa amaro thaj teljardam pale tute te sledisarastut.”

29 A o Isus phendas lenđe: “Čačes, phenav tumenđe, naj godova savo muklasas piro čher, ili pire romnja, ili pire phralen, ili pire dade thaj pire deja, ili pire čhavren zbog o carstvo e Devlesko, 30 a te či već pe akava them primila but maj but nego so muklas, a pe okova them si večno trajo.”

*O Isus po trito drom spominjil piro smrto thaj o vaskrsenje*

*(Mt 20,17–19; Mk 10,32–34)*

31 O Isus ćidas oko peste e dešuduj apostolen, thaj phendas lenđe: “Ake das ando Jerusalim, a okote dogodilape sa so e prorokurja ramosardine ando Sveto lil, pale mande e Manušesće Čhavešće. 32 Von predaina man ande vas e nevernikonenđe, save marena muj mandar, ladžarena man, vređona man, 33 bičuina man thaj mudarena man, ali me o trito đes uštava andar e mule.”

34 A e učenikurja khanči katar godova so o Isus phendas či haćardine. O značenje godole alavengo sas lendar garado thaj naštik haćardine so o Isus phenelas lenđe.

*O Isus sastarel e kore manuše*

*(Mt 20,29–34; Mk 10,46–52)*

35 A kana o Isus avilo paše dži ko gav o Jerihon, varesavo koro manuš bešelasa po drom thaj prosilas. 36 A kana o koro manuš ašunda kaj načhel okotar o but o them, phučlas so si godova. 37 Phendine lešće: “Načhel o Isus andar o Nazaret.” 38 A vo pe godova čhutas muj: “Isuse e Davidešće Čhaveja, § smiluitu mande!” 39 A okola kaj džanas anglal o Isus ačhavenas e kore manuše te na čhol muj, ali vo još maj zurale čholas muj: “E Davidešće Čhaveja, smiluitu mande!”

40 Kana o Isus ašundales ačhilo thaj phendas te anenle leste. Kana e kore manuše andine maj paše o Isus phučlales: 41 “So kames te ćerav tuće?” A vo phendas:

“Gospode, te šaj dikhav.”

42 A o Isus phendas lešće: “Akana šaj te dičhes! Ćiro paćipe sastarda tut.” 43 E kore manušesće jakha odma putajle thaj počnisardas te dičhel, uputisajlo dromesa palo Isus thaj počnisarda te slavil e Devles. Sa o them savo godova dikhla dija slava e Devlešće.

## 19

*O Isus thaj o Zakej*

† 18,26 e Jevreja gndisardine kaj o manuš postanisardas barvalo zato kaj o Del blagoslovisardales zato kaj si godova manuš pravedno. Gndisardine kaj e čore manuša verovatno naj pravedne. Askal kana e manuša save čhonas kan ko Isus phendine kaj si nemoguće te o barvalo manuš del ando carstvo e Devlesko, pretpostavinas kaj e čore manuša naštik nadin pes kaj o Del spasila len katar o sudo. § 18,38 O Isus sas e Davidesko potomko, a o David sas majvažno e Izraelosko caro. “Čhavo e Davidesko” sas titula ili naziv palo Mesija.

<sup>1</sup> O Isus dijas ando Jerihon. Dok načelas kroz o gav, <sup>2</sup> angla leste avilo o manuš savo akhardolas Zakej. Vo sas glavno cariniko thaj sas zurale barvalo. <sup>3</sup> Probilas te dičhel e Isuse, ali sas zurale cikno manuš thaj naštik dikhlas les katar o but o them savo sas oko leste. <sup>4</sup> Vo zato prastaja anglal, thaj lijape opre pe smokva paše savi o Isus trubujas te načhel te šaj dičheles.

<sup>5</sup> Kana o Isus areslo pe godova than, dikhlas opre thaj phendas lešće: “Zakej, brzo fulji tele! Ađes trubul te avav gosto ande čiro čher.”

<sup>6</sup> O Zakej brzo fuljisto tele katar e smokva thaj pherdo bah ugostisarda les ande piro čher. <sup>7</sup> A sa save godova dikhline počnisardine te mrmljan: “Đelo ando čher e bezehalesko!”\*

<sup>8</sup> A o Zakej ačhilo thaj phendas e Gospodešće: “Gospode ake, opaš mungro barvalipe dava e čorende! Thaj ako varekas hohadem, boldav štar drom majbut.”

<sup>9</sup> Pe godova o Isus phendas lešće: “Ađes ande akava čher avilo o spasenje† kaj si vi akava manuš e Avraamesko čhavo!‡ <sup>10</sup> Me o Čhavo e Manušesko avilem te rodav thaj spasiv okova so si hasardo!”§

*O manuš trubul te avel verno dok ažučarel o carstvo e Devlesko (Mt 25,14–30)*

<sup>11</sup> O but o them sa godova ašunenas, a o Isus phendas lenđe još jek usporedba zato kaj sas o Isus paše pašo Jerusolim thaj gndinas kaj odma pojavilape o carstvo e Devlesko.\* <sup>12</sup> Thaj phendas: “Sas varesavo ugledno manuš savo trubuja te otpuuil ande dur e phuv te okote okrunin les sago caros,† a askal te boldelpes. <sup>13</sup> Zato akhardas pire deš slugonen, dijalen svakones po opaš e kila rup so sas štar čhonendi počin,‡ thaj phendas lenđe: ‘Trguin akale rupesa dok či boldaman.’ <sup>14</sup> A e manuša andar lešči phuv mrzanas les thaj bičhaldine pale leste e poslaniko te phenen e majbare carošće: ‘Či kamas te akava caruisarel pe amende.’

<sup>15</sup> Kana vo primisarda piro carstvo thaj boldape palpale, naredisarda te anen lešće okolen slugen savende dijas o rup te ašunel kozom zaradisardine. <sup>16</sup> O prvo sluga avilo thaj phendas: ‘Gospodarina, o iznos savo dijanman čerdem te avel deš drom majbut.’ <sup>17</sup> Phendas lešće: ‘Odlično! Lačo san sluga, zato kaj sanas verno ande cikno, dava tut te vladis pe deš gava!’

<sup>18</sup> Aver sluga avilo thaj phendas: ‘Gospodarina o iznos savo dijanman čerdem te avel pandž drom majbut.’ <sup>19</sup> Phenda lešće: ‘Lače! Vladi pe pandž gava!’

\* **19,7** E židovurja mrzanas e carenikon thaj gndisardine kaj nijek lačo manuš či trubul te družilpe lenca. † **19,9** ande akava čher avilo o spasenje Aver alavenca: “O Del spasisardas e manušen save train ande godova čher.” ‡ **19,9** manuš e Avraamesko čhavo! Aver alavenca: “o manuš saves si pačipe sago kaj sas e Avraam.” § **19,10** so si hasardo Akava značil: “e manušen save odlutisardine katar o Del godolesa kaj čerdine bezah”. \* **19,11** odma pojavilape o carstvo e Devlesko E židovurja pačanas kaj o Mesija uspostavila piro carstvo čim avela ando Jerusolim. Aver alavenca: “Kaj o Isus odmah započnila te vladil pe Devlesko carstvo”. † **19,12** okrunin les sago caros Akava si e slika pale o majcikno caro savo džal e majbare carošće. O majbaro caro dela e majcikne caro pravo thaj autoriteto te vladil pe piri vlastito phuv. ‡ **19,13** Jek mina sas 600 gramurja, verovatno rup. Svako mina sas sago e počin katar 100 denarja, ađes okova so e manušenđe avilosas e počin pale štar čhon, pa deš mine sas e počin varekaj pale trinbrš.

<sup>20</sup> A o trito sluga avilo bi zaradako thaj phenda: ‘Gospodarina, ale tuće čiro rup, savo dijan man. Arakhavas les garado ando dikhloro. <sup>21</sup> Daravas tutar kaj san strogo manuš. Les so či uložisardan, thaj žanjis so či sadisardan.’<sup>§</sup>

<sup>22</sup> Phendas lešće: ‘Pe čire alava aveja osudime, bilačheja slugo! Džanglan kaj sem strogo manuš, kaj lav so či uložisardem thaj kaj čidav kaj či sadisardem? <sup>23</sup> Sostar askal či uložisardan mungre love ande banka? Gajda barem dobisardemas e kamate.’ <sup>24</sup> Pe godova o caro phendas kolende save sas kote čidine: ‘Len lestar o rup thaj den okolešće saves si deš.’

<sup>25</sup> Phendine lešće: ‘Ali gospodarina, pa les već si pandž kile rup!’\*

<sup>26</sup> Phenav tumende phenda lende o caro: ‘Okoles kas si, delape lešće još majbut, a okoles save naj lelape lestar vi okova cara so siles.† <sup>27</sup> A mungre dušmajen kola save čikamline man te me avav caro, anen len akaring thaj mudaren len angle mande.’”

*O Isus del ando Jerusalem sago caro  
(Mt 21,1–11; Mk 11,1–11; Jn 12,12–19)*

<sup>28</sup> Nakon so phendas lende godova, o Isus teljarda majdur karingal o Jerusalem. <sup>29</sup> Kana avilo paše džike gava e Vitfaga thaj e Vitanija save sas pe Maslinsko gor, anglal bičhalda pire duj učenikonen <sup>30</sup> thaj phendas lende: “Džan ando gav savo si angle tumende. Čim den ande leste, arachena phangle terne magarco saves još khonik či jašisarda.‡ Putren les thaj anenles. <sup>31</sup> Ako vareko phučel tumen: ‘Sostar putren e magare?’ Gajda phenen: ‘E Gospodešće trubul.’”

<sup>32</sup> Von đele thaj arakhlina e magarco sago kaj o Isus phenda lende <sup>33</sup> thaj dok e učenikurja putrenas e magare, e magaresko gospodari phendas lende: “Sostar putren e magare?”

<sup>34</sup> A von phendine: “Trubul e Gospodešće.” <sup>35</sup> Andine e magare ko Isus thaj čhutine pire haljine po magarco thaj bešlo o Isus pe leste.

<sup>36</sup> Thaj dok vo gajda džalas po magarco, e manuša buljarenas pire haljine po drom angle leste te sikaven čast e Isusešće. <sup>37</sup> A kana već avilo paše te fuljel katar e Maslinsko gora, e but e manuša save džanas pale leste počnisardine pe sa o glaslo te zahvalin e Devlešće pale sa e čudurja save dikhline. <sup>38</sup> Phenenas:

“Blagoslovime o Caro,  
savo avel ando alav e Gospodesko!  
Po nebo miro  
thaj slava e Devlešće ande visine!”

<sup>39</sup> Pe godova varesave fariseja save sas maškar o them phenenas e Isusešće: “Sikamneja, phen čire učenikonende te na phenen godova.”

<sup>40</sup> O Isus phendas: “Phenav tumende, ako von ačhen, e bara slavina!”

---

§ **19,21** Les so či uložisardan, thaj žanjis so či sadisardan Akava sas verovatno izreka. O manuš savo lel andar o spremište ili andar e banka o lačhipe savo ande lende či čhutine, ili save žanjin o habe savo či sadisardine si metafora pale okova ko okoristilpe katar e phari bući aver manušendi. \* **19,25** Ando original ramol: “deš mine” † **19,26** Aver alavenca: “Svako ko lačhe koristil okova so si lešće dino, delape lešće još ... katar o manuš savo či koristil lačhe okova so si lešće dino lelape lestar...”. ‡ **19,30** saves još khonik či jašisarda Samo e životinja savja khonikal nikada či jašisarda ili koristime pale bući avilosas prikladno e Devlešće ili e carošće (dik 4. Mojs 19,2; 5. Mojs 21,3; 1. Sam 6,7).

*E Isusešće si pharo pale manuša andar o Jerusalem*

<sup>41</sup> Kana o Isus avilo paše dži ko Jerusalem thaj dikhla o gav, o Isus rujas pale manuša andar leste. <sup>42</sup> Thaj phendas: “Sar volisardemas te ađes arakhlinessas o drom e mirosko!Š Ali akana si kasno, thaj o miro si garado tumendar. <sup>43</sup> Avena e đesa kana o dušmano zauzmila čire zidurja, okolina tut thaj čicidela tu katar sa e riga. <sup>44</sup> O Jeruslime sravnina tut e phuvjasa thaj vi čire čhavren ande tute. Či ačhela tutar ni bar pe bareste kaj či pindžardan kaj o Del avilo ande tute.” \*

*O Isus či mućel te trguin ando Hramo*

*(Mt 21,12–17; Mk 11,15–19; Jn 2,13–22)*

<sup>45</sup> Kana o Isus dijas ando Hramo, počnisarda te tradel andar leste e trgovcen. <sup>46</sup> Thaj phenda lenđe: “Ando Sveto lil ramol: ‘Mungro Hramo trubul te avel o čher pale molitva’, a tumen pretvorisardine les ande razbojničko špilja!” †

<sup>47</sup> Pale godova o Isus svako đes sikavelas ando Hramo, a e šorvale rašaja thaj e sikavne e Mojsiješće zakonestar zajedno e gavešće šorvalenca smišljinas sar te mudaren les, <sup>48</sup> ali či arakhlina o način sar te čeren godova kaj o them pažljivo čholas kan ke lesko sikavipe.

## 20

*E židovske vođe či priznain e Isuse sago autoriteto*

*(Mt 21,23–27; Mk 11,27–33)*

<sup>1</sup> Jek đes dok o Isus sikavelas e theme ando Hramo thaj navestilas e bahtali nevimata, aviline leste e šorvale rašaja, e sikavne e Mojsiješće zakonestar thaj vi aver e židovske starešine <sup>2</sup> thaj phučline les: “Phen amende ko dijatut vlast te čeres godova? Ko ovlasitisarda tut pale godova?”

<sup>3</sup> A o Isus phendas: “Phučava me tumen. Phenen mande: <sup>4</sup> Dali o Del phenda e Jovanošće te bolel e manušen, ili e manuša phendine lešće te čerel godova?”

<sup>5</sup> A von počnisardine te raspravin pes maškar peste: “Te phendam katar o Del, phenela amende sostar askal či paćaine lešće? <sup>6</sup> A te phendam katar o manuš, sa o them čhudelape barenca pe amende dok či mudaren men. Kaj o them paćal kaj sas o Jovano proroko.” <sup>7</sup> Zato phendine e Isusešće kaj či džanen kastar avilo e Jovanesko autoriteto te bolel.

<sup>8</sup> A o Isus phendas lenđe: “Askal ni me tumenđe či phenava katar man vlast!”

*O Isus usporedil e židovske vođen e bilačhe vinogradarenca*

*(Mt 21,33–46; Mk 12,1–12)*

Š **19,42** O Isus sikavel piri tuga kaj e manuša andar o Jerusalem mukline piri prilika te aven pomirime e Devlesa. \* **19,44** Akava opisil e opsada, kaj e vojska okružil o gav saves si zidurja oko leste. Kana e vojska okolina o gav e manuša naštik inkljena andar leste thaj khonik naštik pomognila lenđe. O Isus predvidisarda kaj godova avela ando Jerusalem, thaj dogodisajlo. Ande 70. brš posle o Hristo, e rimsko vojska opkolisarda o Jerusalem thaj kote mudardas e bute manušen. † **19,46** O Isus ukorisarda e trgovcen kaj uništinas e svrha pale savi sas e Devlesko Hramo. O Del kamla te o them molilpe ande lesko Hramo, ali e trgovcurja godova koristinas sago pijaco. Von isto gajda hohavenas e manušen thaj kaj naplatinas lenđe majbut nego so molas e stvarja save terubunas pale žrtva.

<sup>9</sup> Pale godova o Isus phendas e themešče akaja usporedba: “Varesavo manuš zasadisardas o vinograd, thaj iznajmisarda les e vinogradarende. A askal oputuisarda pe lungo vrjama. <sup>10</sup> Kana avili e vrjama pale berba, bičhaldas pire slugo ke vinogradarja te kušen lesko deo savo bijandas e drak. Ali e vinogradarja mardineles, thaj bičhaldinele palpale čuče vastenca. <sup>11</sup> Pe godova vo bičhaldalende aver slugo. Ali von vi godole mardine, mardine muj lestar thaj bičhaldinele palpale čuče vastenca. <sup>12</sup> Bičhaldas lende vi e trito. A von vi les izranisardine thaj tradineles.

<sup>13</sup> Pe godova o gospodari e vinogradesko phendas: ‘So te čerav? Bičhalava lende mungre voljeno čhaves. Les valda poštuina kaj si mungro čhavo.’

<sup>14</sup> Ali kana e vinogradarja dikhline e čhaves, počnisardine te čeren svato maškar pende: ‘Akava si o nasledniko. Ajde te mudaras les thaj o naslestvo avela amaro.’ <sup>15</sup> Tradineles avri andar o vinogrado thaj mudardine les.

So gndin so čerela lenca o gospodari e vinogradesko kana ašunela so sas? <sup>16</sup> Avela thaj mudarela godole vinogradaren a o vinograd dela aver vinogradarende ando najam.”

A okola save ašunenas e Isuse phendine: “Amen vareso gajda nikad či čerdamas!”

<sup>17</sup> A o Isus lače dikhlas pe lende thaj phendas: “A so askal značil okova odlomko savo ramol ando sveto lil:

‘O bar saves čhudine e graditeljurja postanisardas o bar zaglavno?’

<sup>18</sup> Te pelo vareko pe godova bar, avela smrskome, thaj te pelo o bar pe varekaste, zgnejčila les.”

<sup>19</sup> E sikavne e Mojsiješče zakonestar thaj e šorvale rašaja kamline odma te astaren les kaj lače džangline kaj godoja usporedba odnosilpes pe lende, ali daranas katar o them.

*E rašaja probin te iskušin e Isuse gajda kaj phučen les palo porezo (Mt 22,15–22; Mk 12,13–17)*

<sup>20</sup> Katar askal počnisardine te vrebini les thaj bičhaldine e špijunen save čerenas pe kaj si iskrene te šaj optužin e Isuse kaj phenda vareso bilače, thaj te predain les e rimske upravitelješče. <sup>21</sup> Thaj phučline e Isuse: “Sikavneja! Džanas kaj phenes čači pe thaj sikaves ispravno, thaj či dičhes ko si ko, nego čačes sikaves e Devlesko drom. <sup>22</sup> Phen amende dali trubul te anen e židovurja das e carošče o porez ili te či das?”\*

<sup>23</sup> A o Isus dikhlas kaj kamen te astaren les ande klopka thaj phendas lende: <sup>24</sup> “Sikaven mande jek lovoru savjava počinelpe o porez. † Kašči si akaja slika thaj potpis pe leste?”

A von phendine: “E carošči.”

<sup>25</sup> “Askal den e carošče so si e carosko, a e Devlešče so si e Devlesko.” <sup>26</sup> Gajda naštik arakhline doš ande okova so o Isus phenda anglo them, nego ačhiline zadivime lešče naukava thaj ačhiline bi alavesko.

\* **20,22** Nadisajle kajo Isus phenela ili “ej” ili “na”. Ako phenel “ej,” askal e židovurja avilinas holjarike pe leste kaj phenel lende te počinen o porez e aver vlastende. Ako phenel “na,” askal e rimske vođe šaj phendine e Rimnjanende kaj o Isus sikavel e manušen te prekršin o rimsko zakon. † **20,24** Ando original ramol: “denar”.

*O Isus sikavel kaj si čače vaskrsenje andar e mule  
(Mt 22,23–33; Mk 12,18–27)*

<sup>27</sup> Askal aviline leste varesave saduceja, † save phenen kaj khonik či uštela andar e mule. Taj phučline e Isuse: <sup>28</sup> “Sikavneja, o Mojsije dijamen o zakon prema savo, ako mulo varekasko phral saves sas romnji a nas les čavra, neka lesko phral lel lešće romnja sar voj bijandas lešće čavo savo nasledila e imovina okolešći savo mulo taj te inđarel lesko prezime. § <sup>29</sup> Gajda sas efta phral. Prvo phral oženisajlo taj mulo a nas les čava. <sup>30</sup> Aver phral oženisajlo lešće romnjasa ali vi vo mulo, <sup>31</sup> Askal o trito taj gajda vi sa efta muline a či mukline čavra. <sup>32</sup> Po krajo muli vi e romnji. <sup>33</sup> Kašći romnji askal voj avela kana e manuša uštена andar e mule kana sas romnji sa efta phralendi?”

<sup>34</sup> O Isus phendas lenđe: “E manuša akale themešće udainpes taj ženinpes. <sup>35</sup> Ali okola saven o Del dičhel kaj si dostojne te ušten andar e mule taj traina ande okova them savo avela či ženinape niti udainapes. <sup>36</sup> Von majbut naštik ni merena, kaj avena slične sar e anđelurja. Von si čhave e Devlešće kaj vo boldalen palpale andar e mule. <sup>37</sup> A kaj e mule uštена, godova čak vi o Mojsije potvrdisardas ando odlomko po than kaj phabolas o grmo kaj e Gospode akhardas e Avramešće Devles, e Isakošće Devles taj e Jakovešće Devles dumut nakon so von muline. <sup>38</sup> A o Del naj Del e mulengo nego o Del e džudengo, kaj si savora ande leste džude.”\*

<sup>39</sup> Pe godova phendine lešće varesave sikavne e Mojsiješće zakonestar: “Sikavneja! Lače phendan!” <sup>40</sup> Taj majbut či usudisajle khanči te phučenles.

*O Mesija si majbaro katar o caro David  
(Mt 22,41–46; Mk 12,35–37)*

<sup>41</sup> Askal o Isus phučla len: “Sostar phenelpe kaj si o Hristo samo potomko e caresko Davidesko? <sup>42</sup> Pa korkoro o David phenel ande knjige e psalmurja: ‘Phenel o Gospod mungre Gospodešće:

Beš po počasno than paše mande†

<sup>43</sup> dok či položiv e dušmajen čiren tale čire pungre!’

<sup>44</sup> Korkoro o David akhardas les pire Gospodeja. Sar askal avilosas samo lesko potomko?”†

*O Isus upozoril pire učenikonen te lenpe sama katar e sikavne e Mojsiješće zakonestar*

*(Mt 23,1–36; Mk 12,38–40; Lk 11,37–54)*

<sup>45</sup> Askal anglo sa o them, o Isus phendas pire učenikonende: <sup>46</sup> “Lentumen sama katar e sikavne e Mojsiješće zakonestar, save volin

† **20,27** saduceja Vodečo židovsko versko taj političko skupina. Prihvatissardine samo prve pandž knjiga andar o Purano zavjet taj či pačanas ando trajo posle o smрто. § **20,28** Ando original ramol: “taj vazdel potomstvo pire phralešće.” \* **20,38** Pošto akala manuša fizički muline, von moraš te aven još uvek duhovno džude. Aver alavenca: “nego o Del okolen kasko si duho još džudo, vi ako si lenđe telurja možda mule kaj lengo duho još trail ande Devlešći prisutnosti.” † **20,42** Ando original ramol: “pe mungri desno rig”. † **20,44** Pošto o David phendas kaj si o Mesija lesko “Gospod”, godova značil kaj si o Hristo majbaro katar o David, taj naj samo e Davidosko potomko.

te phiravenpes ande lundže haljine, volin te e manuša pozdravin len pe javne thana, thaj te bešen pe prve thana ande sinagoge, thaj e počelja pe gozbe. <sup>47</sup> Bi ladžavesko trošin e udovicači imovina, thaj hohamne molinpe dugo e Devlešće. Von avena maj strogo osudime.”

## 21

*E udovica del e Devlešće sa so saslat  
(Mk 12,41–44)*

<sup>1</sup> O Isus ando Hramo dikhlas e barvalen sar čhon ande riznica love sago daro e Devlešće. <sup>2</sup> A dikhla vi varesošće čore udovica savi čhtas okote samo duj majcikne kovanice. <sup>3</sup> Thaj phendas: “Čačes, phenav tumenđe akaja čori udovice čhtas maj but savorendar. <sup>4</sup> Kaj savora von dine katar piro viško, a voj katar piro čorpe dijas sa so silat.”

*O Isus sikavel save znakurja avena po krajo e themesko  
(Mt 24,1–22; Mk 13,1–20)*

<sup>5</sup> Dok varesave učenikurja ćerenas svato pale godova sar si o Hramo šukar ukasime e barenca thaj e ukrasenca save e manuša andine e Devlešće, o Isus phendas: <sup>6</sup> “Avela e vrjama kana katar akava so dičhen či ačhela ni bar pe bareste. Svako avela harado.”

<sup>7</sup> E učenikurja phučlineles: “Sikavneja, a kana godova avela? Thaj sar džanasa kaj godova uskoro avela?”

<sup>8</sup> A vo phendas lenđe: “Len sama te na aven hohade kaj but džene avena ande mungro alav thaj phenena korkoro pale peste kaj si von o Mesija thaj phenena avili e vrjama! Na džan pale lende. <sup>9</sup> Kana ašunena pale raturja thaj pale pobune, na daran. Kaj sa godova trubul te avel, ali godova još naj odma o krajo.” <sup>10</sup> Askal još phendas lenđe: “O them borilape protiv aver them, thaj e carurja protiv aver carurja. <sup>11</sup> Pe sa e riga e themešće avena e potresurja, bokhalipe thaj nasvalipe. Po nebo avena čudesne znakurja savendar dela e dar pe sa o them.

<sup>12</sup> Ali majsigo katar sa akava astarena tumen thaj tradena tumen. Predaina tumen e manušenđe ande sinagoge te sudin tumenđe. Inđarena tumen angle carurja thaj angle upravitelja zato kaj sledin man. <sup>13</sup> Godova avela tumari prilika te den svedočanstvo. <sup>14</sup> Zato zapamtin na maj anglal te gndin so phenena ande tumari obrana! <sup>15</sup> Me dava tumen alava thaj kasavi mudrost savjaće naštik proturečila niti te oduprilpe ni jek tumaro protivniko. <sup>16</sup> A izdaina tumen čak vi tumare dada, deja, phrala, drugarja thaj tumari familija. Varesaven tumendar vi mudarena. <sup>17</sup> Savora mrzana tumen zato kaj sledin man. <sup>18</sup> Ali či perela ni jek bal\* katar tumaro šoro. <sup>19</sup> Tumare duše spasina pes zbog godova ako či odustanin.”

*O Isus phenel kaj o Jerusolim avela uništíme  
(Mt 24,15–21; Mk 13,14–19)*

<sup>20</sup> O Isus nastavisarda te phenel lenđe: “A kana dičhena kaj e vojska opkolisardas o Jerusolim, askal džanen kaj avili paše e vrjama kaj avela opustošime. <sup>21</sup> Okola save aračhen pes ande Judejsko regija neka našen ande gore, thaj save si ando gav neka inkljen andar leste; a ni o

\* **21,18** ni jek bal O Isus phenel pale jek majcikno deo pe manušesko telo. Vo naglasil kaj či propadnila sasto manuš. O Isus već phendas kaj varesave lendar avena mudarde, pa varesave gndin kaj akava značil kaj lende či avela duhovno naudime.

kola save si ando polje neka či bolden pes ando gav. <sup>22</sup> Kaj ande godola đesa avela e Devlešči kazna te pherdol sa so ramol ando Sveto lil. <sup>23</sup> Jao e khamne manušnjende thaj okolende save den čuči ande kola đesa! Kaj avena e bare nevolje pe phuv, thaj e Devlesko gnjevo pe akala manuša. <sup>24</sup> Avena mudarde katar o oštro mačo, thaj avena indarde ando ropstvo pe sasto them. A o Jerusalem uštavena okola save či džanen palo Del dok či isteknil e vrjama okolendi save či džanen palo Del.”

*O Isus ćerel svato kaj boldela pes pe phuv  
(Mt 24,23–35; Mk 13,21–31)*

<sup>25</sup> O Isus phenda: “Pojavina pes e znakurja po kham thaj po čhonut thaj pe čereja. A e theme pe phuv astarela o očaj zbog e huka thaj e talasurja andar o more. <sup>26</sup> O them merela e daratar thaj katar godova kaj ažućarena so avela pe akava them, kaj vi e sile e nebošće uzdrmina pes. <sup>27</sup> Askal dićhena man, e Manušesće Čhaves, sar avav pe oblakurja ande bari sila thaj ande bari slava. <sup>28</sup> Kana počnila sa godova te avel, ušten thaj vazden tumare šore kaj o Del uskoro oslobodila tumen.”

<sup>29</sup> Pale godova o Isus phendas lenđe e usporedba: “Dićhen e smokva ili bilo savo aver kaš. <sup>30</sup> Kana dićhen kaj mućen e patrja, korkoro već džanen kaj si o milaj paše. <sup>31</sup> Gajda vi tumen kana dićhen kaj sa godova avel pale soste phenavas tumende, šaj aven sigurne kaj si paše o carstvo e Devlesko. <sup>32</sup> Čaćes, phenav tumende, kaj akava naraštaj† sigurno či načhela dok sa akava či avel. <sup>33</sup> E phuv thaj o nebo načhena, ali mungre alava aćhena zauvek.”

*O Isus sikavel te avas uvek spremne pale leste  
(Mt 24,36–51; Mk 13,32–37)*

<sup>34</sup> O Isus phenda lenđe: “Len sama te či zuravol tumaro ilo ando handžvalipe palo habe thaj ando matipe ili ande trajošće brige, thaj te či iznenadil tumen godova đes, <sup>35</sup> savo avela sago zamka, pe sa e manuša save train pe sasti phuv. <sup>36</sup> Zato stražarin thaj molintumen e Devlešće te šaj načhen sa kava so trubul te avel thaj te aćhen sago pobednikurja angle mande, e Manušesće Čhaveste.”

<sup>37</sup> O Isus svako đes sikavelas ando Hramo, a raćasa inkljelas thaj raćarelas pe maslinsko gora. <sup>38</sup> A so o them već katar e rano detharin avenas leste ando Hramo te ašunenles.

## 22

*O Juda ugovoril e Isusešči izdaja  
(Mt 26,1–5, 14–16; Mk 14,1–2, 10–11; Jn 11,45–53)*

† **21,32** akava naraštaj Postojin različite načinurja te haćarelpe akava redko: 1. akaja generacija značil okola save sas džude ande vrjama dok o Isus ćerelas svato, a godova značil kaj uništilape o Jerusalem thaj e aver znakurja save anena dži ke Hristosko povratko počnila te dogodinpe dok si von džude dik; 2. akaja generacija značil vrsta manuša save si bilaće thaj suprotinpe e Isusešće, a godova značil kaj uvek avela bipaćale save suprotivina pe e Isusešće sa dži ko trenutko kana vo boldelape pe phuv; 3. akaja generacija značil “akaja rasa” thaj odnosil pe pe židovurja, so značil kaj e židovsko rasa či načhela majsigo nego so o Isus boldela pes, ili 4. akaja generacija značil e manuša save traina ande vrjama e carošči, thaj godova značil, kana dogodina pes e dogadžaja save si spomenime ande stihurja 25–26, o Isus boldelape pe phuv palo trajo godole generacijako.

<sup>1</sup> Avili paše e Pasha savi sas prvo đes katar o prazniko bikvascošće mangrengo. <sup>2</sup> E šorvale rašaja thaj e sikavne e Mojsiješće zakonestar rodenas sar te mudaren e Isuse. Ali daranas katar o them.

<sup>3</sup> Askal o beng dijas ando Juda andar o gav Iskariot, jek katar e dešuduj e Isusešće apostolja. <sup>4</sup> Vo đelo thaj dogovorisašlo e šorvale rašajenca thaj e Hramske stražarenca sar te predail lenđe e Isuses. <sup>5</sup> Von raduisajle thaj obečisardine lešće kaj denas les love. <sup>6</sup> O Juda pristanisardas. Katar askal o Juda rodelas prilika te predail e Isuses lenđe a te na dičhel o them.

### *Priprema e pashalno večera*

*(Mt 26,17–19; Mk 14,12–16)*

<sup>7</sup> Kana avilo o prvo đes katar o prazniko e bikvascošće mangrengo, ande savo trubujasas te žrtvuil pes o bakhro palo prazniko e pasha. <sup>8</sup> O Isus bičhalda e Petre thaj e Jovano thaj phendas lenđe: “Hajde džan thaj pripremin amende te has e pasha.”

<sup>9</sup> A e učenikurja phučline les: “Kaj kames te pripremis lat?”

<sup>10</sup> A vo phenda lenđe: “Ake, čim den ando gav malavela tumen o manuš savo inđarel paj ando bokali. Teljaren pale leste ando čer savo vo del <sup>11</sup> thaj roden e domačine ande godova čer thaj phenen lešće: ‘O sikavno phučel ande savi soba šaj hal e pashalno večera pire učenikonenca?’ <sup>12</sup> Vo sikavela tumenđe e bari soba po sprato. Okote pripremin.” <sup>13</sup> E učenikurja đele ando gav thaj arakhline sa sar o Isus phendas lenđe thaj okote pripremisardine e pashalno večera.

### *O Isus del Nevo Savezo*

*(Mt 26,20–30; Mk 14,17–26; Jn 13,21–30; 1. Kor 11,23–25)*

<sup>14</sup> Kana avili e vrjama pale večera, o Isus lija than pale sinija e apostolenca. <sup>15</sup> Askal phendas lenđe: “Saste ilesa čeznisardem te hava tumenca akaja pashalno večera maj sigo nego so aven mungre muke. <sup>16</sup> Kaj phenav tumenđe, či majbut hava e pashalno večera dok či pherdol laći svrha ando carstvo e Devlesko.”\*

<sup>17</sup> Lijas o tahtaj e molava, zahvalisardas e Devlešće thaj phendas: “Len thaj razdelin maškar tumende. <sup>18</sup> Kaj phenav tumenđe, katar akana majbut či pijava e mol dok či avel o carstvo e Devlesko.”

<sup>19</sup> Askal o Isus lijas o mangro, zahvalisardas e Devlešće pale leste, phagla les thaj dijas pire učenikonende e alavenca: “Akava si mungro telo savo delpes pale tumende. Akava čeren te dentumen gođi mande.” <sup>20</sup> Gajda vi pale večera lija o tahtaj thaj phendas: “Akava tahtaj si mungro rat, rate Neve Savezosko savo čhordol pale tumende.”

<sup>21</sup> “Ali ake, mungro izdajniko bešel manca pale sinija. <sup>22</sup> Me o Čhavo e Manušesko, moraš te merav sar si odredime, ali jao okolešće savo izdaila man!” <sup>23</sup> A e učenikurja pe godova počnisardine te phučen pes ko maškar lende šaj avilosas godova.

\* **22,16** E Pasha dija gođi e Izraelošće theme pe godova sar o Del izbavisarda len andar o ropstvo andar o Egipat kana žrtvuinas e bakhre thaj čhutine lesko rat po vudar pire čerengo. Po isto naćin, o Isus sas e Devlesko bakhro thaj e Isusešće ratesa oslobodil pire theme katar o ropstvo e bezehengo. O Isus palem avela thaj vladila sago o caro, a askal e vernikurja čerena e gozba thaj slavina kaj o Del izbavisarda len.

*Ko kamel te avel vođa e Devlešće manušengo trubul te služil averende*

(Mt 20,25–28; 19,28; Mk 10,42–45)

<sup>24</sup> Askal e učenicurja počnisardine te prepirinpe maškar pende ko si majbaro lendar. <sup>25</sup> A o Isus phendas lenđe: “E carurja akale themešće gospodarin pe pire thema thaj okola saven si vlast pe thema kamen te o them phenel pale lende kaj si lače. <sup>26</sup> Ali tumen na čeren gajda! Naprotiv, okova savo si majbaro maškar tumende, neka avel majcikno; a o vođa sago kova kaj služil. <sup>27</sup> Kaj ko si majbaro? Okova savo bešel pale sinija ili okova savo služil les? Dali naj okova savo si pale sinija? A me ake služiv maškar tumende. <sup>28</sup> Ačhiline mande verne ande mungre kušnje. <sup>29</sup> Zato davtumen ando naslestvo e carosko čast kaj man dija lat mungro Dad <sup>30</sup> te han thaj te pijen pale mungri sinija ande mungro Carstvo thaj te bešen pe prestolja te sudin e dešuduj plemenurja e Izraelošće.”

*O Isus phenel kaj o Petar izdaila les*

(Mt 26,31–35; Mk 14,27–31; Jn 13,36–38)

<sup>31</sup> A o Isus phenda: “Simone! Simone! Ake o sotona rodel katar o Del te probil tumaro pačipe ande mande. Zato rešetila tumen sago o điv kroz o sito.† <sup>32</sup> Ali me molisajlem pale tute te čiro pačipe ande mande ačhel. A kana palem boldejatju mande, učvrsti čire phralen.”

<sup>33</sup> O Petar phendas lešće: “Gospode, spremno sem tusa te džav vi ande tamnica vi ando smrto.”

<sup>34</sup> A o Isus phendas lešće: “Phenav tuće Petre, ađes ni o bašno či oglasila pes a tu trin drom hohaveja kaj či pindžares man.”

<sup>35</sup> Thaj phendas: “Kana bičhaldem tumen po drom bi lovengo, bi trastako thaj bi sandalengo, dal nedostailas tumende vareso?”

A von phendine: “Khanči či nedostailas amende.”

<sup>36</sup> Akana phendas lenđe: “Kas si love, neka lelen pesa! Isto gajda vi e trasta! A kas naj mačo, neka bičinel pire gada thaj nek činel pešće mačo.‡ <sup>37</sup> Kaj phenav tumende, moraš te pherdol pe mande okova so si ramome ando Sveto lil: ‘E manuša ubrojinas man maškar e zločincurja,’ kaj sa so e prorokurja ramosardine pale mande pherdola pes.”

<sup>38</sup> Von phendine lešće: “Gospode, ake akate siamen duj mačurja!”

A o Isus phendas lenđe: “Dosta si!”§

*O Isus molil e Devle te zaobiđil les e patnja ali te avel e Devlešći volja*  
(Mt 26,36–46; Mk 14,32–42)

† **22,31** O beng kamla te odvoil len katar o Isus sago kaj o manuš odvoil o điv katar e ljuska. ‡ **22,36** kana e učenicurja maj sigo teljardine thaj propovedinas, o Isus sas zurale popularno thaj e manuša rado ugostinas okolen save propovedinas e Isusešći poruka. E stvarja promenisajle akana thaj e but e manuša suprostavina pes e Isusešće thaj lešće porukaće, thaj e učenicurja moraš te lenapes sama thaj te aven spremne te osigurinpe okolesa so trubul len thaj zaštitinpe. § **22,38** Dosta si Moguće značenja si: 1. Len si dovoljno mačurja, aver alavenca: “Akana siamen dosta mačurja” ili 2. O Isus kamel te von či čeren svato kaj silen mačurja. “Dosta si kava svato pale mačurja”. Kana o Isus phenda kaj trubun te činen mačurja, vo uglavno phenelas lenđe palo o Opasnost saveja suočina pes. Vo možda či kamlas čaće te von činen mačurja thaj te borin pes.

<sup>39</sup> Askal inkljisto okotar thaj po običaj uputisajlo pe maslinsko gora. Pale leste teljardine vi lešće učenikurija. <sup>40</sup> Kana areslo okote phendas lende: “Molin tume te na peren ande kušnja!”

<sup>41</sup> Pale godova delo maj dur lendar kozom šaj čhudelpes o bar thaj pelo pe pire koča thaj molisajlo: <sup>42</sup> “Dade! Ako kames, le mandar akava tahtaj patnje. Ali na te avel mungri nego čiri volja neki!” <sup>43</sup> A askal sikadilo lešće o anđeo andar o nebo te ohrabril les. <sup>44</sup> A o Isus sa maj žarko molilas pe, ande smrtno muka, a o znojo pe leste postanisardas sago kapljice e ratešće save perenas pe phuv.\* <sup>45</sup> Uštilo katar e molitva, boldape ke učenikurija thaj arakhlalen sar soven, iscrpime katar e žalosti. <sup>46</sup> Pa phendas lende: “Sostar soven? Ušten! Molin tumen te na peren ande kušnje!”

### *O Juda izdail e Isuse*

(Mt 26,47–56; Mk 14,43–50; Jn 18,3–11)

<sup>47</sup> Dok o Isus još ćerelas svato, avilo o them, thaj angle lende o Juda jek katar e dešuduj učenikurja. Vo avilo paše ko Isus thaj kamla te čumidel les. <sup>48</sup> A o Isus phendas lešće: “Juda, zar e poljupceja kames te izdais man, e Manušesće Čhaves?”

<sup>49</sup> A kana e ostale učenikurja dikhline so si, phučline: “Gospode, te napadis len e mačesa?” <sup>50</sup> A jek lendar zamahnisardas e mačosa po sluga e šorvale rašaješće thaj čhindas lesko desno kan.

<sup>51</sup> A o Isus phendas: “Mučen len te ćeren godova! Na oduprin tumen majbut!” Askal čhutas o vas pe lesko kan thaj sastarda les. <sup>52</sup> Askal o Isus phenda e manušenđe save aviline te astaren les, e šorvale rašajenđe, e Hramske stražarenca thaj e židovske starešinende: “Sago po pobunjeniko aviline pe mande e mačonenca thaj e rovljenca! <sup>53</sup> Sostar či astardine man ando Hramo? Svako deš semas okote tumenca. Ali akava si tumaro časo thaj vladil e tama.” †

### *O Petar odričil pes katar o Isus*

(Mt 26,67–75; Mk 14,66–72; Jn 18,15–18, 25–27)

<sup>54</sup> Astardine e Isuse thaj inđardine les ando čher e šorvale rašajesko. A o Petar dadural džalas pale lete. <sup>55</sup> A e stražarja maškare ande avlija astardine e jag thaj bešline okolo late. A o Petar bešlo maškar lende. <sup>56</sup> Varesavi sluškinja dikhla les kaj bešel paše jag, oštro dikhla pe leste thaj phendas: “Vi akava sas e lesa!”

<sup>57</sup> A o Petar hohadas: “Manušnjije pa me či pindžarav les.”

<sup>58</sup> Nedugo pale godova još vareko lija les sama thaj phendas: “Vi tu san jek lendar!”

A o Petar phendas: “Najsem, manušeja!”

<sup>59</sup> Kana nakhlo varekaj katar jek sato, vareko aver odlučno phenda: “Vi akava sas čačes lesa! Pa Galilejco si!”

<sup>60</sup> A o Petar phendas: “Manuša, či džanav so phenes!” Isto časo dok još motholas, ogლისisajlo o bašno. <sup>61</sup> Askal o Gospod boldape thaj dikhlas po Petar, a o Petar dijape gođi ke alava e Gosodešće, save phendas lešće: “Phenav tuće još akaja rjat majsigo nego so o bašno ašundol, trin drom hohaveja kaj či pindžares man.” <sup>62</sup> O Petar inkljisto andar e avlija thaj zurales rujas.

\* 22,44 Ande varesavo purano grčko rukopiso naj o 43, thaj o 44. retko. † 22,53 vladil e tama značil “e vrjama te o beng deluil”.

<sup>63</sup> A e čuvarja počnisardine te maren e Isuse thaj te maren muj lestar  
<sup>64</sup> Učhardine lešće jakha thaj phenenas lešće: “Prorokuisar ko dijatu dab!”  
<sup>65</sup> Thaj but aver podrugljive alava phenenas lešće.

*O Isus po sudo angle židovske vođe*  
 (Mt 26,59–66; Mk 14,55–64; Jn 18,19–24)

<sup>66</sup> A kana svanosardas o đes, čidape o starešinstvo e themesko, e šorvale rašaja thaj e sikavne e Mojsiješće zakonestar thaj andine e Isuse anglo baro židovsko veće. <sup>67</sup> Von phendine lešće: “Ako san tu o Hristo, phen amende godova!”

A Isus phendas lenđe: “Ako phenav tumende, či pačana mande. <sup>68</sup> Ako phučav tumen dali sem me o Hristo, či odgovorina mande. <sup>69</sup> Ali katar akana me, o Čhavo e Manušesko, bešava po časno than pašo svemogučo Del.”

<sup>70</sup> Pe godova savora phendine: “Tu dakle tvrdis kaj san o Čhavo e Devlesko!”

Vo phendas lenđe: “Tumen korkoro pravo phenen! Me sem!”

<sup>71</sup> Pe godova phendine von: “Či trubul amen majbut dokaz. Korkoro ašundam andar lesko muj!”

## 23

*E Isuse hohamne prrn anglo Pilato thaj anglo Irod*  
 (Mt 27,11–14; Mk 15,1–5; Jn 18,28–37)

<sup>1</sup> Askal sa e manuša save sas ando židovsko baro veće uštiline thaj inđardine e Isuses ko Pilato savo sas rimsko upraviteljo <sup>2</sup> thaj optužisardine les: “Astardam les sar zavodil e theme thaj phenel lenđe te na počinen o porez e carošće, a pale peste phenel kaj si vo o Hristo, amaro caro.”

<sup>3</sup> O Pilato phučlales: “Dali san tu o caro e židovengo?”

A o Isus phendas lešće: “Gajda si sago kaj tu phenes!”

<sup>4</sup> Askal o Pilato phendas e šorvale rašajenđe thaj e themešće: “Nisošći doš či arakhav pe akava manuš!”

<sup>5</sup> Ali von počnisardine još majbut te navalisaren: “Bunil e theme pire naukava ande sasti phuv e jevrejendi. Počnisarda ande regija e Galilejaći thaj avilo sa dži akaring ando Jerusalem!”

<sup>6</sup> Kana godova ašundas o Pilato, phučlas dali si godova manuš Galilejco. <sup>7</sup> Kana potvrdisardine godova, o Pilato bičhaldas e Isuse ko Irod, savo vladilas ande Galilejaći regija. A o Irod baš askal arakhadilo ando Jerusalem.

<sup>8</sup> A kana o Irod dikhla e Isuse, zurale raduisajlo kaj dumut već lija te dičheles zbog okova kaj ašundas pale leste, thaj nadisajlo kaj lestar dičhela varesosko čudo. <sup>9</sup> Thaj but phučlas e Isuse, ali vo khanči či phendas lešće. <sup>10</sup> A e šorvale rašaja thaj e sikavne e Mojsiješće zakonestar ačhenas, thaj žestoko prnas les. <sup>11</sup> O Irod zajedno pire vojniconenca marda muj lestar. Dijas pe leste e carske haljine thaj bičhaldala le palpale ko Pilato. <sup>12</sup> Godova đes o Irod thaj o Pilato pomirisajle kaj sas majsigo dušmaja.

*E Isuse osudin po smrto*  
 (Mt 27,15–26; Mk 15,6–15; Jn 18,39–19,16)

13 O Pilato akhardas e šorvale rašajen, e vođen thaj e themes 14 thaj phendas lenđe: “Andine mande akale manuše e optužbava kaj vo vazdel e themes pe buna. Me ake phučav les angle tumende thaj či arakhlem ni jek doš pe leste pale savi prrn les. 15 A či arakhla e doš pe leste, ni o Irod thaj zato bičhaldala les palpale amende. Ake, vo či čerda khanči sova zaslužisardas smrto. 16 Zato dava naredba te bičuin les thaj askal mukavales.” 17\*

18 A sa o them ande jek glaso čhutas muj alavenca: “Mudar les a muk amende e Varava!” 19 (O Varava sas ande tamnica kaj mudardas, thaj kaj vazdas e buna ando Jerusalem.) 20 O Pilato probisarda te odgovoril len kaj kamelas te mučel e Isuses. 21 Ali o them čholas muj: “Razapniles! Razapniles!”

22 Phučla len o Pilato trin drom: “Ali savo zločino vo čerdas? Me khanči či arakhav pe leste sova zaslužisardas smrto. Zato dava te bičuin les thaj mukava les.”

23 A o them čholas muj thaj navalinas te razapnin e Isuse. Thaj čhonas muj sa majzurale thaj majzurale. 24 O Pilato presudisarda te udovoljil lenđe. 25 Thaj muklas o kole savo sas čhudino ando phanglipe zbog e pobuna thaj zbog o mudaripe, a e Isuse dijas ande vojniconenđe vas te čeren lesa okova so o them kamlas.

*E Isuse razapnin po trušul*

(Mt 27,32–44; Mk 15,21–32; Jn 19,17–27)

26 Dok inđarenas e Isuse, astardine varesave Simone andar o gav e Kirinija, savo boldelas pes andar o polje thaj čhutine pe leste o trušul te inđarel palo o Isus. 27 Palo Isus džalal o but them, thaj e manušnja save rovenas thaj kukinas pale leste. 28 O Isus boldape lende thaj phendas lenđe: “Manušnjalen andar o Jerusalem, na roven pe mande, nego roven pe tumende thaj pe tumare čhavra. 29 Kaj ake aven e đesa† kana phenelape: ‘Blago e nerotkinjenđe, blago e diješće savo či bijanda thaj blago e čučenđe save či pravardine.†’ 30 Askal e manuša kamena te e goren peren pe lende thaj e bregonen te učharen len. 31 Kaj ako gajda čerelpe e zelene kaštenca, so tek avela e šuče kaštenca?’” Š

32 E Isuseja po mudaripe inđarenas vi aver duj zločinconen. 33 Kana aviline po than savo akhardolas Lubanja, okote razapnisardine e Isuse a paše leste vi godole zločinconen, ječe pe lešći desno rig, a avre pe lešći levo rig.

34 A o Isus phenelas: “Jartosar lenđe, Dade Devla, kaj či džanen so čeren!”\* Pale godova e vojnukurja čhudine e kocka thaj gajda podelisardine maškar peste lešće drze.

\* **23,17** Ande varesave purane grčke rukopisurja ačhel ramome: “A svako brš kana sas o prazniko Pasha, mučenias lenđe po ječe phangles.” Dik Mt 27,15; Mk 15,6. † **23,29** Gajda avili e vrjama 70 brš posle o Hristo. E Rimsko vojska opkolisarda thaj uništisarda o Jerusalem thaj mudarda e but e židoven. ‡ **23,29** Ande godoja buduće vrjama e čhavra ando Jerusalem trpina pe strašne načinurja. Askal o them gndila kaj si majlače pale manuša saven naj čhavra. Thaj len či avela tuga kana dičhena sar lenđe čhavra patin ili meren. Š **23,31** O šuko kaš phabol maj brzo katar o zeleno kaš. Izgaranje si podrazumno metafora pale patnja ili kazna. O Isus sas sago o zeleno kaš kaj či zaslužisarda te phabol (trpil). E manuša save odbacisardine les sas sago o šuko kaš. Zaslužisardine te phabon (patin) zbog pire bezeha. \* **23,34** A o Isus phenelas: “Jartosar lenđe, Dade Devla, kaj či džanen so čeren!” Ande varesave grčke rukopisurja či arakhadilo akava alav.

<sup>35</sup> O them ačhelas okote thaj dičhelas, a e verske vođe marenas lestar muj alavenca: “Averen spasisardas, neka akana spasisarel korkoro pes ako si vo čačes o Hristo e Devlesko, izabraniko!” <sup>36</sup> Vi e vojnukurja marenas muj lestar, avenas paše leste thaj nudinas les e mol savi sas hamime e šuteja†‡ <sup>37</sup> thaj phenenas: “Ako san tu o caro e židovengo, spasi korkoro tut!” <sup>38</sup> A opral lesko šoro čhutine vi natpiso pe savo ramolas: “Akava si o caro e židovengo.”

<sup>39</sup> Jek katar o razapnime zločinco vředolas e Isuse thaj phenelas: “Najsan li tu o Hristo? Pa spasi tut thaj vi amen!”

<sup>40</sup> Askal aver phendas: “Zar či daras e Devlestar? Trpis isto kazna sago vi vo? <sup>41</sup> Ali pravedno si te amen trpis kaj primisardam so zaslužisardam amare trajosa, a akava manuš khanči bilače či ćerdas.” <sup>42</sup> Askal phendas: “Isuse, kana počnija te vladis sago caro, detut gođi pe mande thaj av mande milostivo.”

<sup>43</sup> A o Isus phendas lešće: “Čačes phenav tuće: ađes aveja manca ando rajo!”

### *E Isusesko smrto*

(Mt 27,45–56; Mk 15,33–41; Jn 19,28–30)

<sup>44</sup> Kana već avilo o mismeri, pe sasti phuv nastanisarda o tunjariko thaj sas džike o trito sato mismere, <sup>45</sup> kaj o kham pomračisajlo, a e firanglje ando Hramo § pharadile pe opaš. <sup>46</sup> A o Isus još jekhvar čutas muj andar sasto glaso: “Dade Devla, ande ćire vas predaiv mungro duho!” Godova phendas, thaj izdahnisarda.

<sup>47</sup> Kana o rimsko stotniko dikhlas so dogodisajlo, ačhilo te slavil e Devle thaj phenda: “Akava manuš sas čačes pravedniko!” <sup>48</sup> Nakon godova sa o them savo ćidape te dičhel godova prizor dikhline so sas, boldenaspe ćhere thaj marenaspe katar e tuga ando kolin. <sup>49</sup> Maj dur ačhenas sa okola kaj pindžarenas e Isuse thaj e manušnja save džanas pale leste andar e Galileja thaj promatrinas.

### *E Isusesko prahope*

(Mt 27,57–61; Mk 15,42–47; Jn 19,38–42)

<sup>50</sup> Sas varesavo manuš savo akhardolas Josif. Vo sas versko večniko. Thaj sas lačo thaj pravedno manuš <sup>51</sup> andar e Arimateja, gav savo si ande Judeja. Vo či složisajlo e odlukava thaj e postupkosa so ćerdine e Isusešće, nego ažućarelas te avel e Devlesko carstvo. <sup>52</sup> Vo đelo ko Pilato thaj rodas lestar e Isusesko telo. <sup>53</sup> Pale godova fuljardineles katar o trušul, paćardinele ande pohtan thaj čhutineles ando isklesime limori ande savo još khonik nas čhutino. <sup>54</sup> Godova sas đes kana o them pripremilas pe palo savato, savo skoro započnila.

<sup>55</sup> A godova sa pratinas e manušnja save aviline e Isuseja andar e Galileja. Thaj dičhenas sar položinas lesko telo ando limori. <sup>56</sup> Pale godova boldinepe ćhere te pripremin e mio mirisurja thaj o pomast savo koristilaspe palo prahope. A kana godova završisardine, već sas

† **23,36** e mol savi sas hamime e šuteja O šut sas jeftino pipe savo obično pijenas. E vojnukurja marenas muj katar o Isus gajda kaj denas te pel jeftino pipe varekas ko phenel kaj si caro.

‡ **23,36** Den man o žuć te palo habe, thaj ande mungri truš den man šut te pijav. § **23,45** e firanglje ando Hramo Akaja firanglja sas majbut katar 25 meterja vuči thaj odvoilas o majsvelto than katar o sasto Hramo.

o savato pa sasto đes naštik khañči érdine kaj poštuinas e odredba andar o zakon.

## 24

*E manušnja arakhline e Isusesko limori čučo*

*(Mt 28,1–10; Mk 16,1–8; Jn 20,1–9)*

<sup>1</sup> Prvo đes ando kurko, detharinako rano, e manušnja aviline po limori e mio mirisenca save von korkoro pripremisardine. <sup>2</sup> A kana areline dži ko limori arakhline o bar\* crdino katar o limori. <sup>3</sup> Dine andre, ali či arakhline o telo e Gospode Isusesko. <sup>4</sup> Thaj dok ačhenas gajda zibunime, angle lende pojavisajle duj manuša ande blistavo parne haljine. <sup>5</sup> E manušnja darajle thaj poklonisajle e mujesa dži ke phuv, a e duj manuša phendine lenđe: “Sostar roden e džude maškar e mule? <sup>6</sup> Naj akate, nego uskrnsiarda! Dentumen gođi sar phendas tumenđe dok još sas ande Galileja: <sup>7</sup> ‘Me o Čhavo e Manušesko moraš te avava dino ande vas e bezehalende, thaj razapnina man, ali me o trito đes uskrsniva.’”

<sup>8</sup> Askal e manušnja dinepe gođi kaj o Isus phendas godova. <sup>9</sup> Thaj boldinepe katar o limori thaj sa godova javisardine e dešujek apostolende thaj savorende averende. <sup>10</sup> A godova sas e Marija andar e Magdala, e Jovana, Marija dej e Jakovešči, thaj još varesošće manušnja. Von sa godova so sas phendine e apostolende. <sup>11</sup> A e apostolende sa gadava činisajlo sago kaj umislisardine, thaj či paćaine e manušnjende. <sup>12</sup> A o Petar ipak, uštilo thaj prastaja karingal o limori. Kana arešlo, provirisarda andre thaj dikhla samo e povojurja save sas katar e lanenosko pohtan. Pale godova boldapes čhere ando čudo savo dogodisajlo.

*O Isus sikadol e duje učenikonende po drom palo Emaus*

*(Mk 16,12–13)*

<sup>13</sup> Godova đes e Isusešće duj sledbenikurja putuinas ando gav savo akhardolas Emaus, savo sas majdur katar o Jerusalim dešujek kilometrja. <sup>14</sup> Dromesa čerenas svato maškar pende pale sa so sas. <sup>15</sup> Thaj dok gajda čerenas svato thaj raspravinas, avilo dži lende o Isus thaj džalas lenca. <sup>16</sup> Ali nas dino lende jakhende te pindžaren les.

<sup>17</sup> O Isus phučlalen: “So godova raspravin dromesa?”

Von ačhiline phađe katar e tuga. <sup>18</sup> Jek lendar, savo akhardolas Kleopa, phendas lešće: “Zar san tu jedino stranco ando Jerusalim savo či džanel so sas ando Jerusalim akala đesa?”

<sup>19</sup> A o Isus phučla: “So sas godova?”

A von phendine lešće: “Pa okova so dogodisajlo e Isuseja andar o Nazaret. Vo sas proroko, silno pe dela thaj ande alava anglo Del thaj angle sa o them: <sup>20</sup> Ali amare šorvale rašaja thaj e vladarja predaisardinele te avel osudime po smrto thaj te razapnin les. <sup>21</sup> A amen nadisajlam kaj si vo okova savo izbavila o Izrael† osim godova, akava si već trito đes sar gadava dogodisajlo. <sup>22</sup> A još vi varesave manušnja, save sas maškar mende, zibunisardine

\* **24,2** o bar Akava sas baro, isklesime okruglo bar dovoljno baro te potpuno phandavel o ulaz po limori. Sas potrebno varekozom manuša te len les majdur. † **24,21** E Rimnjanurja vladinas pe židovurja. Von nadisajle kaj si vo: “savo oslobodila e Izraelconen katar e rimske dušmaja”.

men: čim svanosardas đele po limori, <sup>23</sup> ali okote či arakhline lesko telo pa aviline thaj phendine amende kaj sikadile lenđe e anđelurja thaj phendine lenđe kaj si o Isus džudo. <sup>24</sup> Varesave amarendar prastaine po limori thaj arakhline sa sar e manušnjaja phendine, ali les či dikhline.”

<sup>25</sup> A o Isus pe godova phendas lenđe: “O sar sen nerazumne, nisar te paćan ande kova so phendine e prorokurja! <sup>26</sup> Dali či von prorokuisardine kaj o Hristo sa godova moraš te pretrpila majsigo nego so o Del proslavila les?” <sup>27</sup> Askal o Isus započnisardas te objasnil lenđe sa so sas ramome ando Sveto lil, katar o Mojsije džike e prorokurja.

<sup>28</sup> Pe godova avile paše dži ko gav ande savo džanas, a lenđe pričinisajo sago kaj o Isus kamelas te nastavila majdur o drom. <sup>29</sup> Ali von nagovorinas les: “Ać amenca! Kaj već peli e rjat, a o đes načhel!” Vo aćhilo thaj dijas lenca ando ando čher. <sup>30</sup> Kana o Isus lijas te hal lenca, lijas o mangro, blagoslovisardale, phaglale thaj dijalen. <sup>31</sup> Pe godova putajle lenđe jakha thaj pindžardineles, ali vo nestanisardas angle lenđe jakha.

<sup>32</sup> Askal von phendine jek avrešće: “Či li phabolas amaro ilo ande amende dromesa dok ćerelas amende svato, thaj dok tumaćilas amende o Sveto lil?” <sup>33</sup> Odma spremisajle thaj boldinepe ando Jerusalem. Okote arakhline e dešujek apostolen thaj vi aver e Isusešće sledbenikonen, <sup>34</sup> save phendine lenđe: “O Gospod čaćes vaskrsnisarda thaj sikadilo e Simonešće!” <sup>35</sup> Askal von phendine sar maladine e Gospode po drom palo Emaus thaj sar pindžardine les kana phaglas o mangro.

### *O Isus sikadol e ućenikonende (Jn 20,19–23)*

<sup>36</sup> Dok von ćerenas svato pale godova, o Isus katar jekhvar aćhilo maškar lenđe thaj phendas lenđe: “Miro tumende!” <sup>37</sup> Von, zbunime thaj darade, gndisardine kaj dićhen e duho. <sup>38</sup> A o Isus phendas lenđe: “Sostar darajle? Sostar kasavi sumnja dija ande tumare ile? <sup>39</sup> Dićhen mungre vas thaj mungre pungre! Me sem gadava! Pipnin man thaj dićhena! E duho naj kokala ni mas sago kaj dićhen kaj man si!” <sup>40</sup> Phendas lenđe godova, thaj sikadas lenđe pire vas thaj pire pungre.

<sup>41</sup> Katar o ćuđenje thaj katar e bah naštik paćaine. A vo phućla len: “Situmen vareso hamasko?” <sup>42</sup> Von dineles kotor peko maćho. <sup>43</sup> Vo lija les thaj halas anglalende.†

<sup>44</sup> Askal phendas: “Pale akava phenavas tumende dok još semas tumenca: Trubul te pherelpes sa so si ande Mojsijesko zakono, ande prorocke lila thaj ande psalmurja ramome pale mande.” <sup>45</sup> Askal putardas lendi gođi te haćaren o Sveto lil. <sup>46</sup> Thaj phendas lenđe: “Ramome si ande Svete lila: O Hristo trpila thaj merela, a o trito đes uštela andar e mule. <sup>47</sup> Ande lesko alav propovedilapes sa e manušenje kaj trubun te pokainpe gajda te o Del jartol lenđe e bezeha. A počnila katar o Jerusalem. <sup>48</sup> Tumen sen svedokurja pale godova.

† **24,43** Godova ćerdas te sikavel lenđe kaj vo naj duho, kaj e duhurja či han.

<sup>49</sup> A me bičhalava tumenđe e Sveto Duho, baš sago kaj mungro Dad obećisardas. Zato ačhen ando gav dok či len pe tumende e silaŠ opral.”

*O Isus si vazdino ando nebo angle učenikurja  
(Mk 16,19–20; Dap 1,9–11)*

<sup>50</sup> Pale godova o Isus inđardalen paše dži ko gav e Vitanija. Okote vazdas pire vas thaj blagoslovisardalen. <sup>51</sup> Gajda sar blagoslovisardalen, durilo lendar thaj sas lino ando nebo. <sup>52</sup> Von peline pe kočã angle leste thaj askal bare bahtasa boldinepe ando Jerusalem. <sup>53</sup> Thaj svako đes ando Hramo slavinas e Devle.

---

Š 24,49 dok či len pe tumende e sila Ando original ramol: “dok či len pe tumende e sila”. E Devlešći sila učharelalen po isto način sago kaj e drze učharen e manuše. Godolesa dobina e sila e Sveto Duhošći sar šaj te svedočin e aver manušende palo Isus.